


ANG DILI-MAKITA NGA PANAGHIUSA SA PANGASAW-ONON NI CRISTO

 Gikansela ko ùna ang usa ka pagpangayam nga biyahe, aron mapadayon ko ang buluhaton sa Ginoo. Busa usa kini ka . . . Malipayon kami nga maania dinhi. Nagatoo ko, niadtong ulahing higayon ko dinhi, gisulti ko kaninyo: sa matag higayon nga moanhi kami, adunay usa nga nagakawala. Ug kung mobalik na pud kami sa sunod tuig, ug kon maglangay pa ang Ginoo, aduna na usab og mawala.

² Ngani adunay usa, nga suod gyud, kaayo nako sa kasingkasing, og espiritu; kadto mao si Igsoong Lyle. Kanunay ko kaniadtong makadawat og malipayon nga pag-abi-abi, sa pagsulod ko, og maanaa dinha sa luyo ug nagapaminaw, diha sa lawak tun-anan ni Igsoong Jack, sa karaang tinag-upat nga pag-awit. Nagaawit na sila didto sa Kahimayaan, karong gabhiona. Bueno, aduna na’y usa nianang mga tingog nga atua na karon Didto, nga nagahulat sa nahibiling tulo. Siguro dili ko na kana madungog pa dinhi ibabaw sa yuta. Apan nagalaum gayud ako nga madungog kana pag-usab, Igsoong lalaki, Igsoong babayeng Moore, didto nianang Yuta kon diin sila’y . . . diin wala na gayu’y pagsalop.

³ Si Igsoong Palmer usa ka halangdon nga alagad ni Cristo. Mahinumduman ko ang gisulti kanako ni Igsoong Jack mahitungod sa iyang—iyang kinabuhi nga napahinungod gyud sa Dios. Magkauban man sila nga mga panday, kaniadto. Ug miingon nga inig kaon niya kono sa iyang—iyang paniudto, nagagunit siya og sandwich, ginakaon niya kini samtang ginabasa ang iyang Biblia. Kita n’yo? Nakabuhat siya og pipila ka dagkung halangdon nga mga butang, si Igsoong Palmer. Usa siya ka maayo nga panday, usa ka buutan nga amahan sa iyang mga anak, sa usa ka maanindot nga pamilya. Gipadaku niya silang tanan alang sa pag-alagad sa Ginoo. Sa nasayran ko, luwas silang tanan ug puno sa Espiritu Santo. Ug usa gyud kana ka dakung kontribusyon para kang kinsa man nga tawo niining mga panahona, sa mga batang lalaki ug mga batang babaye. Apan, kita n’yo, ang tanan nga iyang nabuhat wala gihapon og kapuslanan kon wala ang pagpangalagad sa Dios, kon wala siya nangalagad sa Dios. Ug karong gabhiona, tungod sa iyang mga nabuhat dinhi ibabaw sa yuta, sa iyang maayong mga buhat,

mitaliwan na siya alang sa iyang ganti, aron makauban sila. Papahulayon unta sa Dios ang kalag sa atong igsoon.

⁴ Nasayod ko, samtang usa kini ka tabernakulo dinhi, nan ako—nasayod ako nga siya’y. . . ang iyang tingog magapabilin gihapon dinhi. Madungog n’yo kini. Si Igsoong Anna Jeanne ug—ug ang igsoon niyang babaye, nga nagatugtog sa organ ug piyano, daw sa unsa nga dili na nila kinahanglang maghulat. Motindog lang dinhi si Igsoong Palmer ug mopili ra siya og kanta, og mosugod na. Ila na dayon kining masundan. Ug dili ko gayud. . . nagalaum ako nga madungog siya pag-usab nga manguna sa alawiton.

⁵ Sa iyang mga anak; sa iyang asawa; ug kang Igsoong Jack, nga suod niyang higala, dugay na sila nga managhigala sulod niining daghang mga katuigan; ug si Igsoong lalaking Brown, si Igsoong babayeng Brown, ug kamong tanan dinhi sa tabernakulo: Panalanginan kamo sa Dios. Gimingaw na ako kaniya, usab. Papahulayon unta sa Dios ang maisogon niyang kalag, hangtud sa panahon nga mahinagbo na nato siya diha sa kalinaw.

Iduko nato ang atong ulo.

⁶ Maloloy-ong Langitnong Amahan, nahisgotan ko lang ang maong halangdon nga alagad, tungod gimingaw ako kaniya, karong gabhiona, pag makiglamano siya kanako, ug aduna kanunay kanang matahum niya nga pahiyom sa dihang moingon siya, “Panalanginan ka sa Dios, Igsoong Branham,” inig sulod namo sa pultahan. Nasayod ko nga nahidangat na siya sa Imong Panimalay, karong gabhiona. Busa nagaampo ako, minahal nga Dios, nga igatugot Mo nga ang mga bunga, ang iyang maayong mga buhat nga naganunot kaniya, mahimong modaku pa, magapadayon pinaagi sa iyang mga anak, og sa iyang asawa. Nagaampo kami nga panalanginan Mo ang iyang asawa, Ginoo. Gisulti Mo man nga mamahimo Ka nga bana ngadto “sa mga balo nga tinuod gayud nga mga balo.” Nagaampo ako para sa among Igsoong babayeng Palmer ug para sa tanan niyang mga anak. Nasabtan ko kung unsay ilang gibati, ingon nga namatyan pud ako og asawa ug amahan usab.

⁷ Busa, Amahan, samtang ania pa kami dinhi, niining gabhiona, ginaampo namo nga Imong iandam ang among mga kasingkasing, usab, alang nianang higayon. Wala kita masayod. Tingali’g moabot kana sa ingon ka kalit nga sama sa nahitabo sa among igsoon. Wala kami masayod kon kanus-a kana moabot, apan hingsayran namo nga moabot gayud kana. Busa ginaampo namo, Dios, nga Imong susihon ang matag kasingkasing nga ania dinhi, karong gabhiona. Dios, ayaw intawon og saylo-i ang akoa. Susiha ang akong kasingkasing, usab, ug sulayi ako. Ginoo, kung aduna ma’y pagkadautan kanamo, tangtanga kini. Ginatinguha

gyud namo nga mangalagad Kanimo. Mao kana ang among bug-os nga tinguha, ang alagaran Ka.

⁸ Ibubo kanamo ang Imong Espiritu, karong gabhiona, ug sa niining tibuok semana. Panalangini kining tabernakulo nga ginganlan og Life Tabernacle. Hinaut nga madawat niini nga bug-os nga mga panalangin sumala sa maong ngalan ug mapuno sa Kinabuhi sa Dios, niining semanaha, aron maluwas ang matag nahisalaag nga kalag, aron mapuno sa Espiritu Santo ang matag magtotoo, ug bag-oha pag-usab, ang mga paglaum nga ania kanamo, Ginoo. Ginaampo usab namo nga Imong ayohon ang tanan nga mga may sakit ug mga nagaantus nga nagaanhi sa among taliwala. Hinaut nga maania ang Imong gamhanang Balaang Espiritu, Ginoo, ug ayohon gayud ang . . . ug dihogan ang matag usa aron motoo. Itugot kini nga mga butang, Amahan.

⁹ Dios, tabangi ako karon. Kung mahitabo, nahitabo man nga nahatag kanako ang turno sa paghatud sa Mensahe. Ginaampo ko, Dios, nga Imong itugot nga maipadaplin gayud ang tawhanong bahin. Hinaut nga mokunsad ang Balaang Espiritu ug manglihok nganhi kanamo, Ginoo. Hinaut nga pagadumalahan sa Espiritu Santo ang panagtigum, Ginoo. Nasayod kami nga wala gayud kami'y kasarang. Dili namo kini mahimo, wala ni usa kanamo. Wala pud kami nagapamahayag nga mahimo namo kini. Apan, Ginoo, nasayod gyud kami nga Ikaw lang ang Bugtong makahimo niini. Mao nga nagasalig kami Kanimo, Ginoo. Manglihok Ka, Espiritu sa Dios, ug mokunsab pag-usab nganhi kanamo. Nagapangamuyo kami sa Ngalan ni Jesus. Amen.

¹⁰ Karon buut ko nga magpaabot og mga pagpangumosta pinaagi sa linya sa telepono, ngadto sa mga kaiglesiahan sa tibuok estado nga nakakonekta karon. Nakakonekta man kita sa telepono, nga usa ka maayo'g diyutay'ng pamaagi nga atong naangkon, pinaagi sa atong Igsoong Peary Green nga taga Beaumont, Texas. Ug ang mga iglesia, sa kinatibukan, nga nagasunod sa Mensahe, sa tibuok Estados Unidos, nakakonekta usab, karong gabhiona. Ginapaabot pud namo ang mga pagpangumosta, sa tibuok Kasadpang Kabaybayonan, gikan sa Vancouver hangtud sa Tijuana, Mexico, paingon sa San Jose, Los Angeles. Sa tanang mga grupo dinhang dapita, ginapangumosta namo kamo gikan dinhi sa Shreveport. Usab, hangtud ngadto sa Prescott, Arizona, sa maong grupo dinha nga nagahulat sa Ginoo, ginapaabot namo kaninyo ang mga pagpangumosta, ug ngadto sa Tucson, og sa Sierra Vista usab. Hangtud ngadto sa New York, sa kinatibukan, sa tibuok nasud, panalanginan kamo sa Ginoo, ang matag usa kaninyo. Unta ania kamo, karong gabhiona, dinhi niining maanindot nga estado sa Louisiana, kon diin mora na pud og ikaduhang probinsya, para kanako. Ako . . .

¹¹ Kabalo mo, kamong mga taga New York, kabalo na man mo, nga medyo makatawa ko kaninyo, tungod sa inyong sinultihan. Pero mora lang baya ako og anaa sa kaugalingon kong lungsod karong gabhiona. Oo. Ang tanan nga taga dinhi, kabalo mo, miingon sila, “Hello, d’ere, Igsoong Branham. Dalha sab si Igsoong babayeng Branham ug ang tanang mga bata ug umanhi kamo aron duawon kami.” Oh, my! Nagapabati gyud kana og maayo kanako. Ingon niana ang tinuod nga Ingles, para kanako. Dili ingon nga ginabalewala ko kamong mga taga sidlakan ug taga habagatan, ug ang nagkalainlaing mga lugar. Pero, abi ninyo, siguro nahimugso lang ako ingon nga usa ka karaang Reb’ ug kinahanglan kong magpabilin nga ingon niana. Ako—mora’g ganahan ra gani ko niana, ako mismo. Tinuod gyud kana nga Ingles.

¹² Mitambong ako kaniadto sa usa ka pagpamahaw sa Business Men, dinhi dili pa lang dugay, ug miingon sila, “Manindog na kita karon ug awiton tà ang pang-nasudnong awit.” Ug mitindog pud ko, mikanta’g, “For my old Kentucky home, far away.” Bueno, para kanako, mao kadto ang pang-nasudnong awit. Mao lang kadto ang nahibaloan ko. Busa, ginapaabot namo kaninyo ang pagpangumosta. Ug karon ngadto sa . . .

¹³ Nagatoo ko nga paningkamotan nilang ipasibya ang pang-pamahaw nga tigum, usab, ang pang-pamahaw nga tigum sa Business Men, sa Sabado sa buntag. Sultihan ra kamo ni Igsoong Green, tungod anaa na man siya mismo dinha dapit sa mga mikropono. Busa sultihan niya kamo kung unsa orasa magsugod ang maong pang-pamahaw nga tigum, ug kung unsa pud orasa, matag gabii, nga magapaminaw sa pagsibya. Nagapasalamat kaayo kami kaninyo. Iampo n’yo usab kami.

¹⁴ Bueno, sa lokal nga panagtigum dinhi, ug sa tabernakulo ni Igsoong Jack, mohangyo lang ko kaninyo og pabor, karong gabhiona. Tungod magahatag man ko sa akong pang-pasalamat nga Mensahe sa—sa tibuok nasud, niining gabhiona, ngadto sa atong lokal nga mga iglesia nga nagasunod sab sa Mensahe. Bahin niini, ako—tingali’g medyo madugay ako. Ug, usab, mahimong magwali pud ko og pipila ka Doktrina. Busa, kung ingon-niana, ug kon dili man kamo mouyon Niini . . .

¹⁵ Sama ra sa kanunay ko nang gisulti mahitungod sa pagkaon og cherry pie: “Pag makausap ko og liso, dili man nako iluwa ang pie, iluwa ko lang ang liso, og padayon ko lang nga ginakaon ang maong pie.”

¹⁶ Busa kung mahitabo man nga makahisgot ako og usa ka butang karong gabhiona, ako . . .bueno ako . . .ang usa ka hinungdan nga gidawat ko kini nga pagdapit, nga maania dinhi, karong gabhiona, aron maihatud ko ang akong pang-pasalamat nga Mensahe ngadto sa maong mga pundok sa tibuok nasud, tungod kay sa kanunay matugtanon man gud kaayo nga

ginaablihan ni Igsoong Jack ang iyang pultahan ug moingon, “Iwali lang kung unsay anaa sa imong kasingkasing.” Mao nga mabati ko gayud nga mora lang ko og anaa sa kaugalingon kong tabernakulo.

¹⁷ Busa tingali’g dinhi, sa lokal nga panagtigum ni Igsoong Jack, mahimong dunay mga ministro ug pipila ka mga tawo nga dili mouyon sa maong Doktrina. Pero kasagaran aduna man gyud ko’y pagtahud nga dili maghisgot og doktrina diha sa pulpito sa usa ka ministro, nga nagdapit kanako nga motambong og mamulong alang kaniya. Busa, human niining gabhiona, sa hunahuna ko basin mag-ampo na lang ko para sa mga may sakit ug magpahigayon og regular nga panerbisyo. Apan akong nahunahuna nga ipahibalo ko na og una kaninyo, nga kung aduna ma’y butang nga akong masulti nga dili n’yo mauyonan, bueno, isipa na lang ninyo nga tungod kana sa akong pagkawalay-edukasyon, siguro, ug wala na’y nahibaloan pa nga mas maayo. Ug mao nga iampo n’yo ako.

¹⁸ Bueno karon ato nang ablihan ang Pulong, sa usa ka kapitulo dinhi. Buut kong mopahinungod sa daghang mga bahin niini karong gabhiona, tungod aduna man ko’y pipila ka mga Kasulatan ug diyutay’ng mga sinulat nga gisulat ko na dinhi sa usa ka gamay’ng sulatanan.

¹⁹ Mahinumduman ko pa ang unang higayon nga misaka ako dinhi sa entablado sa Life Tabernacle, baynte ka tuig na ang milabay. Ako—dili ko na kinahanglang isulat kaniadto ang akong mga Kasulatan ug mga basihanan. Baynte anyos lang ko nga mas batan-on pa kaniadto. Apan karon milagpas na man ko og baynte-singko, busa ako . . . sa ikaduhang higayon. Busa ako’y . . . dili na ako makahinumdom og ayo sama kaniadto. Mao nga kinahanglan ko nang isulat ang akong mga Kasulatan, ug usahay pamub-an pa gani ang ubang butang nga gusto kong panihungdan.

²⁰ Ug karon ang Ginoo magapanalangin unta samtang magabasa kita sa Pulong sa Dios, sa Basahon sa Mga Taga-Roma, sa ika-7 nga kapitulo. Karon, gusto kong itudlo kini nga mora’g sama sa usa ka leksyon pang-Sunday school.

²¹ Nasayod ko nga adunay mga tawo nga nagatindog na lang. Ug mora lang sab didto sa tabernakulo, sa Jeffersonville, kasagaran, bueno gusto namong pangumostahon kamong tanan, usab, niining gabhiona, nasayod ko nga nakakonekta kamo dinha sa tabernakulo. Ug mora lang sab ko og anaa sa tabernakulo, karong gabhiona, kung ania kamo dinhi, ang mga tawo anaa na dinha sa mga bungbong, ug nagkadasok na. Bueno, sa tan-aw ko ingon niana usab, kamong, mga tawo nga anaa diha nianang bahin sa nasud, nga nagapaminaw para sa Mensahe.

²² Karon ato kining iaplikar ingon nga usa ka leksyon pang-Sunday school. Ug wala kini nakapahinungod sa bisan unsa,

sa kinsa man nga mga tawo, o sa unsa mang butang; kondili sa Iglesia lamang, sa Lawas ni Cristo nga ginapaninguhaan natong agakon ngadto sa mas halawum nga mga panghunahuna ug mas hataas nga mga katuyoan, ingon nga nagatoo ta nga haduol na ang Pag-abot ni Ginoong Jesus. Nagatoo kita niana. Mas nagkahaduol pa, baynte ka tuig nga mas haduol na kaysa niadtong unang higayon nga mianhi ako sa Shreveport. Oh, daghan na kaayong mga nangahitabo sukad niadtong panahona! Karon nagahulat na kita sa Pag-abot sa Ginoo, sa atong henerasyon. Wala na ako nagapaabot pa og rebaybal sa atong henerasyon. Ang Pag-abot na sa Ginoo ang ginapaabot ko, sa atong henerasyon.

²³ Karon diha sa Mga Taga-Roma 7, nagatoo ko nga abli na ang inyong mga Biblia, sa bisan asa man karon, sa tibuok nasud, buut nato nga basahon kini og ayo. Karon, kini, kini . . . kining Mensahe nga nagagikan niini, mora kini og mahitungod sa kaminyoon ug panagbulag, apan sa tinuod lang dili man gyud. Para kanako, usa kini ka propesiya alang sa Iglesia sa kaulahiang mga adlaw. Atong basahon:

Wala ba kamo mahibalo, mga igsoon, (kay nagasulti ako sa mga tawo nga nanghibalo sa kasugoan,) nga ang kasugoan adunay kagamhanan sa tawo samtang buhi pa siya?

Kay ang babaye nga adunay bana tungod sa kasugoan nahigot sa iyang bana samtang buhi pa siya; apan kung mamatay ang bana, mahigawas siya gikan sa kasugoan sa iyang bana.

Sa ingon niana, samtang buhi pa ang iyang bana, kon maasawa siya sa lain nga lalaki, paganganlan siya nga mananapaw: apan kung mamatay ang iyang bana, mahigawas na siya sa maong kasugoan; aron nga dili siya mahimong mananapaw, bisan pa maasawa siya sa lain nga lalaki.

Busa, mga igsoon ko, nangamatay usab kamo ngadto sa kasugoan pinaagi sa lawas ni Cristo; aron kamo maiya, o, mahiusa sa lain, bisan kaniya nga nabanhaw gikan sa mga patay, aron managpamunga kita alang sa Dios.

Kay sa diha pa kita sa unod, . . . ang mga kailibgon nga makasasala, nga pinaagi sa kasugoan, nagabuhat sa sulod sa atong mga bahin sa lawas aron managpamunga ngadto sa kamatayon.

Apan karon gipahigawas na kita gikan sa kasugoan, mga patay na kita sa naghigot kanato; aron magaalagad kita diha sa pagkabag-o sa espiritu, ug dili sa pagkadaan sa sinulat nga kalagdaan.

²⁴ Ug karon mag-ampo kita.

²⁵ Minahal nga Dios, bag-ohay ra namong gibasa ang among ginatoohan nga balaang Pulong sa Dios. Ug mao kana ang among ginatoohan, nga wala bisan ni usa ka tulpok o usa ka kudlit ang pagasayloan Niini hangtud ang tanan matuman. Ug nagatoo kami nga gisulti kanamo sa among Ginoo, diha sa Pinadayag sa ika-22 nga kapitulo, nga, “Ang si kinsa man nga magataktak og usa ka Pulong gikan Niini o magadugang og usa ka pulong ngadto Niini, mao gihapon, ang iyang bahin, pagataktakon gikan sa Basahon sa Kinabuhi.”

²⁶ Ug among makita nga, tungod sa sayup nga pagpasabot niining Pulong, sama nga gisayup Kini pagpasabot ni Satanas ngadto kang Eva, nga nagpahinungdan kang Eva nga duhaduhaan ang usa ka Pulong, mao’y nagbalhog sa tibukok kaliwatan sa tawo ngadto sa bug-os nga kalaglagan. Tungod sa usa ra ka Pulong!

²⁷ Dayon makita namo diha sa tunga-tunga sa Basahon, nga mianhi ang among Ginoo ug Manluluwas, ug gihatag Niya kanamo kini nga kinutlo mahitungod Niini: “Ang tawo dili mabuhi sa tinapay lamang, kondili sa matag Pulong nga nagagula sa baba sa Dios.”

²⁸ Dayon aduna kining seryoso nga pasidaan usab diha sa kaulahiing Basahon, sa Pinadayag ni Jesus Cristo, “Ang si kinsa man nga magadugang og usa ka pulong o magataktak og usa ka Pulong, ang iyang bahin pagataktakon gikan sa Basahon sa Kinabuhi.”

²⁹ Oh Dios, ingon nga hingsayran, og nakita namo kung unsa kami ka huyang, hingsayran namo nga nagalakaw kami ibabaw sa dali rang mabugto nga mga tanud sa kinabuhi, sa niining mortal nga kinabuhi (nga wala nanghibalo kung unsang orasa kami ipatawag aron papanubagon ngadto sa Kahitas-an), tugot kami, Oh Ginoo, nga ipadaplin ang tanang butang sa among kasingkasing, ang tanang butang sa among hunahuna, ug diretsong motan-aw sa Imong Pulong, karong gabhiona, ug aron moanhi Ka ug hubaron Kini nga dunay buhi nga mga kapadayagan. Itugot kini.

³⁰ Hinaut nga mokunsad kanamo ang Imong Espiritu ug dihogan ang Pulong nganhi sa among kasingkasing, aron nga managpanguli kami gikan dinhi, niining gabhiona, nga mas maayo na nga mga tawo kaysa kung unsa kami karon, aron magkaaduna kami og mas halawum nga pag-ila kang Jesus Cristo. Itugot kini, Ginoo, aron nga masabtan namo ang adlaw nga among gikinabuhian, ug ang pag-andam sa Dios alang sa Iyang mga katawohan sa niini nga panahon, kining makuyaw, delikado, og mangitngit nga panahon nga among gikinabuhian karon. Dios, dihogi kami, dili lamang ang mamumulong, kondili ang tigpatalinghug usab. Ug, kaming tanan, himoa ang among mga kasingkasing nga mangurog diha sa Imong Pulong. “Kay

ang pagkahadlok sa Dios mao'y sinugdan sa kaalam.” Itugot kining mga butanga, Amahan, kay amo kining ginapangamuyo sa Ngalan ni Jesus. Amen.

³¹ Buut kong hatagan og ulohan kining pipila ka pahayag nga akong isulti dinhi, ug ang pipila ka Kasulatan nga gusto nakong isaysay og ayo, kon itugot sa Ginoo, para sa—sa pang-pasalamat nga Mensahe, bahin sa, ang dili-makita, *Ang Dili-makita Nga Panaghiusa Sa Pangasaw-onon Ni Cristo. Ang Dili-makita Nga Panaghiusa Sa Pangasaw-onon Ni Cristo*. Mora kini og dili usa ka pang-pasalamat nga Mensahe. Apan, bisan unsa pa man nga Kasulatan, mapasalamaton gyud kita para sa tanan Niini.

³² Mapasalamaton ako sa Dios nga nagapuyo ako niining panahon sa nanghinapos na nga mga panghitabo sa kasaysayan niining kalibutan. Wala ako masayod. Pero kung nagkaaduna man ko kaniadto og pagpili sa wala pa ang pagkatukod sa kalibutan, ug tingali kung gipahayag kanako sa Dios ang tibuok programa, ug miingon kanako, “Ako—gusto Ko nga magwali ka. Ug karon unsa man nga kapanahonan ang imong gusto, aron moadto sa yuta para magwali?” Pilion ko gihapon kini nga kapanahonan, kay nagatoo ko nga mao kini ang bulawanon nga kapanahonan.

³³ Sa walay pagduhaduha gusto ko usab nga maania niadtong panahon sa Iyang pagduaw nganhi sa yuta. Apan, sa gihapon, nagatoo ko nga kining sa karon mismo mao ang mas mahimayaon nga panahon, tungod kay mao man kini ang panahon nga moabot Siya aron kuhaon na ang mga tawo nga Iyang gipangtubos, nga haduol na ang pagkabanhaw sa diha nga managpamangon na ang tanang mga tinubos. Daw sa unsa ka mahimayaong kahigayonan nga aduna kita, para mamulong ngadto sa mga tawong naghimalatyon na, makuyaw kaayo kini nga panahon! Mao nga nadasig kita tungod niana.

³⁴ Ug nasayod kita nga patapos na ang kasaysayan. Ang kasaysayan sa kalibutan matapos na sa dili madugay, dayon magasulod na kita sa usa ka bag-ong adlaw, ngadto sa mahimayaong Milenyum. Ingon nga, usa ka magtotoo, nagatoo ako sa... sa Milenyum, usa ka Milenyum nga paghari uban ni Cristo, usa ka libo ka tuig nganhi sa yuta; sa pisikal nga pagbalik ni Ginoong Jesus, aron kuhaon ang usa ka pisikal nga katawohan, nga gihimaya na, pinaagi sa Iyang nagalimpyo nga Dugo.

³⁵ Nagahatag si Pablo og usa ka paghulagway dinhi, sa atong Kasulatan, mahitungod sa kasugoan ug grasya, ug ginahulagway kini nga sama sa kaminyoon ug panagbulag. Ngani kini nga hilisgotanan panagsa ra nga naiwali, tungod kay, halos, nagapahinungod man kini, nga sama sa, kaminyoon ug panagbulag. Apan nagapahinungod usab kini og daku nga bahin sa kaminyoon ug panagbulag, kon daw sa unsa nga

gipaningkamotan ni Pablo dinhi nga ihan-ay kita, ingon nga usa—ingon nga usa ka Iglesia, dili kita mahimong makigminyo sa kalibutan ug kang Cristo, sa mao rang higayon, ug—ug mamahimong legal ug uyon sa balaod mahitungod niana, maingon man usab nga ang usa ka babaye dili puedeng makigpuyo sa usa ka lalaki samtang aduna siya’y bana nga buhi pa. Ug aduna ako’y kaugalingong mga panghunahuna bahin niana, ug nagatoo ko nga kung unsay ginaingon sa Biblia mao gyud ang Kamatuoran.

³⁶ Karon, apan nagatoo ako, usab, sumala sa akong pagtoo, nga ginapadayag niini ang usa sa dagkung mga misteryo mahitungod sa maong propesiya. Ug nagalaum ko nga tabangan unta kita sa Ginoo, karong gabhiona, samtang ginahatud nato kini ngadto sa nagahulat natong mga kaigsoonan sa tibuok nasud.

³⁷ Gikaingon na, usa niadto ka higayon, (duna ko’y nabasahan, sa dihang naghimo ko og sinulat para niini, ako—dili ko na eksaktong mahinumduman ang maong libro kon diin kini gisulat, apan ako—sigurado ko nga tinuod kini), nga (basta usa kadto sa mga libro nga akong nabasahan mahitungod kang Mr. Moody, Dwight Moody, didto sa Chicago; aduna diay kita og usa ka dakung iglesia nga nagapaminaw usab, sa Chicago, karong gabhiona), gikaingon nga, si Mr. Moody, human kono nga nabasa niini ang Mga Taga-Roma 7, midagan siya sa kalsada, ug ang unang tawo nga iyang nahinagbo, giingnan niya kono ang maong tawo, “Nakaila ka ba sa grasya?”

Ug mitubag ang maong tawo, “Si kinsa nga grasya?”

Miingon pud si Mr. Moody, “Ang grasya sa Dios.”

³⁸ Ug, nalipay gayud siya niadto sa dihang iyang nasabtan kung unsa, daw sa unsa nga ang grasya mao’y nagpahimulag kanato gikan sa kasugoan, ug kung unsa, nga bahin ang gibuhad sa grasya. Bueno, karon, unsa mang butang nga gusto kong buhaton, sa dihang . . . kanunay kong ginasulti sa mga tawo, nga sa dihang malabang ko na ang utlanan, pag didto na ako sa pikas nga bahin, gusto kong motindog ug moawit:

Makahibulongang grasya! Pagkatam-is nga tingog,
Nga nagluwas sa usa ka alaut nga sama kanako!

Grasya, bilihong grasya!
Daghan pang grasya nga hibalong!

³⁹ “Tungod pinaagi sa grasya kita nangaluwas; dili pinaagi sa mahimo natong buhaton.” Bisan unsa pa’y mahimo nato, bisan unsa pa’y ginabuhad nato, wala kana ginaisip kanato. Tungod grasya man ang nagaluwas kanato. “Pinaagi sa grasya kamo naluwas, pinaagi’g pagtoo.”

40 Mahimo ko bang idugang sa niining Babayeng, si Grasya, mahimo ko bang ipahimutang Siya diha sa Biblia, usab, ingon nga gitawag nga piniling Babaye, kining si Gining Grasya nga akong pagahisgotan. Kabalo mo, nagapahayag ang Biblia, ang ingon, “Ngadto sa pinili nga Babaye.” Nga, kung inyong matikdan, ang pulong “pinili” nagagikan sa pulong nga “pinili nga Babaye.” Usa ka Babaye, taliwala sa tanang uban pa nga mga babaye, ang gipili.

41 Sama, sa ulay nga mao’y naghimugso sa lawas sa Dios, sa ibabaw sa yuta. Siya’y usa ka pinili nga babaye. Gipili sa Dios si Maria.

42 Ug, usab, nagpili ang Dios og usa ka pinili nga Babaye, nga mao’y Iyang Pangasaw-onon. Pinili Siya. Nagalaum ko nga mga kabahin kita niana, karong gabhiona, sa tibuok kalibutan, sa tibuok nasud, diay.

43 Ang maong paghulagway dinhi, nga ginapakita ang relasyon sa Pangasaw-onon diha kang Cristo, ang pinili nga Babaye: ug kung unsa nga pagadalhon Siya ngadto Kaniya; kon diin Siya magagikan; ug mao nga pagadalhon Siya ngadto Kaniya. Ang Iglesia dinhi, sa paghulagway nga atong makita, girepresentar pud sa usa ka babaye. Ingon nga, ang babaye sa kanunay mao’y tipo sa Iglesia, tungod kay giisip man ang Iglesia nga usa ka Pangasaw-onon. Usa ka Pangasaw-onon, Siya mao ang Pangasaw-onon ni Ginoong Jesus, nga Anak sa Dios.

44 Sa kanunay, kung inyong mamatikdan, mamatikdan n’yo ang mga kahimtang ug ang paggawi sa mga kababayen-an, ug makita mismo ninyo kung asa na ang iglesia.

45 Bueno, kini, ang pipila sa niini nga mga pahayag tingali’g kahibulongan para sa uban kaninyo, apan uyon kini sa Mensahe nga naangkon ko gikan sa Ginoo, nga ginapaningkamotan kong ihatud ngadto sa mga katawohan. Kita n’yo? Matikdi ninyo ang tanang butang sa natural, kung sa unsang paagi nagalihok, ang kinaiyahan, ug matikdi kini. Nagakatakdo kini sa espirituwal, usab.

46 Karon, kung inyong tan-awon ang paggawi sa mga kababayen-an sa kalibutan karong panahona, matikdi sab ninyo ang paggawi sa kalibutanon nga iglesia sa karong panahon. Matikdi lang ninyo. Bueno, sigurado, aduna usab og paggawi ang espirituwal nga Pangasaw-onon, ang Iglesia. Kita n’yo? Matikdi n’yo Kana, usab. [Blangko nga bahin sa teyp—Ed.] Tungod kay, ang natural nga iglesia, nagaankon man usab nga Pangasaw-onon.

47 Karon, kung mahimo tugoti kong isulti pag-usab dinhi sa lokal nga kongregasyon. Ayaw baya mo og kahiubos ha. Ako’y—nagapamulong ako ngadto sa tibuok nasud, ngadto sa, sa hunahuna ko, sa maong pinili nga Babaye. Busa kung mahitabo man nga dunay mga ministro dinhi, nga dili mouyon, bueno,

maghilum lang usà mo sa hamubo nga oras. Kita n'yo? Matikdi. Paminaw lang mo.

⁴⁸ Matikdi kini nga gawi. Pag makita ninyo ang mga kababayan-an nga nanagpatuyang na lang, ginabuhat ang bisan unsa na lang nga gusto nilang buhaton, matikdi, mao ra usab ang ginabuhat sa iglesia. Tan-awa.

⁴⁹ Apan matikdi pud, ang espirituwal nga Pangasaw-onon, pag mosugod na Siyang magkaaduna og rebaybal, sa dihang hinay-hinay na Siyang nagabalik ug ginapasubay ang Iyang kaugalingon sa Pulong sa Dios. Matikdi usab kung ingon-niana, nakita n'yo, nga ang mga Kasulatan, nianang panahona, aduna gayu'y usa ka Mensahe nga magakaylap aron sakgawon kana nga Pangasaw-onon, sakgawon kanang Babayeng, Pinili.

⁵⁰ Kay, sama sa kalibutan, si Satanas, ang manglilimbong nga mao'y naglimbong sa unang pangasaw-onon, aron makasala batok sa Dios, pinaagi sa dili-pagtoo sa Iyang Pulong. . .

⁵¹ Ug karon, niining panahona, sama sa makita nato sa iglesiang natural, sa inyong intelektuwal nga ebanghelyo, nga nagakahalayo ug nagakahalayo na sa Pulong, diha sa pangkatilingban nga ebanghelyo; makita nato ang mga kababayan-an sa kalibutan, sa mga kadalanan, nga mga miyembro sa ingon-niana, nanaggawi mismo diha sa mao gihapon nga kahimtangan. Dili na nimo sila masultihan. Bug-os na nilang giwala ang kaligdong, giwala na gyud sa mga tawo. Kita n'yo? Ug ingon niana usab ang nahitabo sa iglesia. Ug makita n'yo kini nga diretsong nagapaingon sa ekuminikanhong konseho, sa ingon ka sigurado sama sa unsa mang butang sa kalibutan, ug paingon na mismo sa Roma sa ingon ka paspas kutob sa mahimo niini, kita n'yo, tungod kay gipanagna na man kini. Ug mao nga ingon niana siya. Mao kana ang iyang linihokan.

⁵² Apan matikdi usab ang Iglestiang espirituwal, kung unsa nga kanang maong pundok sa mga tawo, nga mga tinawag-pagawas, ang maong Pinili, pinaagi sa matag rebaybal. Sa kang Martin Luther, mao usab ang nahitabo sa Repormasyon. Mao gihapon ang nahitabo sa panahon ni John Wesley. Mao gihapon ang nahitabo kaniadtong unang nagsugod ang Pentecostal. Gidala nila ang mga kababayan-an nga mahisubay pabalik sa Pulong, ug sa gihapon misimang sila pahilayo. Mao nga nagabalik siya mismo paingon sa kagubot. Apan sa higayon nga ang mga tawo andam nang mosubay, adunay nagaabot nga usa ka Mensahe, ug nagasubay sila Niini.

⁵³ Si Luther mao kaniadto ang mensahero sa usa ka panahon, mahitungod sa pagpamatarung, ug misubay niini mismo ang Iglesia, ang pipila kanila. Pero ang tanang uban pa kanila nanagpadayon ra. Miabot si Wesley nga dala ang pagpabalaan, misubay pud niini ang Iglesia. Miabot ang Pentecostes nga dala

ang pagpasig-uli sa mga gasa, misubay sab niini ang Iglesia, ang maong mga Pinili niadtong panahona; ug pagkahuman mipahilayo, og mibalik mismo sa denominasyonismo ug nanggawas kauban ang tanang uban pa kanila, silang tanan nga misunod.

⁵⁴ Karon, apan himatikdi ninyo, sa diha nga ang mga tawo andam na nga mosubay sa Pulong, aduna usab og nagaabot nga usa ka lab-as nga Mensahe gikan sa Pulong sa Dios, diretso mismo sa mga tawo. Ug ilang masabtan kana nga Mensahe ug mosubay gayud, sa tanang higayon. Anaa na kana diha sa Dios. . . Aduna kita niana.

⁵⁵ Aduna kita'y mga pamilya. Ang matag pamilya dinhi naanad na niana. Usahay maayo ra ang tanang butang para kaninyo, sulod sa daghang mga tuig. Dayon, sa kalit lang, nagaabot kamo sa panahon kon diin, ginasulti nato kini sa makadaghang higayon dinhi sa Habagatan, "Sa diha nga moulan, mobunok gayud," ug dili na maayo ang nagakahitabo tanan. Makasinati ka og kagabhion. Dayon adunay pagbanagbanag sa adlaw, pagkahuman kagabhion na usab. Ang tanang butang anaa gayud sa kahan-ayan.

⁵⁶ Ang propeta, nga si Pablo, nagaingon dinhi nga ang usa ka babaye dili puedeng magminyo pag-usab gawas kon ang iyang unang bana patay na. Dili siya puedeng magminyo pag-usab samtang buhi pa ang iyang unang bana; ang babaye, sa bisan unsa pa man nga sitwasyon, dili gayud puedeng magminyo pag-usab. Kinahanglan niyang magpabilin nga mag-inusara samtang buhi pa ang iyang unang bana. Ug kung buhaton man niya ang maong sala, "pagatawgon siya nga usa ka mananapaw." Nagahisgot ko karon mahitungod sa natural, aron itipo kini sa espirituwal. Kung kining babaye mobuhat sa ingon-anang pagpakasala, nan markado na siya ingon nga, "usa ka mananapaw," kung magkaaduna siya'y duha ka buhi nga bana sa mao rang higayon. Busa, gisurender niya, tungod sa pagbuhat niana, gisurender niya ang iyang mga katungod sa Dios ug sa Langit, tungod sa pagbuhat niana. Gisurender niya mismo. Mao nga sinalikway na siya gikan sa ekonomiya sa Dios, sumala sa mga Kasulatan nga bag-ohay ko lang gibasa.

⁵⁷ Mao usab ang iglesia, sa diha nga sulayan niyang isagol ang kredo ug denominasyon diha sa Pulong sa Dios. Dili siya puedeng makigminyo sa usa ka denominasyon, ug mahimong Pangasaw-onon ni Cristo, sa mao rang higayon. Kinahanglan niya ùna nga mahimong patay na ngadto sa usa o sa usa pa. Mao kana ang ginaingon sa kasugoan, dinhi. Aduna ma'y daghan kaayong kasugoan sa Pulong sa Dios. Ug mao kana ang Iyang kasugoan, og ginasulti ni Pablo ang mao rang butang dinhi. Dili siya puedeng makigminyo nga mamahimong iglesia sa kalibutanong kredo, ug mahimong Pangasaw-onon ni Cristo,

tungod kay siya . . . ang usa sukwahi man ngadto sa usa pa. Karon, hinumdumi.

Moingon, “Bueno, nagatoo man kami *niini*, pero wala kami nagatoo *Niana*.”

⁵⁸ Kung minyo ka na kang Cristo, si Cristo mao man ang Pulong sa Dios. Sa San Juan, sa ika-1 nga kapitulo, miingon, “Sa sinugdan mao na ang Pulong, ug ang Pulong kauban sa Dios, ug ang Pulong mao ang Dios. Ug mao usab ang nahimong unod ug nagpuyo ipon kanato.” Si Cristo mao ang buhi nga Pulong. Siya sa una pa mao na ang Pulong. Hangtud karon Siya gihapon mao ang Pulong. Siya sa kanunay mao gayud ang Pulong. Siya mao usab ang bugtong kapadayagan sa mga kinaiyahan sa Dios, kay Siya man mao ang Anak sa Dios.

⁵⁹ Ug ang si kinsa man nga anak nga lalaki mao’y mga kinaiyahan sa iyang amahan, ug sama lang usab nga anaa ka na sa semilya sa imong amahan, nga anaa na sulod sa lawas sa imong amahan kaniadtong usa pa siya ka batan-ong lalaki, anaa ka na kaniya. Hinoon, dili pa niya mahimong makig-fellowship kanimo, tungod kay wala pa man siya makaila kanimo. Apan, pinaagi sa tagoangkan sa usa ka inahan, gihimugso ka nganhi sa yuta ug nahimong anaa sa dagway sa imong amahan, dayon mahimo na niyang makig-fellowship kanimo.

⁶⁰ Ug mao usab kamong, mga anak nga lalaki sa Dios ug mga anak nga babaye sa Dios, sa wala pa kaniadto magkaaduna og bulan, mga bitoon, o kaha usa ka molecule. Kamo’y mga anak na nga lalaki ug mga anak na nga babaye sa Dios, kay kamo man ang bugtong pisikal nga kapadayagan sa mga kinaiyahan nga anaa sa Dios sa sinugdanan. Tungod, aduna lamang og usa ka porma sa Kinabuhing Walay Katapusan, ug kamo kana, kaniadto pa. Walay unsa man nga hingsayran mo mahitungod niini. Wala ka usab nasayod kaniadtong anaa ka pa sa kinasuloran sa imong yutan-ong amahan, apan napadayag ka sa . . . diha sa iyang dagway. Diha sa dagway sa Dios gibuhat ka, ug napadayag ka alang sa kahimayaan ug sa pagpakig-fellowship sa Dios.

⁶¹ Ug, busa, sa ingon ka sigurado nga ang imong pagkaliwat anaa na sa imong amahan, sa wala pa ang imong natural nga pagkahimugso, ang imong espirituwal nga pagkaliwat usab siguradong anaa na sa Dios kaniadto, tungod kay usa man ikaw ka kapahayagan sa mga kinaiyahan sa Iyang mga hunahuna, sa wala pa ang pagkatukod sa kalibutan. Husto. Wala na’y uban pa nga paagi. Husto kana. Karon, karon atong mamatikdan, kung ingon-ana, nga ang maong Kinabuhi anaa na kanimo, ang Kinabuhi sa Dios anaa na kanimo, sa wala pa ang pagkatukod sa kalibutan.

⁶² Bueno, karon, dili n'yo puedeng isagol ang denominasyonhong kredo diha sa Pulong, tungod kay kini sila sukwahi gyud kaayo, sa usa'g usa.

⁶³ Eksaktong ingon niana ang gisulayang buhaton ni Satanas ngadto kang Eva pinaagi sa iyang intelektuwal nga panghunahuna. Ingon niya . . . giangkong man niya nga gisulti gyud kadto sa Dios, apan ang ingon niya, “Sigurado gayud, dili kamo mamatay.” Kita n'yo? Ug mitoo pud sila niadto.

⁶⁴ Ug ingon niana ang gibuhat sa kredo, niining gabhiona. Gihimulag sa denominasyon ang mga tawo gikan sa Pulong sa Dios. Dili ba miingon si Jesus, kaniadtong mianhi Siya, “Kamo, tungod sa inyong tradisyon, gihimo n'yong walay epekto ang mga Kasugoan sa Dios ngadto sa mga tawo”? Ug tungod sa atong kredo, gihimulag pud nato ang pagpakig-fellowship sa Balaang Espiritu aron unta dihogan ang Pulong sa Dios nga gikatagana na alang niini nga henerasyon. Gihimulag mismo nato ang mga tawo, pinaagi'g denominasyon, aron dili sila magkaaduna og kahigayonan nga makita Kini.

⁶⁵ Bueno, ang Dios, Siya, sa matag henerasyon, nagadugang Siya og usa ka bag-ong bahin sa Iyang Basahon. Nagakatakdo Kining tanan.

⁶⁶ Sama ra sa pagkaporma sa akong lawas. Gikasulti kanako nga misugod kini sa dugokan, apan dili kini puro lang dugokan. Gikan dinha nagkaaduna og mga gusok, ug gikan sa . . . mga baga, ug hangtud sa mga kamot, ug mga bukton, ug mga tiil, ug uban pa, ug hangtud naporma kini nga mamahimong sa kung unsa ako sa karon.

⁶⁷ Ug sa ingon niana usab nga nadayag ang Dios sa sinugdanan. Ug sa katapusan nagpakita Siya ingon nga si Jehovah, ang Dios nga Amahan. Dayon nagpakita Siya ingon nga Dios nga Anak, pinaagi ni Jesus Cristo. Sa karon nagpakita Siya ingon nga Dios nga Espiritu Santo. Ang mao ra nga Dios, sa tanang panahon, tulo ka kapadayagan sa mao ra—mao ra nga Dios.

⁶⁸ Karon, atong hingsayran dinhi, nga, sa matag henerasyon, gibahin-bahin na sa Dios ang Iyang Pulong sa sinugdan pa lang.

⁶⁹ Sama ra sa pausbaw nga pagbuhat sa mga butang. Sama sa unang butang nga gilalang sa Dios, tingali, mao ang . . . Ingon ta nga gilalang Niya ang mga katanuman, una. Dayon gilalang Niya ang mga kahayopan, pagkahuman. Dayon gilalang na Niya ang tawo, pagkahuman. Mora kana og ebolusyon, pauswag nga paglalalang.

⁷⁰ Mao usab sa Dios ug sa Iyang Iglesia. Pagpamatarung ilalum sa panahon ni Luther. Pagpaba- . . . Pagpahigawas na sa Iyang Pangasaw-onon ang, sa karon. Ang paglalalang Niya sa Iyang Pangasaw-onon. Pagpamatarung sa panahon ni Luther; pagpabalaan sa panahon ni Wesley; ug uban pa, nakita n'yo. Siya, ang ebolusyon sa Espiritu ingon nga anam-anam Kini nga

ginahatag, tungod kay nagakaporma man ang Lawas, paingon sa Ulo, nga mao si Cristo, ang maong Lawas ni Cristo.

⁷¹ Karon, Siya, ingon nga usa ka babaye, kung kasal na Siya kang Cristo nga mao ang Pulong, nan dili na gyud siya puedeng makigminyo sa usa ka iglesiang denominasyon sa mao rang higayon, tungod kay nahigot na man Siya niini. Siya siguradong . . . dili gayud puedeng makigpuyo sa duha ka bana sa mao rang higayon. Tungod sukwahi man sila, sa usa'g usa. Ang usa mao'y pinadala-sa-Dios, ang usa usab mao'y hinimo'g-tawo, busa sukwahi gyud sila. Gikaingon, "Ang matag pulong sa tawo bakak; ang sa Ako mao'y Kamatuoran." Gisulti kana sa Dios.

⁷² Sukwahi gayud sila sa usa'g usa, sama ra sa kasugoan ug sa grasya, sumala sa ginahisgotan dinhi ni Pablo. Kinahanglan ùna nga patay na ang usa, aron makauban ang laing usa. "Ug kung sulayan niyang dunganon sila, pagatawgon siya nga usa ka mananapaw." Oh! Palandunga n'yo kini. New York, Arizona, og sa tibuok nasud, palandunga n'yo kini. Miingon ang Dios, "Kung sulayan niyang makigminyo ngadto sa duha sa mao ra nga higayon, pagatawgon siya nga mananapaw." Aduna ba diay mananapaw nga makasulod sa Langit? Makigminyo ba diay ang Dios sa usa ka mananapaw? Siguradong dili gayud. Ginaingnan Niya kita nga dili kana buhaton. "Pagatawgon siya nga mananapaw."

⁷³ Kung ingon-niana, ang iyang mga anak, kung usa siya ka mananapaw, nan ilehitimo ang iyang mga anak. Ilehito! Ilehito sa unsa? Dili sa iglesia, kondili sa Pulong. Siya'y ilehitimo mismo. Daw sa unsa nga paghulagway kining Pinadayag 3 dinhi, mahitungod sa kapanahonan sa iglesiang Laodicea sa kaulahiing adlaw! Usa gayud ka ilehitimo nga pundok! Usa ka denominasyong katipun-ogan! Mga dagaang, kung unsa na lang ang ginabuhat ug ginatawag gihapon ang ilang kaugalingon nga mga Cristohanon, ug ginasalikway ang Pulong sa Dios, "Adunay dagway sa pagkadiosnon, apan ginapanghimakak ang gahum niini," sumala sa gisulti sa propeta nga mamaingon niana gyud sila.

⁷⁴ Ang kaminyoon mao ang pinaka-karaan nga institusyon sa kalibutan. Ang kaminyoon unang gihimo, ug gipatuman, didto sa tanaman sa Eden kaniadto.

⁷⁵ Dunay gisalig ngadto sa usa ka babaye og pipila ka mga kinaiyahan nga kinahanglan dili niya pagahugawan. Gitugyan kana ngadto sa tawong babaye. Ngani wala gayud ni usa ka linalang sa yuta nga sama sa tawong babaye. Walay babayeng iro, walay babaye sa bisan unsa man nga matang, ang gikasaligan og kinaiyahan nga iya sa usa ka tawong babaye.

⁷⁶ Ang babaye wala man kaniadto sa—sa sinugdan sa paglalang, tungod kay nasayod man ang Dios nga mahulog

gyud ang tawong babaye. Ang tanang uban pa nga mga babaye dili man makahimo og pagpanapaw. Ang tawong babaye lang ang bugtong makahimo og pagpanapaw. Kung gibuhat pud siya nga sama sa orihinal, nan nahimo unta siyang kaulawan sa dakung kaalam sa Dios. Kita n'yo? Siya'y gibuhat lang gikan sa lalaki.

⁷⁷ Apan tungod kay gipahimutang siya diha niana nga bahin, gikahatagan usab siya og usa ka sagrado nga sugo gikan sa Dios, alang sa katubsanan. Aduna siya'y mga kinaiyahan nga kinahanglan dili niya pagahugawan.

⁷⁸ Kung dauton man niya ang maong mga kinaiyahan, nan siya'y nahugawan na sa tibuok niyang kinabuhi. Bisan pila pa siya ka higayon pasayloon, dili gihapon siya mahimong mapamatarung. Hisgotan ko kana pagkataudaud. Aduna ako'y Kasulatan bahin niana, sa pipila lang ka minuto. Hinoon mahimo siyang mapasaylo sa iyang kahugawan, apan dili siya mahimong mapamatarung dinhi niini nga kinabuhi. Kanunay kanang anaa na kaniya. Matikdi n'yo karon. Gikahatagan siya niini. Mahimo man siya nga mapasaylo, apan dili na mapamatarung.

⁷⁹ Gikahatag kaniya ang iyang lawas, ingon nga usa ka sagrado nga katungdanan gikan sa Dios. Walay babayeng iro, walay langgam, walay laing mananap, wala na'y ubang linalang nga sama kaniya. Wala. Siya lang ang bugtong ingon-niana. Tungod niini, siya'y. . . Ang hinungdan nga kini'y sagrado kaayo, maghimugso man gud siya og kinabuhi nganhi sa yuta. Ang iyang lawas mao man ang semilyahanan sa kinabuhi, busa mao kana'y hinungdan nga gikahatagan siya og ingon niining sagrado nga katungdanan.

⁸⁰ Karon dinhi kamo tingaling dili mouyon, daghan, kaninyo nga mga teologo. Mao kana ang naghugaw sa tibuok kaliwatan sa tawo, tungod nianang pagpanapaw sa sinugdan kaniadto. Nadaut ang iyang semilyahanan. Gihimugso niya kadtong mga kaluha, nga si Cain ug si Abel. Usa ra ka buhat, pero duha ka anak. Susiha n'yo ang mga Kasulatan. Uh-huh.

⁸¹ Matikdi n'yo karon. Hingsayran nato nga ang iyang lawas mao ang semilyahanan, ug mao nga usa kana ka sagrado nga katungdanan, nga dili angay'ng pagahugawan. Bueno, nagahisgot ako karon, nga ginahulagway kini, aron ipakita kaninyo kon asa napahimutang ang Iglesia. Wala baya ko nagahisgot mahitungod kaninyo nga mga kababayen-an. Unsa man kamo, anaa na kana tali kaninyo ug sa Dios, o kamong mga kalalaken-an usab. Apan nagahisgot ako mahitungod sa Iglesia ug kang Cristo.

⁸² Bueno, gikahatagan siya niini, aron maghimugso og kinabuhi nga ang Dios lang Mismo ang makahatag. Ang iyang bana mahimong mao ang tigdala sa semilya, apan ang Dios

lang ang makapagawas og kinabuhi. Husto. Kini kinahanglan magagikan, ang tanang kinabuhi siguradong nagagikan sa Dios. Ang bisan unsa man nga kinabuhi nagagikan gyud sa Dios. Kini'y gituis lang, ug mao kana ang nakapahimo niini nga makasasala, apan ang kinabuhi nagagikan gyud sa Dios. Siya man mao ang Tag-iya sa kinabuhi. Karon ang babaye adunay usa ka sag- . . . usa ka . . .

⁸³ Buut ko nga hinganlan ang tulo ka butang dinhi nga kinahanglan dili niya pagakalimtan. Karon, nagasulti ako, pero ibutang sa inyong hunahuna ang iglesia samtang nagasulti ko niini para sa natural nga babaye, sama ra ni Pablo dinhi, sa ika-7 nga kapitulo sa Mga Taga-Roma.

⁸⁴ Ang tawong babaye gipiyalan sa iyang Ginoo og usa ka sagrado nga katungdanan sa kaputli, nga usa ka kinaiyahan. Wala na'y laing nakabaton niini kondili ang babaye lamang. Oo. Gipiyal kana kaniya sa Dios. Kinahanglan gyud nga dili niya hugawan kana nga kaputli.

⁸⁵ Kung makabuhat man gani siya og usa ka butang nga sayup, nan kinahanglan niya ùnang isugid kana ngadto sa iyang bana adisir siya pangasaw-on sa maong lalaki, ug ihusto kana. Mao gihapon sa iglesia nga naikasal ngadto sa kasugoan, kinahanglan usab nga moduol sa atubangan ni Cristo, sa dili pa ipahigayon ang ikaduhang pagminyo. Kinahanglan niya ùnang isugid kana. Kay kung dili niya isugid, ug nakig-uban na siya sa iyang bana sulod sa napulo ka tuig ug diha pa magsugid nianang higayona, adunay katungod ang lalaki nga bulagan ang maong babaye ug mangasawa og laing babaye. Sumala kana sa Kasulatan. Mahugaw man gud nga pagkinabuhi ang pagpanapaw.

⁸⁶ “Jose, ayaw pagpanuko, sa pagpangasawa kang Maria nga imong asawa, kay kanang iyang gisamkon iya sa Espiritu Santo.” Nakahunahuna man gud si Jose nga bulagan si Maria sa hilum, kita n'yo, human niadtong nagsaad siya nga makigminyo kaniya. Ngani sa dihang nagsaad ka na nga makigminyo sa babaye, para sa Dios, minyo ka na sa maong babaye.

⁸⁷ Matikdi karon. Aduna siya'y usa ka sagradong katungdanan sa kaputli nga gikahatag kaniya, gipiyal kaniya sa Ginoo. Gihatag sa Dios kaniya kana nga kaputli. Sama ra kaniadto sa tanaman sa Eden, mahimo gihapon niyang moingon og “oo” o “dili.” Aduna siya'y sagradong katungdanan sa pagkababaye nga gipiyal kaniya, nga kinahanglan dili niya pagalapason. Ang pagkababaye nga akong ginahisgotan dinhi mao ang iyang paggawi, ang iyang kinaiya taliwala sa mga kalalaken-an. Ingon nga dili ginatugotan ang matag lalaki . . .

⁸⁸ Matikdi n'yo kining mga salida sa sinehan ug makita n'yo kining mga artista nga nagapakighalok, ug nagagakus, ug nagabirig-birig, ug nagakari-karinyo, sa niining mga kababayen-an. Ang usa ka babaye nga nagabuhat niana, aduna

gyu'y dautan nga kinaiyahan. Tingali'g putli siya, sa ubang paagi. Apan, kita n'yo, sa iyang kasingkasing. . . Ingon nga, ang mga glandula, ang mga glandula sa pakighilawas, anaa diha sa mga ngabil. Mao nga ang lalaki nga nagahalok sa usa ka babaye, siya sa tinuod lang, potensyal, nang nakapanapaw. Ang mga glandula sa pakighilawas anaa man sa mga ngabil sa babaye ug sa mga ngabil sa lalaki. Mahimong halokan sa lalaki ang babaye diha sa kamot, dili kana makapakonektar sa ilang mga glandula sa pakighilawas. Tungod anaa man sa mga ngabil ang mga glandula sa pakighilawas. Ug makita n'yo kining tanan nga mga kabuang sa—sa Hollywood karong panahona, kining tanan nga pagbirig-birig ug pagkari-karinyo sa mga kababayan-an, ug uban pa, ug ginatan-aw kana tanan sa mga batang babaye. Dili ikatingala nga ang atong moralidad daut na ug dunot na, ug pagkahugaw na gyud, kita n'yo, tungod kay ginapasundayag man kana diha sa atubangan sa mga kabataan. Tinuod. Pero mamahimong ingon niana man gayud sa kaulahiing adlaw.

⁸⁹ Karon hunahunaa n'yo ang iglesia. Nagapakighalok ug nagabirig-birig sab siya, ug nagauban-uban sa tanang uban pa gawas sa Pulong, ginapasulod na ang yawa, ug edukasyon ug siyentipikanhong mga pagtuki, ug uban pa.

⁹⁰ Sa dihang, ang siyensiya, edukasyon, og tanang ingon-niana, bug-os man gyud unta nga sukwahi sa Dios. Ang kinatibuk-ang sistema sa sibilisasyon nga aduna kita karon bug-os gayud nga anticristo. Ang sistemang pang-edukasyon anticristo. Ang sibilisasyon anticristo. Sukwahi kini sa Dios. Moingon mo, “Sukwahi sa sibilisasyon?” Magkaaduna man ang Dios og usa ka sibilisasyon, usa sa niining mga adlaw, nga wala na'y unsa mang kamatayon nga nahilambigit niini. Kining moderno nga sibilisasyon nagagikan man kang Satanas. Pamatud-an ko kana kaninyo, kon itugot sa Ginoo, karong gabhiona, pinaagi sa Biblia. Ang tanan niining mga butanga iya gayud ni Satanas. Pero ang atong bag-ong sibilisasyon wala na'y ingon-niini didto.

Aduna siya niining sagrado nga pagkababaye.

⁹¹ Dili ikatingala nga ingon niana ang pagpanglihok sa mga kalalaken-an diha sa mga kababayan-an, tungod kay ingon niana man sab manglihok ang mga kababayan-an diha sa mga kalalaken-an. Nagagawi siya dinha nga nagasul-ob og purol, ug hugot kaayo, nga mga bisti nga iya sa lalaki ug mga ingon niana, diha sa dalan, nagakiaykiay pa. Bisan unsa pa'y isulti niya, mahimong ingon gayud siya kaputli ngadto sa iyang bana, apan, sa atubangan sa Dios, “Siya'y usa ka mananapaw.” “Ang si kinsa man nga nagatan-aw sa babaye nga may pangibog kaniya nakapanapaw na uban kaniya sa iyang kasingkasing.” Tungod ginapasundayag man niya ang iyang kaugalingon nga ingon niana.

Ug eksaktong ingon niana mismo ang gibuhat sa iglesia uban sa kalibutan.

⁹² Himatikdi. Gipiyal kana kaniya: ang sagrado nga kaputli, sagrado nga pagkababaye, ug ang sagrado nga pagka-inahan, para pasidunggan ang iyang bana.

⁹³ Tan-awa lang ninyo sa karong panahon. Sa mga siyudad, sa daghang mga siyudad, aduna na gani sila'y dagkung mga pagparty-party sa ginatawag nilang kapunongan, ang mga miyembro sa iglesia, usab. Ibutang nila ang ilang mga kalo diha sa salog, ug mangahubog silang tanan ug iitsa ang ilang mga susi diha sa kalo. Mangadto pud ang matag babaye ug kuhaon ang susi gikan sa maong kalo, para sa lalaki nga iyang ikauban hangtud sa katapusan nianang semana. Tanan nang matang sa mga pagparty-party! Diin, daghan pa kaayo ko'y isulti dinhi, kon itugot sa Ginoo, pero wala lang ko'y igong panahon aron maghisgot niana. Grabe nga kahugawan!

⁹⁴ Ug ang iglesia ingon na gayud ka dautan, oo, nagapanapaw sa tanan nang butang, ug wala man unta siya'y katungod nga makighilambigit niana. Kinahanglan siyang magpabilin sa Pulong.

⁹⁵ Okey man ang mga bilding. Okey man sab ang mga ospital. Okey man ang tanan niining uban pang mga butang. Ang mga programang pang-edukasyon, okey usab kana. Tungod kinahanglan pa man natong magkinabuhi dinhi, kinahanglan natong makabasa, og makasulat. Usa kana sa mga pamaagi.

⁹⁶ Sama ra, nga dili man sab nato gikinahanglan magsul-ob og unsa man nga mga sinina, sa sinugdan. Magwali ako mahitungod niana, human niining semanaha, kon itugot sa Ginoo. Apan gikinahanglan natong magsul-ob og mga sinina tungod kay gihatagan man ta sa Dios og sinina. Pero, sa sinugdan, wala gyud ta magkinahanglan niana. Tungod nataptapan man ta kaniadto.

⁹⁷ Karon nataptapan ang babaye sa iyang sala. Wala gani siya kahibalo nga nagapakasala siya, kita n'yo, sama ra kung unsa siya kaniadto. Tungod sa . . . Sa karon gitaptapan siya sa yawa; kaniadto gitaptapan siya sa Dios. Mao kana ang kalahian.

⁹⁸ Bueno hingsayran nato nga gikahatagan siya niining sagrado nga sugo nga kinahanglan dili niya pagalapason: mahitungod sa iyang pagkababaye, panggawi, pag-amping sa iyang kinaiya, pagpadaku sa iyang mga anak, og mahimong halangdon ngadto sa iyang bana.

⁹⁹ Pero karong panahona, wala na kaayo sila gahatag og unsa mang pagtagad bahin niini. Adto gani mo usahay sa akong opisina ug makita n'yo ang mga kalalaken-an nga ginadala ang ilang mga asawa, tungod ginatinguha na sa niining mga babaye nga magpasig-uli sa Dios ug ginasugid ang mahitungod sa tanang mga lalaki nga ilang gikapuyo-puyo, ug tanan nang uban pa, sukad niadtong gikasal sila. "Oh," moingon mo, "kana'y . . ."

Dili. Mga Pentecostal kana sila. Uh-huh. Ayaw mangadto ang uban. Busa kini'y . . .

¹⁰⁰ Ginahisgotan ko kon sa unsang paagi nga mapahilayo, ang iglesia, pagmosugod na kamong magpakighugoy-hugoy sa kalibutan, ug sa tanang mga urog ug mga ingon-anang butang nga aduna kita. Ngani dili na kita sama sa orihinal nga Pentecostal kaniadto maingon sa kalahian sa adlaw ug gabii. Napahilayo na kita sa kon asa man, paingon sa tumang kangitngit kon asa man, ug nangahisalaag na.

¹⁰¹ Pagkasagrado gayud nga sugo! Pagkahalangdon nga katungdanan para sa usa ka babaye! Karon nasabtan n'yo na kon nganong usa siya ka tipo sa Iglesia, nga aduna usab og mao ra nga katungdanan. Maingon nga ang usa ka babaye adunay sagrado nga katungdanan sa iyang pagka-inahan, sa iyang mga kaputli, sa iyang bana, mao gihapon ang Iglesia nga aduna usab og sagrado nga katungdanan sa pag-ampo ug sa Pulong, ug kang Cristo, sama gayud sa babaye.

¹⁰² Ug sama sa usa ka babaye nga nagapakigkuyog-kuyog sa ubang lalaki; nagakasimang usab ang iglesia tungod niining mga programang pang-institusyon, ug sa pagtukod og mga programa ug mga eskwelahan, ug uban pa. Wala ko'y unsa man nga batok niana. Maayo man kana. Aduna pud kini og mga katuyoan. Apan dili gayud sila . . .

¹⁰³ Si Jesus wala man sukad miingon, "Panglakaw kamo, og pagtukod og mga tulonghaan." Ang ingon Niya, "Iwali ang Pulong."

¹⁰⁴ Dinha nila Kini nasayloan. Wala man giingon nga magtukod og mga institusyon, mga ospital, ug uban pa. Hinoon maayo man kana, apan dili kana mao ang katungdanan sa Iglesia. Ang ilang katungdanan mao ang pagwali sa Ebanghelyo, apan gibuhat na nato ang tanang uban pang butang gawas niana. Ug nanggisimang na kita, sama ra sa gibuhat ni Satanas, nga gisagolan kini og lahi nga Ebanghelyo, lahi nga butang, ug lahi na pud nga butang, hangtud nga nahimo na kining usa ka katipun-ogan sa mga walay kapuslanan. Grabe na nga pagkadaut, bisan sa tibuok natong, sa tibuok kalibutan! Matikdi n'yo ang urog sa kalibutan.

¹⁰⁵ Akong nabasa sa *Reader's Digest*, dinhi dili pa lang dugay, kon diin ang mga batan-on pa nga mga kababayen-an naga-menopos na kono, ug ang mga kalalaken-an usab, anaa na sa kausaban sa kinabuhi, nga mga baynte ug baynte-singko anyos pa lang ang panuigon. Nagakahamtong na sila. Nagakadaut na (Ngano man?) tungod kini sa siyentipikanhong mga pagtuki mahitungod sa pagkaon ug mga butang nga gipang-usab na, gikan sa natural nga mga butang nga angay unta natong kaonon para sa atong lawas. Mao nga kita wala na'y lain kondili usa na lang ka pundok nga nagakaut-ut og nagakadunot.

¹⁰⁶ Karon, ingon niana ang iglesia, usab. Anaa na kini sa mao ra nga kahimtang.

¹⁰⁷ Pero usa Siya ka tipo. Aduna Siya og mao rang bililhon nga mga kinaiyahan nga iya sa Espiritu, nga gikahatag Kaniya, aron ipapabilin ang Espiritu ug ang Pulong, ug para dili gayud makahimo og pagpanapaw sa bisan unsang butang nga iya sa kalibutan o unsa man. Aron magpabilin nga putli sa Pulong, sama sa usa ka babaye nga kinahanglang magpabilin nga putli ngadto sa iyang bana. Usa kini ka sagrado nga sugo, nga tahuron ang Pulong sa Iyang Ginoo nga labaw sa tanang kredo nga hinimo-sa-tawo, kaalam, og denominasyon. Gikahatagan og ingon-ana nga sugo ang Iglesia.

¹⁰⁸ Kung moingon sila, “Bueno, ang akong iglesia . . .” Dili ko igsapayan kung unsa ma’y ginatooan sa inyong iglesia. Kung sukwahi kana sa Pulong sa Dios, nan pahilayo mo niana.

¹⁰⁹ Ang Biblia miingon, “Si Jesus Cristo mao sa gihapon kagahapon, karon, ug hangtud sa kahangturan.” Miingon pud ang Marcos 16, “Kini nga mga ilhanan maganunot kanila nga nagatoo.” Kung ang usa ka iglesia nagawali og lahi kaysa Niana, nan ayaw ninyo toohi. Angay nga mamatay kamo sa niana nga butang. Kinahanglan n’yong matawo pag-usab, ngadto sa Pulong sa Dios. “Panglakaw kamo sa tibuok kalibutan ug iwali ang Maayong Balita sa tanang binuhat.” Ingon niana ka halayo ang madangatan Niini. “Kini nga mga ilhanan maganunot kanila nga nagatoo, sa tibuok kalibutan, ug sa tanang binuhat nga magatoo.” Kita n’yo kung daw sa unsa nga mipahilayo na kita Niini? Oo. Busa may katungdanan Siya Niini.

¹¹⁰ Apan karon tan-awa, ang Hollywood, kung unsa nga giwagtang na niini ang maputli nga mga gawi sa atong mga kababayen-an.

¹¹¹ Ania ako nga gatan-aw sa minahal nga tigulang nga babaye, si Igsoong babayeng Schrader, og sa daghang mga kababayen-an nga ania dinhi, ug dinha sa luyo, ug si Igsoong Moore sab dinhi dapit, og ang tigulang na nga mga babaye nga makahinumtum pa sa mga tuig nga nanglabay. Kung ang ilang inahan kaniadto, o bisan sila, makita nga nagalakaw-lakaw diha sa kadalanan, nga ang mga sul-ob sama sa niining mga kababayen-an nga nagalakaw-lakaw karong panahona, ingon nga mga miyembro sa iglesia, siguradong gipriso na sila ingon nga mga buang-buang. “Nakalimot siya nga magsul-ob og sayal.” Aba, kung pagkabuang-buang kana kaniadto, nan pagkabuang-buang gihapon kana sa karon.

¹¹² Bueno, tan-awa n’yo, ang tibuok kalibutan nagapamatuod mismo nga pagkabuang—buang kana. Tan-awa n’yo ang mga pagpamatay ug mga ingon-anang butang nga nagakahitabo karon sa kalibutan. Kita n’yo? Grabe na nga pagkabuang!

113 Ang tibuok butang nagapaingon na sa katumanan sa Pinadayag. Tingali'g mahisgotan nato kana, niining semanaha. Diin, ang maong makalilisang nga mga butang, dili kana sila natural. Kana'y espirituwal nga mga butang, nga magpahimo sa mga tawo nga managpaninggit ngadto sa dagkung mga bato ug sa mga bukid, ug sa tanan nang uban pa, aron unta nga mangalumpag diha kanila.

114 Ang bug-os, og tumang pagkabuang nga pagadanganan niining kalibutan, sa dili madugay, halos ania na kini karon. Aba, makita man ninyo ang mga lakang niini. Tan-awa. Kini—nagalakaw kini dinha sa dalan nga ingon niana, paingon mismo sa lingkoranan sa simbahan, bug-os na gyud nga pagkabuang, nagabuhat og mga butang nga dili gani mahunahunaang buhaton sa usa ka tawong sibilisado.

115 Tan-awa n'yo kung unsa'y gibuhat sa Hollywood sa mga babaye. Tan-awa n'yo kung naunsa na kini. Giwagtang na niini ang sagrado nga mga kinaiyahan sa babaye. Daghan pang sama niini, nga puede natong hisgotan. Kita n'yo?

116 Kining tanan nawala niya. Unsa ba'y hinungdan nga iya kining nawala? Tungod kay aduna ma'y usa ka malinglahon nga instrumento nga gitawag og iglesia, sama kaniadtong anaa sa tanaman sa Eden. Usa ka malinglahon nga linalang, nga mao ang yawa, nga misulod sa iglesia sama sa iyang gibuhat kaniadto sa tanaman sa Eden, ug gilimbongan ang babaye pinaagi niini. Nalimbongan siya. Nagadahum ang babaye . . . wala man gituyo sa babaye kaniadto nga masayup.

117 Wala gituyo ni Eva nga makabuhat og sayup. Dili kadto tinuyo. Apan siya . . . Ang Biblia miingon, diha sa Ikaduhang Timoteo, Unang Timoteo 3, “Nalimbongan siya.” Ug pag *nalimbongan* gani dili kini ingon nga gituyo mong buhaton kana. Nalimbongan ka lang mao nga gibuhat mo kana.

118 Ug eksaktong ingon niana gayud ang nahitabo karong panahona. Nalimbongan siya, sa telebisyon, sa magasin, sa niining mga tawo, niining, tanan na niining makadani nga mga butang nga ilang ginaanhaan, dinha sa dalan. Ang modernong mga kabataang babaye, nagatan-aw sila og mga magasin ug nagatan-aw sila og mga salida. Nagatan-aw sila sa dalan. Makita nila ang mga sinina diha sa mga tindahan. Daw sa unsa nga si Satanas, kanang dakung instrumento sa—sa impiyerno, mikanaug sa taliwala sa mga tawo ug gilimbongan sila ngadto niining mga butanga! Ug ang babaye nagadahum nga okey lang siya. Pero diay patay na siya ug wala mahibalo niini. Halayo na siya sa Dios. Kita n'yo na kung unsay hinungdan nga nawala niya kining tanan, ug kung unsa ka malinglahon kadto?

119 Karon, gusto ko nga inyong matikdan. Naghisgot na si Jesus mahitungod niini. Usab, kung gusto ninyong basahon kini, gihisgotan ni Jesus nga mahitabo kini nga butang (Nasayod ba

mo niana?) sa Iyang kaulahiang mga takna kaniadto, sa wala pa ang Iyang pagkalansang. Basahon usa nato kining, San Lucas, ang—ang ika-23 nga kapitulo, ug sa makadiyut lang, nga sama sa usa ka leksyon pang-Sunday school. Magsugod tà sa ika-27 nga bersekulo, nagatoo ko nga ako nang namarkahan dinhi. Paingon na si Jesus kaniadto sa Kalbaryo. Paminaw mo samtang ginabasa ko kini. Sige. San Lucas 23:27, nagatoo ko nga, dinha nato kini mabasa. Ingon niana man ang akong naisulat. Oo. Ania na.

Ug misunod kaniya ang usa ka dakung panon sa katawohan, ug . . . mga babaye, nga nanaghilak ug nanagminatay tungod kaniya.

Apan si Jesus sa milingi kanila miingon, Mga anak sa Jerusalem, ayaw kamo paghilak tungod kanako, hinonoa panghilak kamo tungod sa inyong kaugalingon ug tungod sa inyong mga anak.

Kay, tan-awa, ang adlaw—mga adlaw nagasingabot na . . . nga sila manag-ingon, Bulahan hinoon ang mga apuli, ug ang tagoangkan nga wala makasamkon, ug ang mga suso nga wala kasus-i.

¹²⁰ Palandunga n'yo, sa karong panahon, kaulawan na para sa babaye nga makabaton og anak. Kita n'yo?

Unya mosugod sila sa pag-ingon ngadto sa mga bukid, Tumpagi kami; ug bu- . . . ug sa mga bungtod, Tabuni kami.

Kay kon ginabuhat nila kini sa kahoy nga lunhaw, unsa kaha'y ilang pagabuhaton sa usa ka laya?

¹²¹ Nagahisgot kini mahitungod sa adlaw sa dihang ang mga kababayan-an dili na gustong makabaton og mga anak. Gusto nila og iro o kaha iring, o butang nga sama niana, apan dili na niya gusto og mga anak. Ngano man? Siya'y mahimo na konong “Tigulang nga Inahang Hubbard” kung magkaaduna siya'y anak. Kita n'yo? Mao nga ayaw gyud niya. Mao kana—mao kana ang ginasulti sa Hollywood. Ayaw man gud niini nga ang iyang kababayan-an mamahimong usa ka “Tigulang nga Inahang Hubbard.” Busa ang babaye, ang lalaki magpa-opera siya mismo o ang babaye, o ang usa kanila, aron nga dili sila magkaanak. Ayaw man nila nga makabaton og mga anak.

¹²² Gisulti na ni Jesus ang mahitungod niini. Ug unsa ma'y gisulti Niya? “Nianang panahona mosugod sila sa pagsinggit ngadto sa dagkung mga bato ug sa mga bukid aron unta ‘Mangalumpag diha kanila.’”

¹²³ Mohimo siya og mga paagi nga dili magkaanak, aron makaadto gihapon siya sa mga pagparty-party. Dili man siya puedeng madisturbo tungod sa bata nga nagasuso kaniya. “Kana'y makapadaut kono sa iyang pigura. Pag maburos siya, maghinungdan kono kini, nga madaut ang iyang pigura. Dili

na siya pareho sa kung unsa siya kaniadto.” Ug ang bana sab, ingon gayud ka walay-hibangkagaan nga pasagdan ra ang iyang asawa nga mamaingon niana. Ayaw niyang hatagan og anak ang iyang bana.

¹²⁴ Gisulti na ni Jesus ang mahitungod niini. Ug ingon Siya, nga—nga, sa dihang nagabuhat na sila niini, nan nianang panahona mosugod silang managpaninggit ngadto sa dagkung mga bato aron unta mangalumpag diha kanila. Mao na kana ang Pag-abot sa Ginoo.

¹²⁵ Nagagasto pud sila og dagkung mga kantidad sa kuwarta para sa mga iring, mga iro, aron amumahon nga mora na og anak. Tinuod kana. Anak niya mismo unta ang angay niyang amumahon, tungod kay usa man kana ka kinaiyahan nga hinatag-sa-Dios para kaniya.

¹²⁶ Akong namatikdan. Ingon nga nagapangayam ko og dagkung mga hayop. Ang usa ka inahang oso inig tinglagas nga panahon sa tuig, pag naipasanay na siya ngadto sa laking oso, nan aduna na’y mga batang oso nga iyang ihimugso. Medyo dagkuon kini nga mga batang oso, siguro motimbang pud og usa ka gatus ka libra o sobra pa. Iya kining pang-abogon aron mangatulog ra kini mismo sa panahon sa tingtugnaw, tungod kay maghimugso pa man siya og dugang pa nga mga batang oso. Mahimugso sila matag Pebrero. Pero walay unsa man nga nahibaloan ang mga oso mahitungod niini.

¹²⁷ Mahimugso sila nga naputos sa mora og gamay’ng mga sudlanan. Pagka-kahibulongan gani nga ginapaablihan sa Dios kanila kining gagmay’ng mga sudlanan, nga sila ra mismo, gamay’ng. . .mora’g gamay’ng selopin nga sudlanan. Sila mismo kabalo kung unsaon paggawas gikan nianang sudlanan. Samtang hinanok kaayo ang ilang inahan. Wala pa siya’y gikaon nga bisan unsa sukad Oktubre, ug hangtud Pebrero. Mangduol ang mga batang oso ug mosuso kaniya hangtud pa sa tunga-tunga sa Mayo.

¹²⁸ Dayon pag makita na niya ang iyang mga batang oso, nga medyo dagku na sila, motimbang na tingali og kinse, diyes o kinse ka libra ang kada usa. Nagasuso ra sila kaniya. Kung sa unsang paagi nga nagkaaduna siya’y gatas, ideya na kana sa Dios. Basta nagakinabuhi ra siya, mismo, ug nagapasuso og gatas para sa mga batang oso.

¹²⁹ Ug dayon kung wala pa siya magsamkon, ug wala na siya’y mga batang oso, nan iyang pangitaon kadtong sa miaging tuig. . .kadtong mga batang oso sa miaging tuig, ug amumahon sila sa tibuok panahon sa ting-init, tungod kay iya man kanang kinaiyahan nga hinatag-sa-Dios. Mao nga aduna gyud siya’y amumahon.

¹³⁰ Ug kung ayaw sa usa ka babaye nga magbaton og usa ka anak para sa iyang bana, mao nga mag-alima na lang siya og iro

o kaha iring, o unsa man. Para lang nga aduna siya'y amumahon. Kinaiyahan niya kana. Apan ang maghimugso og anak para sa iyang bana, ug padakuon kini alang sa pagpangalagad sa Dios, kana'y bug-os gayud nga wala sa iyang interes. Siya siguradong. . . Oh, siya'y—oh, siya'y maulawan gayud, kung maghimugso man siya, ngadto sa iyang mahigugmaon sa sala nga kapunongan sa niini nga matang sa mga kababayen-an sa 1965.

¹³¹ Usa kini ka tinuod nga hulagway sa modernong iglesia karong panahona! Dili usab gusto sa modernong iglesia nga maanaa sa iyang palibot ang bisan unsa sa niining, mga bata sa Mga Buhat 2:38 nga, nanaghugyaw, nanagsinggit, nagasulti og laing mga pinulongan. Oo. Oo. Kita n'yo? Oo. Ayaw niya kining mga batang nagahugyaw, ug nagahilak, ug nagasinggit og, “Amen! Alleluyah!” Aba, ang ingon-ana man gud nga bata siguradong makapalagpot gyud kaniya sa gilayon gikan sa iyang denominasyon. Pag aduna man gud sila og usa ka ingon niana sa usa sa ilang mga iglesia, aba, ipalagpot nila siya sa gilayon.

“Nganong ginatugotan mo man nga magpadayon ang ingon-anang butang?”

¹³² Busa, nakita n'yo na, aduna siya'y butang nga ginasamkon, tungod kay kanunay man siyang nagahimugso og mga miyembro. Apan ayaw niya nianang mga pagsinggit, pagsiyagit, pagkutab-kutab, Mga Buhat 2:38, nga sa hunahuna niya sila'y talamayon nga mga linalang. Siguradong maulawan siya niana. Madaut kono siya niana ug ang iyang edukado, etikal, og siyentipikanhong kapunongan sa iglesia nga iyang gipamiyembrohan dinhi. Ipalagpot gyud nila siya, diha sa sunod nga konseho. Dili siya puedeng magbaton niini. Busa dili niya gusto nga maburo sa Pulong, tungod kay mao lang man kana nga matang ang puedeng ihmugso sa Pulong.

¹³³ Ang natawo sa Espiritu sa Dios, anaa ang Espiritu sa Dios sa kinasuloran niini. Walay pagpamiyembro sa iglesia nga basi sa intelektuwal ug pagsunod sa kredo, pinutlan ang buhok, pinintalan ang nawong; wala gyu'y mga ingon nianang butang sa kinatibuk-an Niini. Dili n'yo kana makaplagaan sa Pulong sa Dios. Ang makaplagaan n'yo mao ang usa ka kinaraan, gipabalaang, anak nga puno sa Espiritu Santo, natawo sa Espiritu sa Dios, nga nagasinggit, nagahugyaw, nagasiyagit, og nagadayeg sa Dios.

¹³⁴ Ang mga ingon niana bug-os gayud nga wala kaniya. Dili man niya gusto Kana. Oh, dili, sir! Dili, gayud. Unsa ma'y ginabuhat niya kung ingon niana? Nagahimugso siya og kaluha, nga pinintalan ang nawong, nagasul-ob og purol, kapunongan nga iya ni Jezabel, ilehitimo nga “mga iring,” sumala sa tawag nila niana, nagatoo kong mao kana. Kita n'yo? Sa hunahuna ko ginatawag nila kana nga mga iring. Kita n'yo? “Tan-awa n'yo

kanang iring nga gapaingon didto,” ang ingon nila, o mora’g ingon niana, kabalo na mo.

¹³⁵ Natawo siya, o minyo, og konektado pa sa una niyang bana, ang unang Adan, tungod sa mananapaw nga asawa, nga si Eva, ang unang asawa ni Adan. Moingon mo, “Mananapaw?” Ingon-ana bitaw siya. Apan, oh, ginapamahayag diay niya nga kining Adan, kining unang Adan, patay na kono. “Oh, tinuod, patay na siya dugay na nga panahon ang milabay. Pero natawo na man ko, pag-usab,” ingon ang babaye, “ug sa tinuod lang minyo na gani ako sa Ikaduhang Adan, nga si Cristo, ang Pulong.”

¹³⁶ Giunsa man? Matikdi n’yo kung unsa ang iyang ginahigugma. Tan-awa ang iyang hinigugma, kon gusto ninyong mahibaloan kung kang kinsa siya nahigugma. Ingon *Niini* ang ginasulti sa Pulong, apan ang ingon niya, “Ingon *niini* man gud ang ginasulti sa akong iglesia.” Kung ingon-niana kang kinsa man siya nahigugma? Si kinsa man ang iyang bana? Ang kaugalingon niyang mga bunga nagapamatuod mismo kung unsa siya. Tinuod gayud, nagapakita kana kung unsa siya. Himatikdi. Nahimugso siya, una, kang Adan, tungod kay mao man kana ang iyang natural nga pagkahimugso. Kita n’yo? Ug wala gyud siya sukad mibiya niana. Mao kana ang nagahigugma sa kalibutan. Ginapamahayag niya nga nahimugso kono siya sa ikaduhang higayon, kang Cristo. Apan ang iyang hinigugma, matikdi n’yo, si Adan, man gihapon, tungod kay ginahigugma man niya ang kalibutan.

¹³⁷ Ug ang usa pa—usa pa ka butang, matikdi n’yo kung unsa nga matang sa mga anak ang iyang ginapanganak. Nagasulti kana kung kinsa ba gyud ang ilang amahan, ang unang Adan ba o kaha ang Ikaduhang Adan. Kung maghimugso ang Iglesia og usa ka anak nga iya sa Ikaduhang Adan, magagawi gyud kana nga sama sa kung unsa ang paggawi sa Ikaduhang Adan, sama sa ilang paggawi kaniadtong Adlaw sa Pentecostes. Ingon niana gayud ang tinuod nga mga anak sa Ikaduhang Adan. Kita n’yo? Oo. Pero ang ilang kinaiyahan sama ra gyud sa maong lalaki ug babaye. Oo, sir. Ang iyang mga anak nga babaye, pinintalan ang nawong, pinutlan ang buhok, nanagsul-ob og bisti nga iya sa mga lalaki, mga karsones. Nagsulti baya kaniya ang Biblia nga “dili kana buhaton.” Pero ginapaputlan gihapon niya ang iyang buhok. “Makauulaw para kaniya nga buhaton kana.”

Moingon mo, “Paghilum na, mahitungod niana.”

¹³⁸ Pero mao kana ang ginaingon sa Pulong. Ginapakita ko lang ang iyang kinaiyahan. Ingon niana man ang ginabuhat niya.

¹³⁹ Ang iyang mga anak usab, ang mga anak nga iyang gihimugso, nagasalig sa edukasyon, sa pag-eskwela, diha sa ginatawag, nga usa ka eskwelahan pang-Biblia, gitooan nga usa ka dugay nang inila nga kolehiyo, kon diin sila ginalumluman hangtud mapiso, diha sa daw usa ka matang sa

incubator. Mga mahilig og denominasyon, mga relihiyoso nga sama ni Cain, pero ilehitimo gayud sa Pulong sama kang Cain kaniadto; husto, ingon gayud ka ilehitimo sama kang Cain, oo, mga mahilig og denominasyon. Nakita n'yo na kung unsa kini?

¹⁴⁰ Wala baya sukad nag-organisa ang Dios og usa ka denominasyon. Siya sa una pa batok na gyud niana. Ang Iyang Pulong batok gayud niana.

¹⁴¹ Apan nagapanghawid ra gihapon sila niana, mao nga makita ninyo kung unsa ang ilang ginahimugso. Nagapakita pud kana kung kinsa ang ilang papa ug mama. Eksakto. Eksakto. Ingon gayud ka ilehitimo sama kang Cain kaniadto. Ingon niana nga matang sa anak ang gipamunga sa serpente pinaagi kang Eva. Mipahilayo man sila kaniadto sa Pulong, busa tan-awa n'yo kung unsa ang gihimugso ni Eva. Eksaktong ingon niana usab ang gihimugso sa iglesia, mao gihapon.

¹⁴² Mapamatud-an ko kana kaninyo, pinaagi sa Pulong, nga dinha naggikan ang edukasyon ug ang sibilisasyon, pinaagi kang Cain. Eksakto gayud. Kay ginapamahayag nila . . . Apan ilang—ilang ginapamahayag nga sila kono'y mga anak sa Dios, pero gipanganak diay sila sa denominasyon, nahimong mga eskolar sa pang-denominasyon nga eskwelahan, og tanan nang uban pa. Eksakto gayud. Malinglahon, og makinaadmanon! Grabe! Mao man usab ang serpente, nga ilang amahan. Husto. Ingon usab ka malinglahon ug siyentipikong mga magwawali nga sama kang Cain kaniadto. Kita n'yo? Mao ra gayud.

Moingon mo, “Igsoong Branham, tinuod ba kana?”

¹⁴³ Ablihi ang Genesis 4:16 ug hibaloa. Baliki n'yo dinhi sa Genesis 4:16, sa makadiyut lang, og inyong mahibaloan kung giunsa pagkahitabo niana.

Ug mipahawa si Cain . . . sa atubangan sa GINOO, ug mipuyo sa yuta sa Nod, sa silangan sa Eden.

Ug giila ni Cain ang iyang asawa; ug kini siya nanamkon, ug nag-anak kang Enoch: ug nagtukod siya og usa ka lungsod, ug gihinganglan ang lungsod, nga sunod sa . . . iyang anak nga, Enoch.

¹⁴⁴ Hangtud ngadto sa kang Tubal, og sa uban pa, tungod hinay-hinay silang, nahimo nga mga magbubuhay og mga instrumento, musika, ug uban pa. Miabot ang sibilisasyon pinaagi ni Cain, oo, nanagtukod sila og mga siyudad, mga instrumento. Ang siyentipikong mga tawo naggikan sab kang Cain, nga mao ang binhi sa serpennte. Karon matikdi n'yo ang ika-25 nga bersekulo:

Ug giila pag-usab ni Adan ang iyang asawa;

¹⁴⁵ Bueno, giila niya si Eva sa makausa ka higayon ug nakabaton kini og duha ka anak. Susiha n'yo ang Kasulatan. Gipanganak

niya si Cain ug si Abel. Usa ra ka buhat, pero duha ka anak. Moingon mo . . .

¹⁴⁶ Giingnan nila ako, dili pa lang dugay, nga dili kono kana mahimong, mahitabo. Aduna na man gani tà og usa ka panghitabo sa Hollywood. Sa Hollywood? Aduna na kita og usa ka panghitabo didto sa Tucson sa karon, nga ginakaso pa sa korte. Dunay usa ka babaye nga nanganak og usa ka itum nga bata ug usa ka puti nga bata, sa mao rang higayon. Ginaingon nila nga dili kono kadto puedeng mahitabo sa maong babaye. Pero puede siyang magkaaduna og duha ka himsog nga itlog, usab. Ginakaso pa nila kini karon didto sa korte. Nasayod ko nga puede kana sa mga iro. Puede kana sa mga hayop. Ug miadto didto ang maong babaye, miingon ang tawong puti, “Sustentuhan ko lang ang kaugalingon kong anak, pero dili kanang usa.”

¹⁴⁷ Ug nagsugid na ang babaye. Nakighilawas kono siya sa iyang bana niadto nga buntag, ug sa itum nga lalaki na sab pagkahapon. “Kung nahitabo kana sulod sa,” ang ingon sa doktor, “sulod sa baynte-kuwatro ka oras, nan mamahitabo kana kung aduna og usa pa ka himsog nga itlog dinha.” Ug mao kadto ang iyang gibuhat.

¹⁴⁸ Ug eksaktong ingon niana sab ang nahitabo kaniadto. Si Cain niadtong . . . si Satanas, niadto nga buntag, nga anaa sa serpente; ug si Adan, na sab pagkahapon niadto. Sa diha nga si Eva . . . Ug nakabaton siya og duha ka anak.

Bueno, *giila pag-usab ni Adan ang iyang asawa*, (sa ikaduhang higayon); *ug kini nanganak og usa ka anak nga lalaki*, . . .

¹⁴⁹ Hinumdumi n’yo, wala gayud bisan asa sa Biblia nga gikaingon nga si Cain anak ni Adan. Ang gikaingon, “Siya’y iya niadtong maong dautan,” dili iya ni Adan kondili, “iya sa yawa.”

. . . *giila ang iyang* (sa ikaduhang higayon), *ug giila . . . ug nakabaton og usa ka anak nga lalaki, ug gitawag ang iyang ngalan nga Seth: Kay ang Dios, miingon siya, nagtudlo kanako og . . . (Dili pa kadto ang mismong Binhi.) . . . nagtudlo kanako og usa ka kaliwat nga ilis ni Adan, nga gipatay ni Cain. Busa . . .*

Ug kang Seth, usab natawo ang usa ka anak nga lalaki; ug gitawag niya ang iyang ngalan si Enos: ug unya ang mga tawo nanagsugod sa pagtawag sa ngalan sa GINOO.

¹⁵⁰ Dili kang Cain, naggikan kana nga kaliwatan, kondili naggikan kini sa kaliwatan ni Seth.

Busa, “Si Cain ang maong dautan.” Dinha miagi ang mga iya sa serpente.

151 Karon himatikdi. Klarong ginaingon dinhi sa Biblia, nga, “Ang iyang unang bana kinahanglan ùna nga patay na,” dili ingon nga nagbulag lang. Siya kinahanglan ùna nga patay na.

152 Bag-o ra kong nahuman og wali mahitungod sa *Kaminyoon Ug Panagbulag*, ug nasayod na kamong tanan mahitungod niana. Wala ako nagapamulong karon, nga dinhi lang, niining kongregasyon dinhi, kondili sa tibuok nasud usab. Oo. Bueno hingsayran na ninyo kung unsay nahitabo kaniadto, diha sa *Kaminyoon Ug Panagbulag*. Sa dihang kini . . . ? . . . Naablihan na man ang Pito ka Selyo, og dinha nahipadayag ang tinuod nga Kamatuoran mahitungod niini.

153 Busa, aron nga maikasal ngadto sa Ikaduhang Adan, si Cristo, ang Pulong, kinahanglan n’yo ùna nga ihimulag ang inyong kaugalingon pinaagi’g pagkamatay, gikan sa inyong unang denominasyong bana, tungod kay wala ma’y bisan usa kanila nga makadawat sa kinatibuk-ang Pulong sa Dios. Ipakita n’yo kanako kung hain kanang maong usa. “Oh,” moingon mo, “ang sa akoa.” Isulti pud sa usa pa ka tawo ang sa iyaha, usab. Pero pag hiusahon gani sila, ug inyong masayran nga pareho ra diay kamong sayup, sa diha nga maghimo na kamo og denominasyon. Basaha n’yo ang Pinadayag 17. Ug, inyong makita, nga kinahanglan n’yo ùna nga mamatay gikan nianang butanga.

154 Karon, wala ako nagapamulong nga dinhi ra sa niining lokal nga panagtigum. Nagapamulong usab ako ngadto sa tanan sa tibuok nasud. Kinahanglan ùna nga patay na kamo sa inyong unang bana. Kung nahiusa kamo kang Cristo ug minyo pa gihapon sa usa ka denominasyon, nan usa kamo ka mananapaw. Taga-Laodicea gyud diay kamo.

155 Ingon nga usa ka Iglesia sa tibuok nasud, nanagsunod kita kang Jesus Cristo, ang Pulong. Aron nga mahiapil sa Pangasaw-onon, kinahanglan mo ùna nga maminyo pag-usab ngadto sa Pulong sa Dios, nga mao si Cristo. “Sa sinugdan mao na ang Pulong; ang Pulong kauban sa Dios, ug ang Pulong mao ang Dios. Ug ang Pulong nahimong unod ug nagpuyo ipon kanato.”

156 Sa diha nga nagapanghawid gihapon kamo sa tradisyon sa mga denominasyon sa tawo, nan ginatawag kamo, diha sa Pulong sa Dios nga, “usa ka mananapaw.” Basta mahilig kamo og denominasyonghng kredò, miyembro sa usa ka denominasyonghng iglesia nga ginapanghimakak ang Pulong, nan kamo’y “usa ka mananapaw,” ang ingon sa Biblia.

157 Miingon si Jesus, “Dili kamo mahimong moalagad og duha ka dios sa mao rang higayon. Ang Dios ba ang inyong ginaalagaran o kaha ang bahandi.” Ang *bahandi* mao “ang kalibutan.” “Siya nga nahigugma sa kalibutan, o sa mga butang nga iya sa kalibutan, ang gugma sa Dios wala man lang diha kaniya.” Ang Binhi sa Dios dili mahimong anaa diha kaniya sa

mao rang higayon (ang gugma sa Dios) kon anaa usab kaniya ang gugma para sa kalibutan. Sa diha nga nagapamuhat ang Binhi sa Dios pinaagi kanimo, mao kana ang Pulong sa Dios. Mao nga ang gugma para sa kalibutan dili gyud mahimong anaa sab dinha sa mao rang higayon. Karon asa man ang mga mugbo og buhok, ug ang mga purul, ug ang pinintalan nga mga nawong? Karon asa man kana?

¹⁵⁸ Dili kamo mamahimong putli kang Cristo, sa Pulong sa Dios, ug usab nagaalagad kamo sa usa ka denominasyon nga hinimo'g-tawo sa parehong higayon. Sukwahi kana sa Pulong. Gisulti dinhi ni Pablo. "Asa man?" Sa Mga Taga-Roma 7.

¹⁵⁹ Dili usab kamo makapahimugso og mga anak nga iya sa Dios, sa Iyang Pulong, ngadto niining ilehitimo nga pundok sa denominasyon. Dili kana mamahimo. Diha sa inyong incubator, dili kamo makapahimugso og usa ka anak nga Pulong sa Dios. Nagapamulong ako sa iglesia. Apan sa gihapon ginapamahayag ninyo nga kamo mga relihiyoso kaayo. Mao usab si Cain kaniadto, ang anak sa bigaong si Eva, relihiyoso pud kaayo, nagtukod siya og mga halaran ug naghimo'g halad, ug nagbayad og iyang ikapulo ug gibuhat ang tanang butang nga ginabuhat sa bisan kinsa man nga relihiyosong tawo. Apan napakyas siya nga tumanon kadtong Pulong. Napakyas siya nga makabaton og kapadayagan.

¹⁶⁰ Ug ang kapadayagan lang ang bugtong butang, ang kapadayagan sa Pulong. Unsa man ang... Unsa ba ang kapadayagan? Ang ingon ni Jesus, "Sa ibabaw niining bato pagatukoron Ko ang Akong Iglesia, ug ang mga ganghaan sa hades dili gayud makabuntog Niini." Ang Pagtoo usa ka kapadayagan; tungod kay ang Pagtoo gikapadayag man kanimo.

¹⁶¹ "Si Abel, pinaagi sa pagtoo, naghalad pinaagi sa kapadayagan (pagtoo), naghalad ngadto sa Dios og usa ka labing maayong halad kaysa kang Cain."

¹⁶² Nagdahum man gud si Cain nga mga mansanas kadtong gikaon sa iyang ginikanan. Hangtud karon aduna gihapon sila niana nga ideya, apan dili kadto ingon niana. Kondili usa kadto ka pagpanapaw, binhi sa serpente. Ug sa dihang naablihan ang Pito ka Selyo, gipahayag ug gipamatud-an kadto. Bag-o pa lang naipagawas ang akong libro bahin niana. Sa hunahuna ko aduna na kita og usa ka libo dinhi karon. Kita n'yo? Himatikdi. Kana'y sumala gayud sa Kasulatan, gikan sa Genesis hangtud sa Pinadayag.

¹⁶³ Sa katapusang panahon, ang maong duha ka punoan mopaingon na sa pagka-binhi ug pamatud-an ang ilang mga kaugalingon. Ania na kita, nianang panahona mismo, sa Laodicea ug sa Pangasaw-onon, nga ingon ka klaro ug ingon ka tataw diha sa Kasulatan, ug anaa na sa inyong atubangan mismo. "Dili n'yo mahimong alagaran ang Dios ug

ang bahandi.” Dili kamo mamahimong putli nga Cristohanong magtotoo sa Biblia ug nagapakighilambigit gihapon sa mga denominasyonhong butang. Dili n’yo gayud kana mahimo sa mao rang higayon. Ang usa kinahanglan ùna nga patay na, ug aron mabuhi ang laing usa.

¹⁶⁴ Dili kamo makapahimugso og anak nga Pulong sa Dios. Dili usab makapahimugso niana ang iglesia. Ayaw man nila og usa sa nianang, mga anak nga nanaghugyaw, nanagsinggit ug nagasulti og laing mga pinulongan, ug tanan na nianang mga butanga. Sila, dili n’yo kana puedeng buhaton sulod sa usa ka denominasyonhong iglesia. Dili gyud nila kamo dawaton. Dili man ingon niana ang ilang ginahimugso. Dawaton nila sila ug lamanohon sila ug moingon, “Kung nagatoo ka, nadawat mo na Kini. Basta napalista mo na ang imong ngalan diha sa libro, kana lang ang kinahanglan mong buhaton.” Kita n’yo? Mao nga—Mao nga sila’y ilehitimo gayud nga mga anak sa Pulong, pero nagapamahayag gihapon nga mga relihiyoso kono.

¹⁶⁵ Busa, buros siya sa kaalam ug kahibalo ni Satanas, ang iglesia! Ginapaeskwela nila ang ilang mga miyembro ngadto sa tulonghaan, aron makakat-on kung unsaon sa pagsulti og “amen” nga husto. Ginatudloan nila sila kung unsaon sa pagsulti ang tanan niini, ug aron mamahimong intelektuwal kaayo. Unsa man kana? Ang pagpaburos sa yawa. Sa unsa ba nga paagi naburosan ni Satanas si Eva? Pinaagi sa dili-pagtoo sa Pulong, aron mamahimong intelektuwal, mga kahibalo, ug gidaut niini ang tibuk kabuhatan. Eksaktong ingon niana usab ang iyang gibuhay sa Pulong karong panahona, ang maong iglesia. Naburosan siya tungod sa mga eskwelahan pang-Biblia ug mga kolehiyo, ug mga ingon nianang butang, pagbasa, pagsulat, arismetik, ug wala na sila’y nahibaloan mahitungod sa Dios sama sa usa ka Hottentot nga walay nahibaloan mahitungod sa kabalyerong Egiptohanon. Hingsayran nila ang tanan nilang mga kredo, ang ilang mga basahon sa pagpangadye, ug tanan nang uban pa, apan wala gyu’y unsa man nga hingsayran mahitungod sa Dios.

¹⁶⁶ Hinoon hingsayran nila sa diha nga gipanghimatud-an ang Pulong, sa dihang namulong ang Dios kaniadto ug gitagana ang Iyang Pulong para sa matag henerasyon sa diha nga nangabot ang mga niini. Ngani miabot si Noe kaniadto, ug nagwali siya niadto nga henerasyon.

¹⁶⁷ Bueno, unsa kaha kung miabot si Moises kaniadto, og miingon, “Magbuhay ta og usa ka arka”? Siya’y bug-os gayud nga wala na sa panahon. Apan usa man siya ka propeta. Aduna siya’y kapadayagan sa Dios.

¹⁶⁸ Gipanghimatud-an kadto sa Dios ingon nga mao ang Kamatuoran. Gipahigawas Niya ang mga anak, sa Israel, ug gipakita ang Haligi nga Kalayo sa ilang atubangan, ug

gipanghimatud-an ang maong propeta; ug gisulti sa eksakto kung unsay Iyang buhaton, ug gibuhat Niya mismo kadto.

169 Miingon sila, “Ayaw na pasultiha ang Dios. Si Moises na lang ang pasultiha, aron kami dili mamatay.”

170 Ingon sa Dios, “Dili na Ako mosulti ngadto kanila sa ingon niana, apan magpatungha Ako para kanila og mga propeta, ug sila na ang magasulti.”

171 Atua mitindog si Isaias kaniadto, nga miingon, “Usa ka ulay ang manamkon.” Ang usa ka tawo nga sama kaniya niadtong adlaw sa dihang. . . Unsaon man pagsamkon sa usa ka ulay? “Alang kanato ang usa ka Anak natawo: ang usa ka Bata natawo, ang usa ka Anak gikahatag. Ang Iyang Ngalan pagatawgon nga, ‘Magtatambag, Principe sa Pakigdait, Dios nga Makagagahum, ang Amahan nga Walay Katapusan.’ Sa trono sa Iyang amahan, nga si David, Siya magahari. Walay katapusan ang Iyang Gingharian.” Unsaon man pagkahitabo niadto? Wala siya mahibalo. Basta gipamulong lang niya kung unsay gisulti sa Dios. Ngani lagpas na kadto sa unsa man nga imahinasyon, sa kahibalo. Lagpas na kadto sa bisan unsa man nga siyentipikanhong pagtuki. Pero mao man kadto ang Pulong sa Dios.

172 Karon ginatudloan na nato ang atong mga magtutuon sa seminaryo og tanan nang matang sa teolohiya sa Biblia ug mga ingon nianang butang, teolohiya nga hinimo-sa-tawo, mao nga nahimo na kining usa ka pundok sa iglesia nga tukma gayud sa Laodicea, sama sa gikaingon sa Dios nga mamahitabo. Oh, grabe! Pagmakita ko kana, ug mangurog gayud ako. Naburosan og intelektuwal nga mga panghunahuna! Kinahanglan mo ùna nga makagraduwar kono og high school adisir ka pa makasulod. Kinahanglan mong magkaaduna. . . kinahanglan mo ùna nga maeksamin kono sa usa ka psychiatrist adisir ka pa mahimong ordenahan.

173 Mahunahuna n’yo ba sila ni Pedro, Santiago, ug Juan nga magpaeksamin ùna sa usa ka psychiatrist? Mahunahuna n’yo ba nga ang maong usa ka gatus ug baynte kaniadto, dili gani makasulat sa kaugalingon nilang ngalan? Magpaeksamin pa hinoon sa usa ka psychiatrist, aron hibaloon kung sila ba’y. . . kung ang tanan ba nilang. . . kung husto ba gyud ang ilang mga panghunahuna, ug uban pa? Aduna sila’y panghunahuna, apan dili kadto intelektuwal nga panghunahuna o sumala sa siyentipikanhong pagtuki. Kondili pinaagi kadto sa Gahum sa Dios. Sa dihang miabot Kadto kanila, wala na sila’y hingsayran nga buhaton gawas sa pagbuhat sa kung unsay gisulti sa Espiritu Santo nga buhaton. Wala na nila panumbalinga ang si kinsa man nga intelektuwal, kung unsa man ang gisulti sa iglesia, ug kung unsay gisulti sa mga sacerdote, kung unsay gisulti

niini, og gisulti *niana*. Nanaglihok sila pinaagi sa Espiritu; mga kalalaken-an nga walay-gikahadlokan.

¹⁷⁴ Sa Unang Juan 2:15, ang Dios miingon, “Kung nahigugma kamo sa kalibutan, o sa mga butang nga iya sa kalibutan, ang gugma sa Dios wala man lang diha kaninyo.” Kita n’yo? Busa unsaon man ninyo nga maburos sa Pulong sa Dios nga nagakondena sa kalibutan, nagakondena sa Hollywood, nagakondena sa tanang mga urog niini, nagakondena sa tanan niining mga pagparty-party ug ingon-anang mga pagpatuyang, ug sa kung unsa pa man nga ilang ginapahigayon sa ngalan kono sa relihiyon? Ginakondena gyud Niini kana. Wala gyu’y paagi nga maburos sa Pulong ang usa ka tawong: ang usa ka babaye nga mubo ang buhok, pinintalan ang nawong, nagasul-ob og purol?

¹⁷⁵ Unsaon man sa usa ka magwawali, nga nag-eskwela dinhi sa usa ka seminaryo, ug mobasa diha sa Mga Buhat 2:38 ug makita nga wala gyud ni usa ka tawo sa Biblia ang gikabautismohan sa maong mga titulo, ug unya moingon pa nga naburos kono siya sa Pulong sa Dios? Nagasulti ra siya og bakak kaninyo! Gibaligya na niya ang iyang pagkapanganay. Nakapanapaw na siya batok sa mismong Butang nga iyang ginawali. Gibulagan na siya, gidiborsyohan na.

Pero magkaaduna gayud ang Dios og usa ka putli nga Iglesia, nga eksaktong, usa ka Pangasaw-onon.

¹⁷⁶ Miingon ang Biblia, “Ang Pulong wala diha kaninyo.” Busa unsa diay nga matang sa mga bata ang inyong ginahimugso? Buros na nga mga denominasyon. Ingon nga wala pa’y kamatayon nga mao’y magpahimulag unta kaninyo gikan sa inyong unang hinigugma.

¹⁷⁷ “Unsa na lang kaha’y hunahunaon sa mga Jones kung mohilak ako ug mosulti og laing pinulongan? Unsa kaha’y ilang hunahunaon kung mabautismohan ko pag-usab?” Pagkawalay-hinungdan! Naminyo ka ba ngadto sa mga Jones? O, naminyo ka ngadto sa iglesia? O, naminyo ka ba kaha ngadto kang Cristo, ang Pulong?

¹⁷⁸ Karon, mao kana’y hinungdan nga nagahimugso gihapon siya og mga anak. Unsa man nga matang sa mga anak ang aduna siya? Ania ang pipila sa ilang mga ngalan nga ilang ginatawag sa karon: cats, beatles, monsters, mga Ricky, mga Ricketta. Cats, beatles, mga miyembro kana sa iglesia. Tinuod. Silang tanan mga anak niya, mga anak ni Cain, nga mga anak usab sa maliputon nga mananap, ingon niana usab sila ka mga malinglahon.

¹⁷⁹ Karon tan-awa n’yo og maayo sa makadiyut, ang inyong kalag, gamit ang kaugalingon ninyong espirituwal nga panabut. Tan-awa n’yo mismo. Nagapamulong ako sa tibuok nasud karon. Tan-awa n’yo sa pipila lang ka minuto, kamong mga anaa dinha

sa Branham Tabernacle, kamong mga anaa sa mga tabernakulo diha sa West Coast, ug Arizona, ug bisan asa man kamo. Tan-awa n'yo ang inyong kaugalingon sa pipila ka minuto. Moingon mo, "Kanang Mensahe nga imong ginawali, Igsoong Branham, sayup kana." Tan-awa n'yo ang inyong kaugalingon sa makadiyut. Tugoti ang Balaang Espiritu nga susihon ang inyong mga hunahuna pinaagi sa Pulong, kon mouyon ba kamo sa Mensahe. Tugoti si Cristo, ang dinihogan nga Pulong, nga susihon ang inyo mismong konsensiya. Tugoti Siya nga mosulod kaninyo, og tan-awa kung husto ba Kana o dili. Ug usa o duha lang kana ka butang nga akong ginasulti, diin aduna pa unta ko og daghan niini.

¹⁸⁰ Nagauyon ba ang Biblia sa usa ka babaye nga nagapaputol sa iyang buhok? [Nagaingon ang kongregasyon, "Dili."—Ed.] Nagatoo ba ang Biblia, nagauyon ba Kini sa tulo, ka pagbautismo diha sa ngalan sa "Amahan, Anak, Espiritu Santo"? ["Dili."] Wala gayu'y ingon-anang butang. Nagauyon ba ang Biblia sa babaye nga magsul-ob og bisti nga iya sa lalaki? ["Dili."] Bueno, palandunga lang ninyo kanang tulo, diin adunay daghan pa kaayo. Susiha n'yo kana diha sa Kahayag sa Pulong sa Dios.

¹⁸¹ Moingon mo, "Usa man ako ka miyembro sa iglesia." Mao usab si Cain kaniadto. Mao usab si Eva. Ginapropesiya sa Biblia, nga sa kaulahiing mga adlaw, nga mamaingon niana usab ang Laodicea.

¹⁸² Tugoti ang Balaang Espiritu nga susihon ang inyong konsensiya, ug mouyon gyud kamo sa Daniel 5:12, sa dihang miduol ang rayna kaniadto sa atubangan ni Belsasar, ug miingon nga nakaplagan niya kono nga adunay usa ka propeta, si Daniel, nga atua sa taliwala nila, ug siya mao'y tigsulbad sa mga pagduhaduha. Tugoti ninyo ang Balaang Espiritu, Siya man mao ang Propeta sa niining panahon, tugoti Siya nga mosulod sa inyong kasingkasing karon mismo ug mangsusi pinaagi sa Pulong sa Dios, ug ang mga pagduhaduha n'yo mahitungod sa Mensahe bug-os gayud nga mawagtang. Ginawagtang Niya ang tanang mga pagduhaduha. Mahibaloan ninyo, nga kini'y tukma gayud sa Pulong alang niining panahon.

¹⁸³ Dili na man ninyo puedeng iwali ang mensahe ni Luther sa karong panahon. Hinoon kabahin kadto Niini, apan mao kadto ang mga tiil. Uh-huh. Uh-huh. Dili n'yo na puedeng iwali ang sa kang Wesley. Dili na sab puedeng iwali ang sa Pentecostal. Milagpas na kaayo kita niana. Nangahimo na sila og denominasyon ug nangamatay na. Sila mao ang lindog.

¹⁸⁴ Ang lindog mitungha uban sa dahon, mao kana ang unang hugna sa iglesia. Pero, dili kana kapareho sa unang lugas nga nailubong sa yuta, nga mao ang trigo.

185 Ang ikaduhang mitungha mao ang pollen. Pero dili gihapon kana kapareho sa lugas. Medyo halos kapareho lang niana. Pero mas nagakapareho na sa hulagway sa tinuod nga lugas. Apan ang mga dahon dili gayud kapareho sa lugas nga nailubong niadto yuta. Tigdala ra kini sa kinabuhi nga anaa mismo sa lugas. Apan unsa ma'y gibuhat niini? Naghimo kini og denominasyon, sama lang sa tanang uban pa nga kinaiyahan nga nagakatukma niini. Namatay kini.

186 Dayon unsa na man? Ang kinabuhi mopaingon mismo ngadto sa uhay. Aduna kini'y daghang gagmay'ng—gagmay'ng mga liso-liso nga anaa niini, nga mora og gagmay'ng—gagmay'ng mga lugas. Mora na kini og tinuod nga lugas, apan dili diay.

187 Dayon nagapaingon kini ngadto sa pagka-tipaka. Ug unsa ma'y ginapatungha niini? Ang tipaka.

188 Karon, pagmokuha ka og usa ka lugas sa trigo, sa dihang mogitib na ang trigo. Ug miingon si Jesus, “Usa ka lugas sa trigo . . .” Ug pagkuhaon mo kanang trigo ug ablihan kana. Pag imong tangtanganon kini gikan sa lindog. Imo kanang tan-awon. Moingon ka, “Aduna na kami og lugas sa trigo.” Magbantay kamo. Mora na gayud kana og lugas, apan wala pa'y ni usa ka tipik sa lugas dinha. Ang tipaka ra diay kana.

189 Mao kana ang mga Pentecostal, “Halos mao na gyud,” sumala sa gikaingon sa Mateo 24:24, “pagalimbongan ang mismong mga Pinili sa kaulahiing mga adlaw, kon mahimo pa.” Apan pag inyong tangtanganon ang mga panit, wala gyu'y unsa man nga lugas. Ang mismong lugas sunod pa lang diay niana. Kita n'yo?

190 Ug dayon mogawas ang Kinabuhi gikan nianang denominasyon, og mopaingon na sa lugas. Dayon unsa ma'y mahitabo? Sa dihang hinay-hinay na nga modaku ang trigo, ug ingon na ka daku sa nagaputos Niini, nan nagahimulag na pahilayo Niini ang denominasyon. Ngano man nga wala na kita nagkaaduna og denominasyon gikan Niini? Dili na gyud magkaaduna pa. Tungod anaa na man Kini sa pagka-lugas. Wala na'y mosunod Niini. Ania na kita sa katapusang panahon. Busa unsa na ma'y kinahanglan Niini nga buhaton karon? Ang mabulad diha sa Presensiya sa Anak, aron mahinog, eksakto, ang Pulong kinahanglan nga mahinog diha sa kinasuloran sa inyong kasingkasing, aron mamunga ug ikinabuhi kung unsay atong ginapamahayag. Oo, sir.

191 Dayon dili na kamo magkaaduna pa og mga pagduhaduha, kung tugotan lang ninyo ang Balaang Espiritu nga ipadayag Kini kaninyo, sama niadtong gisulti sa rayna mahitungod kang Daniel.

192 Tingali'g moingon mo, “Unsa ba'y kahilambigitan niini sa pagpasalamat? Unsa man gyu'y imong ginahisgotan, Igsoong Branham? Ania, kinse minutos na lang baya para mag-alas

nuebe. Pero wala ka pa'y unsa man nga gisulti mahitungod sa pagpasalamat." Pagkaanindot nga Mensahe kini alang sa maong okasyon, para kanako! Oo, mao gayud.

¹⁹³ Ngani ang magpapanaw natong mga amahan kaniadto mapasalamaton kaayo tungod sa ilang bag-ong hingkaplagaan nga pamaagi sa pagkinabuhi. Ingon nga nahimulag na sa kanhing mga denominasyon ug kredo niadtong didto pa sila sa Inglatera, mahimo na silang maminyo ngadto sa bag-ong dinihogang Pulong alang sa ilang panahon; tinuod kana, ang bag-ong dinihogang Pulong sa ilang panahon, alang sa ilang adlaw kaniadto.

¹⁹⁴ Mao nga mapasalamaton gayud kita, ingon nga mga magpapanaw usab, sama ni Abraham, nga nahimulag na kita gikan sa mga butang nga iya sa kalibutan, og sa tanan natong mga kaubanan. Si Abraham usa man ka magpapanaw kaniadto. Gihimulag na kita sa Dios gikan sa tanang patay na nga mga relihiyon. Nagapamulong ako sa tibuok nasud karon, gihimulag na kita gikan sa tanang patay na nga mga kredo. Ug para sa unsa man? Gihimulag kita, ug giablihan para kanato ang usa ka bag-ong yuta, usa ka bag-ong Mensahe alang niining panahon.

¹⁹⁵ Nauga ug namatay na ang Pentecostal, sama ni Luther, ni Wesley, ug sa tanang uban pa kanila. Kini wala na'y lain kondili usa na lang ka pundok sa mga kaiglesiahan nga gipanghiusa. Aduna man usab og mga maayong tawo dinha, pero, kinahanglan nga mogawas sila dinha.

¹⁹⁶ Unsa ma'y gibuhay sa Dios? Giablihan Niya ang Pito ka Selyo sa kaulahiing Mensahe. Namatikdan ba ninyo kadto? Ang Pito ka Selyo, ingon nga, ang tanang mga misteryo sa pito ka kapanahonan sa iglesia naselyohan man og Pito ka Selyo. Walay panahon ang mga repormador aron sa pagbuhay niini sa ilang mga adlaw kaniadto. Tungod wala man sila nabuhi sa igong gidugayon. Apan kining mapanalanginong kapadayagan sa Pito ka Selyo, giablihan kini para kanato sa niining kaulahiing mga adlaw, pinaagi sa usa ka propesiya nga gikahatag didto sa Arizona.

¹⁹⁷ Gipangutana ko gayud ang Dios, niadtong miaging adlaw, "Unsa ba'y Imong buhaton kanako dinhi niining disyerto?"

¹⁹⁸ Nasayod ba mo nga si Moises ang nagsulat sa Bag-ong Tugon...o ang Daang Tugon? Siya mismo ang nagsulat. Gihatag diha sa nahaunang upat ka Basahon ang mga kasugoan mahitungod sa tanang butang: Genesis, Exodo, Levitico, ug Deuteronomio. Gisulat niya ang Daang Tugon. Aron nga mabuhay kana, gikinahanglan niya kaniadto nga biyaan ang tanan niyang mga kauban ug mga mahal sa kinabuhi, ug moadto sa kamingawan.

¹⁹⁹ Si Pablo sab ang nagsulat sa Bag-ong Tugon. Husto kana. Gisulat niya ang Mga Taga-Roma, ug ang Mga Taga-

Roma ug ang tanan nang uban pa Niini kaniadto, ang Mga Hebreohanon ug Timoteo, ug uban pa. Ug aron nga mabuhat kana, gikinahanglan niya kaniadtong ihimulag ang iyang kaugalingon, ug moadto sa Arabia, didto sa disyerto, sulod sa tulo ka tuig, aron madawat ang kapadayagan sa Dios.

²⁰⁰ “Oh,” moingon mo, “unsa man diay sila ni Mateo, Marcos, Lucas, ug Juan?” Mga manunulat ra sila nga gisulat lamang kung unsay mga gibuhat ni Jesus.

²⁰¹ Mihimulag si Pablo ug gihan-ay ang Pulong. Husto kana. Bueno, kung ingon-ana, tan-awa n’yo, kung gikinahanglan nila, nga moadto sa kamingawan, ug mahilayo sa ilang mga mahal sa kinabuhi . . .

²⁰² Mahinumduman n’yo ba ang, *Unsa Na Kaha Kini Nga Panahon, Sir?* Pila man ang nakapatalinghug niadto? Moingon og, “Amen.” [Nagaingon ang kongregasyon, “Amen.”—Ed.] Eksakto ba gyud kadto? [“Amen.”] Kung ingon niana naangkong nato ang kapadayagan sa niining kaulahiang mga adlaw, tungod ang Mensahe sa Ginoong Dios mao man ang magapahiusa sa Iyang Pangasaw-onon. Walay laing kapanahonan nga gikasaaran niini. Kondili gikasaad ra kini dinhi niini nga kapanahonan: ang Malaquias 4, Lucas 17:30, San Juan 14:12, Joel 2:38. Kana nga mga saad eksakto gyud nga sama kang Juan Bautista nga gipaila ang iyang kaugalingon diha sa Kasulatan.

²⁰³ Gipaila sab ni Jesus ang Iyang Kaugalingon kaniadto. Pero unsa ma’y giingon nila? “Pahilayo kamo sa ingon nianang tawo!” “Si Juan usa man ka ihalas nga tawo.” Dili kadto arang madawat sa iglesia. Ingon niana kanunay ang nagakahitabo. Dili usab kini madawat sa iglesia sa karong panahon.

²⁰⁴ Apan, para kini sa mga Pinili, nagatawag ang Dios sa mga Pinili. Maila nila kini: ginatawag na ang putli nga Pangasaw-onon, ang Pulong, ang Iglesia sa kaulahiang-adlaw, ang Pinili nga Babaye sa atong Ginoong Jesus Cristo, ang Pulong. Kung . . . Si Jesus man mao ang Pulong. Pila ba ang nagatoo niana? [Nagaingon ang kongregasyon, “Amen.”—Ed.] Maayo. Kung ingon-ana, ang Pangasaw-onon kanunay na nga kabahin sa Pamanhonon, busa ang Pangasaw-onon dili gyud mamahimong usa ka denominasyon. Kini mamahimo gayud nga Pulong, nga napadayag, aron mamahimo nga Pangasaw-onon ni Cristo. Gisaad Niya nga buhaton kini. Gisulti pud Niya kung unsaon Niya sa pagbuhat. Wala gayud migamit . . . wala gyud giwala ang Iyang sumbanan. Gibuhat Niya kini sa kanunay sumala sa maong sumbanan. Gibuhat Niya kini, sa matag panahon, sumala sa maong sumbanan. Ginabuhat na usab Niya kini, ginatawag ang Iyang putli nga Pangasaw-onon sa kaulahiang adlaw, ang maong matahum nga Rebecca nga nagahulat sa Iyang Isaac. Pagkamaanindot nga panahon!

205 Ginapaklaro niini dinhi, ang duha ka basahon nga mamahimong kahibulongan pa kaninyo sa diha nga mabasa ninyo ang libro mahitungod sa *Ang Pito Ka Kapanahonan Sa Iglesia*. Adunay duha ka basahon: ang Basahon sa Kinabuhi, gikaingon, nga mahimo konong isulat ang imong ngalan dinha, nga dili na gayud mapapas; aduna pu'y nagaingon nga mahimo pa konong taktakon ang iyang ngalan gikan sa Basahon sa Kinabuhi. Bug-os niining ginapaklaro kana, dinhi mismo. Mohunong ùsa ako sa pipila ka minuto, tingali, bahin sa pipila ka sinulat ko dinhi, ug hisgotan ko kini sa dili pa kita magtapos.

206 Ang kinabuhi usa ka sagrado nga butang, para sa Ginoo, ug nakalista na kini diha sa usa ka basahon. Ang Dios mao ang Tag-iya sa kinabuhi. Nagatoo ba mo niana?

207 Ang natural natong kinabuhi nga aduna kita, dinhi, usa lamang ka tinuis. Husto gyud unta kini nga kinabuhi, sa sugod pa lang, apan natuis lang kini tungod sa natural nga pagkahimugso. Ang unang kinabuhi, o ang inyong unang panaghiusa, ingon nga nahiusa kamo diha sa pagkahimugso, pinaagi sa kinaiyahan, sa usa ka natural nga buhat. Ang natural nga tawo nakigtipon, ang lalaki ug babaye nga nakigtipon, nagkauban sa pagpakighilawas, nga mao'y nagpatungha sa inyong unang kinabuhi dinhi, ug mao kana ang nahilambigit sa sala ug kamatayon. Nganong dili man ninyo makita ang binhi sa serpente?

208 Sa diha nga makita n'yo ang tawong babaye, nga binuhat lang gikan sa orihinal; wala na'y uban pang babaye nga sama niya; nga gibuhat sa ingon-anang porma, ingon nga hingsayran na nga malimbongan gyud siya. Nasayod na ang Dios. Kay kung wala Siya masayod sa katapusan gikan sa sinugdan, nan dili Siya Dios. Kung dili Siya ang walay-kinutoban, kung dili Siya, kung . . . Dili sab Siya mahimong walay-kinutoban nga dili nahibalo-sa-tanan, anaa-sa-tanang-dapit, nahibalo sa tanang butang, og Eternal. Busa nasayod na Siya sa tanang butang, ug kinahanglan Niyang buhaton kadtong tawong babaye.

209 Ang tawong lalaki wala man gyu'y asawa kaniadto. Tungod managsama ra man ang asawa ug ang tawong lalaki. Anaa na mismo sa tawong lalaki ang pangbabaye ug pang-lalaki nga espiritu.

210 Mao nga kinahanglan sa Dios nga ihimulag kadto, og magkuha og usa ka binuhat gikan sa orihinal, human sa paglalang sa tibuok kabuhatan. Walay babaye nga gilalang sa Dios, sa orihinal nga paglalang, ang makabuhat og ingon niadtong butang. Gihimo siya nga ingon niadto, aron buhaton kadto. Nasayod man ang Dios nga buhaton gyud kadto sa tawong babaye. Kay kung wala Siya nasayod, nan dili diay Siya Dios.

211 Apan, kita n'yo, ang mga kinaiyahan nga anaa sa Dios kinahanglan man nga maipasundayag. Mao nga mamahimo

Siya—Siya nga usa ka Manluluwas. Ug eksaktong ginahimo ang tanan, sama sa Iyang mga ginabuhat, aron nga wala unta’y bisan kinsa man nga malaglag. Oh, dili kamo magpakabata. Magpakahamtong na kamo nga mga lalaki ug mga babaye. Ania na kita sa katapusan. Himatikdi.

²¹² Bueno, mao kadto nga kinaiyahan, ang nahilambigit sa kamatayon. Ang una n’yong bana, nga nangulo kaninyo, mao ang inyong kinaiyahan pinaagi sa natural nga pagkahimugso. Sa natural, nahigugma kamo sa kalibutan tungod kay iya man kamo sa kalibutan, ug kabahin kamo sa kalibutan. Husto ba kana? Ang inyong mga tinguha, tungod sa kinaiyahan, mao ang higugmaon ang kalibutan ingon nga kamo kabahin niini. Kabahin kamo sa kinaiyahan. Nagatoo ba kamo niana? Ug mao kana ang natural n’yong kinaiyahan.

²¹³ Mao kana’y hinungdan nga kinahanglan n’yong matawo pag-usab. Kinahanglan n’yong mahimulag; kinahanglan n’yong mamatay sa inyong unang bana. Dili man kamo puedeng magkinabuhi nga kauban kana. Dili puedeng moingon lang kamo, “Bueno, bulagan ko lang siya, ug magpahilayo kaniya sa pagkakaran.” Dili, sir. Dili ingon nga sulat-pamatuod lang sa panagbulag! Kondili angay gyud nga mamatay siya. Ang kinaiyahan nga iya sa kalibutan kinahanglan gayud nga mamatay. Ang matag gamay nga bahin niya kinahanglan nga mamatay. Tungod kinahanglan man ninyong mahiusa, pag-usab, sa usa pa ka Kinaiyahan.

²¹⁴ Ang inyong ngalan sa una n’yong kinaiyahan, nahimugso kaniadto, ug nahisulat diha sa usa ka basahon sa kinabuhi. Ug ang tanan n’yong mga binuhatan nahisulat usab, dinha. Ang tanan nga inyong nabuhat sa ilalum niana nga kinaiyahan nahisulat sa usa ka basahon, nga gitawag og basahon sa kinabuhi.

²¹⁵ Matikdi ninyo, sa Daniel, sa dihang miabot siya ngadto “sa Tigulang sa mga Adlaw, Nga ang buhok ingon ka maputi sama sa balhibo sa karnero. Napulo ka libo ka napulo ka libo ka pilo ang miuban Kaniya, aron mag-alagad Kaniya; ang—ang mga Pangasaw-onon. Ug dayon ang mga basahon gibuklad.” “Ug may usa pa ka Basahon ang gibuklad, nga mao ang Basahon sa Kinabuhi.” Kita n’yo? Adunay mga balaan nga atua na didto, ang Iglesia, ang Pangasaw-onon. “May usa pa ka Basahon ang gibuklad, nga mao ang Basahon sa Kinabuhi.”

²¹⁶ Bueno, kamo, apan sa dihang nahimulag kamo gikan niadto nga panaghiusa, tungod sa espirituhang kamatayon: Ang inyong natural nga tinguha mao na kanang putlan ang inyong buhok. Ang inyong natural nga tinguha mao ang magsul-ob og purol, pintalan ang inyong nawong. Ang inyong natural nga tinguha mao ang mamahimong intelektuwal, utokan nga tawo, adunay mas labaw nga kahibalo kaysa sa uban. Mao kana ang

gitinguha ni Eva kaniadto. Mao kana ang mismong butang nga iyang gitinguha.

217 “Bueno, aba! Ikaw’ng ubos, og way-nada nga magwawali, ang motindog dinha ug sultihan ako? Aduna baya ko’y Ph.D., LL.” Nan samot ka pa nga ginapahilayo niana gikan sa Dios, sa matag higayon nga aduna ka’y ginadugang. Kita n’yo? Kita n’yo? Husto kana. Tinuod kana. Kita n’yo?

218 Mao kana’y gipili ni Eva kaniadto. Buros siya sa ingon niana nga matang sa pagsamkon. Ingon niana usab ang iglesia sa karong panahon, tungod sa mga eskwelahan pang-Biblia ug mga kahibalo. Ug, tan-awa n’yo, ang matag usa kanila nga nagalalisay ngadto sa uban pa, usa na gyud ka dakung pagkalibog nga ingon ka eksakto kung unsay gikaingon sa Biblia, “Babilonia.”

219 Pero nasayod ang Pangasaw-onon kung asa Siya nagabarug. Ngani Siya’y pipila ra gayud. Dili daghan ang mamaluwas; kondili pipila ra, gyud, kaayo. Moingon mo, “Aba, ang gikaingon, dinha, ‘linibo baya kono.’” Oo. Pero kana sila sumada na man sa nangaging duha ka libo ka tuig, usab, apil na Niana kadtong mga gikan sa matag kapanahonan. Sa matag. . .

220 Sa kapanahonan ni Luther ug sa maong grupo; ug dayon sa pagkamatay niini, ug tungod sila, naghimo og denominasyon; pagkahuman sa kang Wesley; ug dayon miabot ang mga pentecostal, ug uban pa. Ug tanan nang gagmay’ng mga sanga nga migitib sama sa mga Baptist, Presbyterian, mga Methodist, mga Nazarene, Pilgrim Holiness, ug uban pa, kita n’yo, tanan na niadtong sanga nga migitib gikan didto sama sa dahon.

221 Apan, timan-i ninyo, sa dihang mailubong kini, ug hinay-hinay nga mahinog ang lugas, makaplagan ninyo, nga sa dili pa mahinog kanang lugas, ang tanan-tanan nga anaa dinha sa lindog kinahanglan ùna nga matun-as. Alleluyah! Dili ba ninyo makita kon hain na kita karon? Ang kinabuhi anaa na usab sa lugas. Unsa man kini? Eksaktong sama gayud sa mismong lugas nga nailubong kaniadto sa yuta, ang mao ra nga Jesus diha sa pormang Pangasaw-onon, mao ra nga gahum, mao ra nga Iglesia, mao ra nga butang, og mao ra nga Pulong. Ang mao ra nga Pulong nga naglatay sa tibuok sulod niini ug migula, ug mipaingon na sa pagka-lugas dinhi. Ug ang tibuok Kinabuhi nga nagalatay niini, dungan usab nga ginapili ang katawhan niini. Karon nagakaporma na kini paingon sa pagka-lugas, alang sa Pagsakgaw. Hisgotan ko ang mahitungod niana ugma sa gabii, o sa sunod gabii, siguro, kon itugot sa Ginoo.

222 Bueno, nahimulag kamo gikan sa inyong unang panaghiusa, tungod sa espirituhanong kamatayon. Karon natawo na kamo pag-usab, o naikasal pag-usab, ngadto sa bag-ong espirituwal nga panaghiusa; dili sa inyong natural nga kinabuhi nga may mga butang nga iya sa kalibutan, kondili sa Kinabuhing Walay

Katapusan. Kanang binhi nga anaa na kaninyo sa sinugdan kaniadto, nakaplagan kamo.

²²³ Bueno, wala na ang inyong kanhing basahon, uban ang inyong kanhing panaghiusa. Karon, ang inyong ngalan nga anaa sa inyong kanhing, sa inyong . . . nabalhin na. Karon, moingon mo, “Buut mo bang isulti kanako nga ang akong kanhing basahon . . .” Gilabay na kana sa Dios ngadto sa Dagat sa Iyang Pagkalimot. Mao nga kamo nagabarug nga hingpit na sa atubangan sa Dios.

²²⁴ Bueno, ang inyong ngalan karon anaa na diha sa bag-ong Basahon; dili diha sa basahon sa kinabuhi, kondili sa Basahon sa Kinabuhi nga iya sa Cordero, nga mga gitubos sa Cordero. Dili nga sa kanhing basahon sa inyong natural nga panaghiusa, kondili sa bag-o na, nga iya sa Pangasaw-onon. Alleluyah! Ang inyong bag-ong kinabuhi anaa na sa Basahon sa Kinabuhi nga iya sa Cordero, ang inyong sulat-pamatuod sa kaminyoon, alleluyah, kon diin ang inyong tinuod nga Eternal nga binhi, nakaturok na, sa sinugdan pa lang. Karon dili lang nga gipasaylo kamo, kondili gimatarung mismo. Himaya! “Gimatarung,” ang ingon sa Mga Taga-Roma 5:1. Oo. Miingon ang Mga Taga-Roma 5:1, “Busa gipakamatarung na pinaagi sa pagtoo.”

²²⁵ Tan-awa n’yo ang maong pulong. Kana nga pulong wala nagakahulogan og “gipasaylo.” Ang maong pulong nagakahulogan og “gimatarung.” Wala kana nagapasabot lang nga gipasaylo ka na.

²²⁶ Pananglitan, kon nadungog mo nga nahubog ako ug—ug nagbuhat og dautan nga mga butang, ug tanan na. Dayon moduol ka, og sultihan ako. Pero hingsayran mo nga wala ko kadto gibuhat, dayon moduol ka, og moingon, “Igsoong Branham, ginapasaylo ko ikaw.” Ginapasaylo mo ako? Wala ko bayu gibuhat kadto, sa sugod pa lang. Kita n’yo?

²²⁷ Karon, kung gibuhat ko man kadto, nan sad-an ako. Pero mahimo n’yo akong pasayloon, ug dili na ako mamahimong sad-an. Apan wala pa gihapon ko napamatarung, tungod kay gibuhat ko man gyud kadto.

²²⁸ Apan ang pulong nga, *gimatarung*, pareho ra kini nga wala mo gayud kadto buhata. Amen. Dili gani kana pagaisipon, man lang. Giunsa man pagkahimong ingon niana? Diha sa Basahon sa Dios sa Dagat sa Pagkalimot, ang inyong kanhing basahon ug pagkaminyo imbalido na ug patay na, ug wala na gani kana sa panumduman sa Dios. Amen. Gimatarung ka na. “Busa ingon nga gimatarung.” Adunay pagpasangil. Giakusahan ka. Pero wala mo gayud kadto gibuhat, sa sugod pa lang. Ang unang panaghiusa anaa na sa Dagat sa Pagkalimot sa Dios. Wala man gyud ka ingon nga naminyo niana, sa sugod pa lang. Siya, ang Pamanhonon, gipas-an Niya Mismo, ang imong kaulawan, para kanimo, imbis nga ikaw unta. Siya ang mipuli kanimo, tungod

kay gipili ka nang daan alang Kaniya, aron nga mahiapil sa Iyang Pangasaw-onon, sa wala pa ang pagkatukod sa kalibutan. Mao kana ang ginaingon sa Biblia. Kamo mao ang gipili-nang-daan nga Binhi.

229 Nganong nabuhat man ninyo kini? Nalimbongan ra kamo niini tungod sa inyong unang pagminyo, tungod sa inyong mananapaw nga ginikanan, nga si Eva. Dili kini inyo mismong sala. Pero tungod sa inyong natural nga pagkahimugso, misunod ra kamo kang Eva, nga nakahimo og pagpanapaw. Mao kana'y hinungdan nga natawo kamo nga usa ka mananapaw. Kamo'y usa ka makasasala, sa sugod pa lang. Husto kana. Nalimbongan ra kamo nga mamaingon niini. Wala kamo'y. . . Dili, kamo, dili man ninyo sala kini.

230 Wala gyud ninyo kini gibuhat. Tungod kay, kanang gamay'ng binhi nga anaa sa sulod ninyo, mao na man kamo, sa wala pa ang pagkatukod sa kalibutan. Gisulat na sa Dios ang inyong ngalan diha sa Basahon sa Kinabuhi nga iya sa Cordero.

231 Sama ra sa akong sugilanon mahitungod sa gamay'ng agila, kamong tanan nakadungog na man niini. Usa ka himongaan. . . Adunay tigulang nga mag-uuma nga may gipalumluman sa usa—usa ka himongaan, usa niadto ka higayon. Tungod wala man gud siya'y igong mga himongaan. . . mga itlog para palumluman sa maong himongaan. Ug niadtong tungora nakakaplag man siya og usa ka itlog sa agila, ug mao nga iya kining gipalumluman sa himongaan. Sa diha nga napiso na ang agila, kini mao ang pinakakataw-anan og hitsura nga manok nga sukad-sukad nakita niadtong mga manok, pero nagkuyog-kuyog ra intawon ang gamay'ng agila. Ug pagmokurokutok ang himongaan, “Klak, klak, klak, klak.”

232 Moingon ang gamay'ng agila, “Wala ko kahibalo kung unsay buut ipasabot niana nga tingog, apan mosunod-sunod lang ko kaniya, bisan pa man.”

233 Ug nangadto sila sa nataran ug hinay-hinay nga nangakha diha sa nagkatipun-og nga mga hugaw. Ug ang manok magsige'g, “Klak, klak, klak. Pagkalami niini. Pagkalami niini. Apil mo sa amoa. Ug mao kini ang. . .”

234 Pero kadtong gamay'ng agila, dili man niya makaon ang ingon-niadto nga mga pagkaon. Kita n'yo? Igo lang siya—igo lang siyang nag-uban-uban sa manok tungod kay wala man siya kahibalo. Wala siya kahibalo kung unsay buhaton. Ug dayon pagmoadto ang himongaan didto, ug mangakha kini og *ingon-ini* o *ingon-ana*. Ug ang gamay'ng agila igo na lang. . . mokaon na lang siya niadto, apan siya—wala gyud siya kahibalo kung unsaon pagbuhat niadto. Hinoon nakita niya ang tanang mga manok nga nagahimo niadto, apan aduna gyu'y butang nga lahi. Dili niya gusto ang ingon niadto.

²³⁵ Busa, usa niana ka adlaw, nasayod gyud ang inahang agila nga nakapangitlog siya og duha ka itlog. Busa misugod siya sa pagpangita niadtong usa pa ka itlog, nagalupad-lupad, nagapangita, sama sa halangdong Balaang Espiritu. Usa niana ka adlaw milupad siya didto sa may nataran, sa maong denominasyon. Midungaw siya didto, ug nakita niya ang iyang agilang piso. Mao nga misinggit siya. Tingog kadto nga daw sa nagalanog diha sa kinasuloran sa maong agilang piso. [Blangko nga bahin sa teyp—Ed.] Oh, husto kaayo Kadto nga tingog! Oh! Pagmadungog gyud sa usa ka gipili-nang-daan nga binhing nahimugso, pagmadungog sa usa ka gipili-nang-daan sa Dios, ang Pulong sa Dios, musika gyud Kini para kaniya. Nasayod man siya nga Kini mao ang Kamatuoran.

²³⁶ Gikapoy na siya nianang denominasyonhong butang, bisan pa man, “Pagpamiyembro sa amoa. Umari ka, og uban ka kanamo. Aduna kami og pang-katilingban nga pagparty-party. Aduna kami *niini*. Aduna kami’y . . .” Dili gayud kana husto nga tingog, para sa maong gamay’ng agila.

²³⁷ Miingon ang inahang agila, “Anak, dili gyud ka kabahin niana nga pundok, bisan unsaon. Kabahin ka kanako. Sa akoa ka.”

²³⁸ Ingon niya, “Mama, tinuod gyud kana. Unsaon man nako paggawas?”

²³⁹ “Pag-lukso lang. Abton tà ka.” Uh-huh. Mao lang kana ang kinahanglan mong buhaton.

²⁴⁰ Ang dinihogan nga Pulong sa Dios nga gipanghimatud-an sa atubangan sa kinsa man nga tawo nga nahimugso ingon nga anak sa Dios, nga adunay gitagana-nang-daan nga binhi diha sa sulod niya alang niining panahon, makita gyud niya ang Mensahe sa Dios sa ingon ka sigurado nga adunay Dios sa Langit. Nakita Kini ni Martin Luther sa iyang panahon kaniadto. Nakita Kini ni Wesley sa iyang panahon. Nakita sab Kini sa pentecostal sa ilang panahon kaniadto. Karon unsa man kamo? Uh-huh. Nangahimo na silang denominasyon. Pero ania ang Pulong nga nagakondena niana; nagasulti kaninyo kung unsa ang angay natong mabatonan, ug eksakto gayud sa Malaquias 4 ug sa tanan niining uban pa nga mga saad alang niining panahon. Unsa ba’y inyong nakita? Unsa ba’y inyong ginatan-aw? Amen. Ania na kita. Ang tinuod, og matuod nga mga agila nagapatalinghug gayud. “Ang Akong mga karnero nakaila sa Akong Tingog. Sa usa ka dumuloong dili sila monunot.”

²⁴¹ Ngano man? Gipahimutang na Kini dinha pinaagi’g predestinasyon. Gitagana na kamong daan nga mamahimong anak sa Dios. Anaa na kamo sa Dios sa wala pa ang pagkatukod sa kalibutan. Igo na lang kamong gipadayag sa niini nga panahon alang sa Iyang kadungganan ug kahimayaan. Unsaon

man ninyo nga mamaingon niana nga dili ginapasidunggan ang Iyang Pulong, ug ginabarugan ang matag Pulong sa Dios? Oo, sir. Ingon nga, kabahin kamo sa Pulong, pinaagi'g predestinasyon. Tungod kay, ania, ang Dios man mao ang Pulong. Nagatoo ba mo niana? [Nagaingon ang kongregasyon, "Amen."—Ed.] Bueno, kung ingon-ana, kung . . . Siya sa kanunay mao gayud ang Pulong. "Sa sinugdang mao na ang Pulong." Ug kung ang Pulong mao ang Dios, nan anaa na kamo sa Dios kaniadto pa. Ingon nga Pulong, ang bahin nga inyong pagabuhaton, anaa na usab sa Dios sa wala pa ang pagkatukod sa kalibutan. Nakita na Niya kamo. Naila na Niya kamo. Iya kamong gipili-nang-daan para niini.

²⁴² Sultihan ko kamo, sama niadtong agila nga nakaila niadtong tingog, mao man usab ang usa—usa ka tinuod, nga natawo na pag-usab nga Cristohanon nga makaila gayud sa Tingog sa Dios nga nagapakigsulti pinaagi sa Pulong, pagmakita nila Kini nga gidihogan ug gipanghimatud-an. Ania. Mihangad siya *Didto*. Wala niya makita kining himongaan nga naga-klak-klak *dinhi*, "Apil ka sa amoa ug ari ka *dinhi*," ug, "tambong ka sa *ingon-niini*," ug, "tambong ka sa *ingon-niini* ug *ingon-niana*." Nakita niya ang usa—usa ka linalang nga sama sa gitinguha niya nga mamahimong ingon sab niini, nga nagalupad-lupad diha sa kahanginan, nagasinggit, gawasnon, nga anaa sa kawanangan, nga lagpas na sa tanang mga buitre ug mga butang sa yuta. Alleluyah! Gitinguha niya nga mahimong ingon niana tungod kay anaa na man sa kinasuloran niya nga mahimong ingon niana.

²⁴³ Ug ang usa ka tawo nga gipanganak gikan sa Dios, ingon nga usa ka anak sa Dios, kinahanglan aduna siya og kinaiyahan nga iya sa Dios. Kinahanglan nga mamahimo siyang sama sa Dios. Ginapasidunggan niya ang Dios. Kabahin siya sa Pulong sa Dios. Ug sa niining kaulahiang mga adlaw, diin nagakaporma na kining Pangasaw-onon, nga eksaktong sama gayud sa gahum nga aduna Siya sa sinugdang pa lang, miagi kini sa niining mga organisasyon, ug uban pa, ug migawas paadto sa Pangasaw-onon. Dili gayud Siya mamahimong uban pa gawas niana.

²⁴⁴ Nakita man nila nanta Kini, silang mga Judio sa ilang mga adlaw kaniadto, sa diha nga ila Kining nakita nga napadayag sa atubangan nila mismo, nga sumala sa gikaingon mismo sa propeta sa kung unsa Siya. Miingon Siya, "Susiha ninyo ang mga Kasulatan; diha Kanila naghunahuna man kamo nga makabaton kamo og Kinabuhing Walay Katapusan. Kini Sila mao ang nagapanghimatuod Kanako. Kung wala Ko ginabuhat ang mga buhat sa Akong Amahan, ayaw ninyo Ako toohi. Apan bisan pa kon dili kamo makatoo Kanako, buhata ang . . . toohi n'yo ang mga buhat nga Akong gipangbuhat."

245 Miingon sila, “Ang among mga ginikanan nanagpangaon man og manna didto sa kamingawan sulod sa kuwarenta ka tuig. Nasayod kami kung asa na kami.”

246 Ingon Siya, “Ug sila ang matag usa kanila nangamatay,” kana mao’y, Walay Katapusan nga pagkahimulag. Nangamatay silang tanan. Aduna lamang og tulo, o duha gikan sa usa ka milyon, duha ka milyon. Usa ra kana sa usa ka milyon.

247 Bueno, sa pagpaliwat, sa semilya gikan sa lalaki ug babaye, kasagaran adunay usa ra ka himsog nga itlog. Adunay usa ka itlog, usa ra ka himsog nga itlog, kon nakakita na kamo og pagpang-hybrid sa mga baka. Himatikdi. *Aniay* usa—usa ka milyon nga mga itlog; *aniay* usa pud ka milyon nga mga semilya; ug sa diha nga mapagawas na ang mga—mga niini, aron mahiusa sulod sa tagoangkan, moagi ùna kini sa tubo ug paingon sa tagoangkan, kon diin kini magtagbo. Ang usa niini mao ang itlog. Sa usa ka milyon nga mga itlog; usa ka milyon nga mga semilya. Pero adunay usa lang ka himsog nga itlog dinha. Aduna pu’y usa lang ka himsog nga semilya. Silang tanan buhi. Mamatikdan ninyo kanang gagmay’ng mga nating baka nga mora og nagalangoy-langoy dinha, usa ka mora og pitopito nga mahimo ninyong ibutang sa usa ka palito sa posporo.

248 Ngani nagapaminaw man sila ni Demos karong gabhiona, ug mahinumduman niya kaniadtong miuban kami kanila. Iya kong gidala didto, og gipakita kanako kung unsaon kana pagbuhat. Sa mga test tube, magbutang sila og igo lang nga mabutang diha sa tumoy sa posporo. Liboan na kadto ka gagmay’ng mga nating baka ug mga toro, apan dunay usa lang kanila ang mabuhi. Usa lamang kanila! Ug ania usa sila ka dakung panon, *dinhi*. Ug inyong mamatikdan, dunay usa nga mokamang gikan sa usa ka panon *dinhi*, og mopaingon dinha, ang semilya kini nga mopaingon *dinha*; ug usa sab ka itlog ang mokamang gikan sa uban pa niining mga itlog *dinhi* dapit, ug magkatagbo sila. Ug ang tanang uban pa niini mangamatay ra. Hinoon, buhi man ang mga niini, apan mangamatay ra kini.

249 Tungod kay, Aduna ma’y, sa kung Unsa nga naghimo *niining* usa ka himsog, ug nagtagana-nang-daan *niining* usa, usab. Ingon niana ang pagpili-nang-daan, igsoon ko. Tinuod. Ang Dios ang magbuot kung kini ba’y lalaki o babaye, pula ba og buhok, itum og buhok, o unsa man kini. Gikatakda na kini sa Dios. Para kanako, mas misteryoso pa kini kaysa sa ulay nga pagkahimugso. Apan, matikdi n’yo, ang tanang uban pa niini mangamatay ra.

250 Ngani adunay duha ka milyon ka mga tawo kaniadto ang nanggawas, nanag-awit, nanagsinggit, og gibuhat ang tanan-tanan. Nanagsulti sa . . . wala pa sukad nagsulti og laing mga pinulongan. Apan nanagsinggit sila, ug—ug gihimaya ang Dios, ug nanagsayaw didto sa may dagat, ug gibuhat ang tanan-tanan

nga gibuhat sa tanang uban pa kanila, apan duha lang ang nakasulod sa yutang saad. Nakasulod si Caleb, si Caleb ug si Josue ra, duha lang. Kadto mao'y usa gikan sa usa ka milyon. Usa gikan sa usa ka milyon usab sa natural nga paghimugso. Ang matag usa kanila kaniadto nakaangkon man unta og mao ra nga panalangin.

Oh, kamong mga Pentecostal, nanghinaut ko nga dili unta kamo maulahi sa pagmata.

²⁵¹ Usa ra gikan sa usa ka milyon. Tan-awa. Adunay gitooan nga lima ka gatus ka milyon kono nga mga Cristohanon sa kalibutan sa karong panahon. Kung moabot man si Jesus karon, nan, aduna lama'y lima ka gatus nga mahiuban Kaniya, kung tinuod man ang maong estatistika. Bueno, mas daghan pa gani kaysa niana ang nagakawala matag adlaw, sa tibuok kalibutan. Mao nga wala gyud sila'y hibangkaagan mahitungod niini.

²⁵² “‘Nasabtan ko,’ ang ingon sa mga escriba, ‘nasayod ka nga . . .’ Nganong nagaingon man ang mga escriba nga—nga, ‘Kinahanglan moanhi una si Elias?’” ang ingon nila ngadto kang Jesus.

²⁵³ Miingon si Jesus, “Si Elias nahianhi na ug wala kamo mahibalo niini.” Kita n’yo? Gibuhat Niya eksakto kung unsay gikasulti sa mga Kasulatan nga mahitabo Kaniya. Kita n’yo? “Mao man usab nga ang Anak sa tawo kinahanglan nga mag-antus. Ilalum sa . . .” Wala nila Siya hiilhi kaniadto. Apan, silang tanan anaa baya sa iglesia. Ang tanan nagapamahayag nga mga buhi kono.

²⁵⁴ Pero pagmadungog gayud sa usa ka tinuod, nga natawo na pag-usab nga Cristohanon, usa ka tinuod nga alagad sa Dios, pagmadungog niya kining Pulong sa Dios, mogawas gyud siya sa gilayon gikan sa tanang denominasyon, paingon nianang matambok nga yuta, ang semilyahanan, sa Pulong. Buhaton gyud niya kini. Wala ko masayod kung sa unsang paagi niya kini buhaton. Pero gitagana-nang-daan sa Dios nga mamahitabo kini.

²⁵⁵ Nalimbongan ra kamo sa sinugdan kaniadto, tungod sa inyong unang pagminyo. Pero karon hingsayran na ninyo kung unsa ang kamatuoran. Sama ra sa akong giingon, ang maong gamay’ng agila sa diha nga nadungog niya ang Tingog sa Pamanhonon, giadtoan niya Kini, ang dinihogan, og gipanghimatud-an nga Pulong sa Dios alang sa kaulahiang adlaw.

²⁵⁶ Si Noe kaniadto mao ang gipanghimatud-an nga Pulong alang sa iyang adlaw. Nagatoo ba kamo niana? [Nagaingon ang kongregasyon, “Amen.”—Ed.] Pero, ang iyang mensahe dili na magpulos sa karong panahon.

²⁵⁷ Si Moises mao ang gipanghimatud-an nga Pulong sa iyang adlaw kaniadto. Nagatoo ba kamo niana? [Nagaingon ang

kongregasyon, “Amen.”—Ed.] Pero dili na sab kadto magpulos sa karon. Si Jesus mao ang . . .

²⁵⁸ Si Juan usab mao ang gipanghimatud-an nga Pulong kaniadto. Nagatoo ba mo niana? [Nagaingon ang kongregasyon, “Amen.”—Ed.] Pero dili na kadto magpulos sa mga adlaw ni Jesus. Dili gayud. Dili, sir. “Ang kasugoan ug ang mga propeta hangtud ra kang Juan; sukad niadto, ang Gingharian sa Langit.”

²⁵⁹ Ang mga apostoles, sila nga mga naghan-ay sa Biblia. Ania miabot si Luther, niadtong Repormasyon, ang iyang mga pulong, kaniadto, ang iyang iglesia, dili na magpulos karong panahona. Dili na magpulos ang kang Wesley. Ang sa mga Pentecostal usab. Hinoon nagpulos kadto sa ilang adlaw kaniadto.

²⁶⁰ Apan laing panahon na man kini. Mao na kini ang pag-abli sa Pito ka Selyo. Nasayod ko nga medyo bag-o Kining paminawon para kaninyo, apan bug-os gayud kining gipanghimatud-an na sa Dios. Wala—wala na’y pagduhaduha Niini. Ingon gayud ka hingpit! Wala ko kini ginasulti nga dinhi ra sa lokal nga kongregasyon. Nagapamulong usab ako ngadto sa mga tawo sa tibuok nasud. Kita n’yo? Buhata ninyo kung unsa ma’y gusto n’yong buhaton.

²⁶¹ Karon matikdi n’yo ang dinihogang Pulong sa iyang adlaw, ingon nga kamo usab kabahin niana, pinaagi’g predestinasyon. Daw sa, hingsayran n’yo kana, sa gilayon. Sa diha nga nadungog ninyo Kana, hingsayran n’yo sa gilayon nga kamo usa gyud ka agila. Naamgo usab ninyo nga kamo dili diay usa ka denominasyonhong manok, sa sugod pa lang. Hingsayran ninyo nga aduna gayu’y sayup dinha. Aduna gyu’y sayup, tinuod, tungod kay hingsayran man ninyo nga nalit-ag ra kamo ngadto niini, sa sinugdan kaniadto.

²⁶² Siya, ang Pamanhonon, giwagtang Niya ang imong kaulawan, “Ug gilabay kana ngadto sa Dagat sa Pagkalimot, pinaagi sa paghugas sa Tubig sa Pulong ug sa Dugo sa Kinabuhi.” Mao kana ang giingon sa Biblia. Ang una ninyong bana nga inyong giminyoan, mao ang kalibutan. . . Ang dinihogang Pamanhonon, nga mao’y nagtagana-nang-daan kaninyo, ang naghugas kaninyo pinaagi sa paghugas sa maong Tubig. Pinaagi ba “sa iglesia”? [Nagaingon ang kongregasyon, “Dili.”—Ed.] Mora’g dili kana husto, di ba? [“Dili.”] Mahimo n’yong makaplagan kana diha sa almanac, apan dili diha sa Biblia sa Dios. “Sa paghugas sa Tubig pinaagi sa Pulong.” Diha sa Pulong! Kita n’yo? Pinaagi sa . . .

²⁶³ Mao nga nagabarug kamo nga bug-os na nga gimatarung, nga daw sa wala n’yo gayud kadto buhata sa sinugdan pa lang. Mao kini ang akong Mensahe para sa Iglesia karon. Samtang kamo. . . samtang mohunong ùna kita sa pagsibya, sa dili madugay. Ingon nga nagabarug kamo, kung nagabarug gyud kamo sa Pulong sa Dios ug uban sa Pulong sa Dios, sa matag

amen, sa matag tulpok, og sa matag kudlit. Nan asa man kamo nagabarug? Gapaningkamot kong sultihan kamo, pahilayo na intawon mo gikan nianang mga tipaka. Ug umari na kamo dinhi sa trigo, kon diin kamo mahimong mahinog sa presensiya sa Anak. Madungog ko na nga nagaabot ang makina nga ig-aani. Nagabarug kamo nga bug-os nang, gimatarung, nga daw sa wala gayud ninyo kadto buhata sa sugod pa lang. Alleluyah!

²⁶⁴ Kung hisgotan lang ang pagpasalamat! Maayo gayud ang gibati ko. Mas mapasalamaton gyud ko tungod niana kaysa unsa mang butang nga nahibaloan ko.

²⁶⁵ Kamo mao ang putli, matarung, og walay-sala nga Pangasaw-onon sa Anak sa buhi nga Dios. Ang matag lalaki ug babaye nga natawo sa Espiritu sa Dios, ug nahugasan na sa Dugo ni Jesus Cristo, ug nagatoo sa matag Pulong sa Dios, nagabarug gayud nga daw sa wala kamo sukad nakasala sa sugod pa lang. Hingpit kamo. Tungod sa Dugo ni Jesus Cristo! Unsaon man ninyo . . . Kung ang usa ka tawo . . .

²⁶⁶ Kung pagapatyon na ako inig ka buntag, og dunay usa ka tawo nga mipuli kanako, nan dili na ako mahimong mamatay tungod sa maong sala. Aduna na ma'y mipuli kanako.

²⁶⁷ Ug si Jesus, ang Pulong, mao ang mipuli kanako. Siya'y nahimong ako, nga usa ka makasasala, aron nga ako mahimong Siya, ang Pulong. Amen. Makapabilin unta ako nga matinud-anon Niini, dili nga sa iglesia. Kondili sa Pulong gayud! Amen.

²⁶⁸ Oh, kanang espirituwal nga panaghiusa na ni Cristo ug sa Iyang Pangasaw-onon karon, ingon nga ang unod nagakahimo nang Pulong, ug ang Pulong nagakahimo nang unod, nga napadayag, og gipanghimatud-an. Kung unsa gayud ang gisulti sa Biblia nga mamahitabo sa niining panahon, nagakahitabo na kini, adlaw-adlaw. Aba, nagakatapok kini sa ingon kapaspas dinha, nianang mga disyerto, ug ang mga butang usab nga nagakahitabo, nga dili na gani nako halos maapas kini. Haduol na gyud kita sa Pag-abot ni Jesus, aron nga mahiusa sa Iyang Iglesia, kon diin ang Pulong nagakahimong Pulong. Ang pagpanawag sa Balaang Espiritu, nga ginasusi ang mga kasingkasing!

²⁶⁹ Nagabarug kamo, nga hingpit na. Wala man gyud kamo nakasala sa sugod pa lang. Wala na gani masayod ang Dios. Tungod anaa na kana ngadto sa Dagat sa Pagkalimot. Wala n'yo gayud kadto buhata. Giakusahan ra kamo bahin niadto, sa magsusumbong. Apan ang tinuod, sa sinugdan pa lang, gitagana na kamong daan nga mamahimong anak nga lalaki ug anak nga babaye sa Dios. Nagabarug kamo dinha, nga nahugasan na. Ug ang inyong kanhing basahon sa panagbulag gilabay na ug patay na, og bug-os gayud nga nawala na, bisan sa hunahuna sa Dios.

²⁷⁰ Kamo man mao ang matarung nga Pangasaw-onon ni Cristo, nga nahugasan sa Dugo ni Cristo. Bililhon, matarung, og walay-

sala nga Anak sa Dios nga nagabarug nga adunay putli, walay-sambog nga Pangasaw-onong-Pulong nga Iya nang gihugasan pinaagi sa Tubig sa Kaugalingon Niyang Dugo; og nahimong unod ug napadayag, aron makuha Niya kamong mga gitagana-nang-daan diha sa sabakan sa Amahan, maingon sa kung unsa Siya kaniadto, sa wala pa ang sinugdanan. Siya mao ang halangdong kinaiyahan sa Dios, nga gitawag og “gugma.”

²⁷¹ Bisan unsa man kamo, mga alagad gyud kamo sa Dios, bisan unsa man ang gusto sa Dios nga ipabuhat kaninyo, mao kana ang inyong puwesto. “Gipahimutang sa Dios diha sa Iglesia, ang uban mga apostoles, mga propeta, mga magtutudlo, mga pastor . . .” Gipahimutang Niya kana sumala sa Iya Mismong gahum sa pagpili-nang-daan. Ug ingon na niana kamo, sa sugod pa lang.

²⁷² Ang inyong unang kasal imbalido na. Oo. Wala n’yo gayud kadto gibuhat, sa sugod pa lang. Tungod kay, aduna lamang og bugtong butang nga nakahimo niadto, mao kadtong mikanaug ang Dios, Siya Mismo, ug mipuli kaninyo diha sa porma sa Anak sa Dios, nga si Jesus Cristo, ug gihugasan kamo sa Tubig, sa paghugas sa Tubig pinaagi’g Pulong. Pulong mismo; dili nga denominasyon! Ang Pulong ang naghugas kaninyo. Apan kung dili kamo mobarug diha sa Tubig sa Pulong, unsaon man ninyo nga mahugasan? Aduna gihapon kamo’y buling nga sama kang Eva kaniadto.

Oh, minahal nga naghimalatyong Cordero, ang
 Imong hamiling Dugo
 Dili gayud kini mawad-an og gahum,
 Hangtud ang tanang mga tinubos nga Iglesia
 sa Dios
 Maluwas aron dili na magpakasala pag-usab.

²⁷³ Unsa man ang sala? Ang *sala* mao ang “dili-pagtoo.” Dili-pagtoo sa unsa? Sa Pulong; dili-pagtoo sa Dios, nga mao ang Pulong.

²⁷⁴ Putli, og walay-sambog; oh, alleluyah; nga mobiya na sa dili madugay paingon sa kawanangan; amen; og nahilandam na. Palandunga n’yo. Ang inyong mga bisti, nahugasan na pinaagi sa Tubig sa nagdugo nga Pulong! Ang Pulong nahimong Dugo. Ang Pulong nag-ula og dugo alang kaninyo, ug mao nga nahugasan kamo sa nagdugo nga Pulong. Ang Pulong, nga nagdugo! Ang Kinabuhi sa Dios nga anaa sa Pulong, ug nag-ula og dugo ang Pulong alang kaninyo, aron nga mahugasan kamo sa kahugawan niining mga bigaon, ug mahimong limpyo ug mapapabilin pinaagi sa paghugas sa Tubig sa Pulong, ug mapapabilin ang inyong hunahuna ug kasingkasing nga maanaa sa Dios ug sa Iyang Pulong.

275 Karon, unsaon man ninyo pagpakahibalo nga tinuod Kini? Sa diha nga mikanaug ang Dios ug gipanghimatud-an ug gipamatud-an Kini.

276 Moingon mo, “Bueno, wala man ko nagatoo Niini sa ingon-anang paagi.” Wala man sab sila mitoo Niini sumala sa paagi ni Jesus kaniadto, apan gipamatud-an Kini sa Dios. Wala pud sila mitoo Niini sumala sa paagi ni Noe. Wala sila mitoo Niini sumala sa paagi ni Moises. Andam hinoon sila kaniadto nga dawaton ang pulong ni Balaam kaysa Niini, “Kitang tanan managsama ra man, busa maghiusa na lang ta ninyo.”

“Thimulag n’yo ang inyong kaugalingon,” miingon ang Biblia, “gikan sa dili-pagtoo.”

277 Alleluyah! Karon matikdi. Dili lamang kamo ingon niana, kondili mahiadto usab kamo sa Kasal diha sa kawanangan. Ug sul-ob ninyo ang pangkasal nga singsing sa gitagana-nangdaan, nga grasya nga dili gyud ninyo takus nga madawat, usa ka pangkasal nga singsing sa grasya nga dili n’yo takus nga madawat bisan pa kon basihan ang mga nabuhat n’yong kaayohan. Ang Dios man mao ang nagbuhat niadto, Siya Mismo. Naila na Niya kamo sa wala pa ang pagkatukod sa kalibutan, busa Iya nang gipasul-ob kaninyo ang pangkasal nga singsing para Didto, og gisulat ang inyong ngalan diha sa usa ka Basahon. Pagkadaku gayud nga pagpasalamat! Alleluyah! Dalaygon ang atong Dios!

278 Karon, sa pagtapos, buat kong isulti kini. Nasayod kitang tanan nga ang modernong iglesiang, Pentecostal, sa kasamtangan nga kahimtang niini. . . Ang tanan-tanan na nga mga denominasyon, usahon ko na silang tanan sa pagbugkos, tungod kay pagabugkason man kana sila. Hinumdumi n’yo, nga Iyang pagabugkason ang mga bunglayon, una, ug sunogon sila. Kuhaon ang . . . kuhaon Niya ang tanang mga lindog sa trigo ug sunogon kana tanan, una; dayon moanhi Siya, kuhaon ug anihon ang Iyang trigo ug dad-on kini pauli. Silang tanan ginatapok na nga mga binugkos, binugkos nga mga Methodist, mga Baptist, mga Pentecostal, og paingon tanan ngadto sa Ekuminikanhong Konseho. Kana lang. Tungod silang tanan pagasunogon man. Kita n’yo?

279 Nasayod kitang tanan nga ang modernong iglesia, sa kasamtangan nga kahimtang, ug kasamtangan nga pagbarug niini, wala gyud kini sa kahimtang nga tapuson ang dakung sugo nga gikahatag sa Dios sa Iglesia alang niining panahon. Pila man ka mga Pentecostal ang makasulti og “amen” niana? [Nagaingoon ang kongregasyon, “Amen.”—Ed.] Husto. Kita n’yo? Anaa kini sa . . .

280 Mga Oneness kami, Twoness, Threeness, *ingon-niini*, *ingon-niana*, og *uban pa*, nagalalisay, nagaaway-away. Tungod ang usa *ingon-niini*, ug ang usa *ingon-niana*, ug *uban pa*. Ug ang

matag usa kanila, nangahadlok nga atubangon ang Pulong, aron nga masusi. Kita n'yo? Nasayod sila. Pag sultihan mo sila mahitungod Niini, ug moingon ra sila, "Ako—dili ko mahimo kana. Dili ako makatoo Niana. Wala ko'y labot kung unsa ma'y ginabuhat niya. Ako..." Kita n'yo? Kita n'yo? Kita n'yo na? Nagapakita lang gyud kung unsa nga inahan ug amahan ang aduna kamo. "Tingali'g mamahimo ikaw nga usa ka pang-estado nga presbiterio sa umaabot nga adlaw. Tingali'g mamahimo ka nga *ingon-niini*, *ingon-niana*, o *uban pa*." Mas maayo nga mamahimo kang usa ka anak sa Dios.

²⁸¹ Bueno, nasayod kita nga dili makahimo ang iglesia, ang iglesiang Pentecostal, sa unsa mang paagi, sa unsa mang paagi, dili gayud mahimo nga tumanon ang Mensahe sa kaulahi-ang-adlaw, sa kasamtangan nga kahimtang niini. Makahimo ba kini? [Nagaingon ang kongregasyon, "Dili."—Ed.] Aba, dili gani kini makauyon sa usa o duha ka Pulong sa Biblia. Unsaon man ninyo pagtuman niini? Dili gyud kini makatuman. Busa, nakita n'yo, ang denominasyon wala gyu'y apil niini. Husto kana.

Ang mga pinili ra nga mga tawo nga gipili ang para niini. Kita n'yo?

²⁸² Karon, nasayod tà, ug nasayod usab ang matag usa kanato, nga ang tanang matang sa mga denominasyon, ang Pentecostal ug tanan na, mga patay na, og kini para ra, sa natawo na pag-usab nga mga Cristohanon sa Mensahe. Uh-huh. Ang inyong unang bana patay na. Kabalo mo nga siya patay na. Gitugot sa Dios nga mamatay kadto. Wala na kadto. Patay na sab ang tanan niining siyentipikanhon, pang-intelektuwal, pang-edukasyon, siyentipikanhong mga pamaagi niining mga eskwelahan kono nga pang-Biblia ug mga ingon-anang butang. Unsa ma'y gibuhat niini? Nagkabahin-bahin, duna na'y oneness *dinhi*, ug trinitarian *dinhi*, ug twness *dinhi*, ug *dinhi* dapit, ug *dinhi* sab dapit, ug ingon niana na kagubot, ug nagapatawag pa sa ilang kaugalingon nga mga Pentecostal.

²⁸³ Bueno, duna ko'y giadtoan nga usa ka batan-ong lalaki, niadtong miaging adlaw; nagapaminaw siya karon, mismo. Ug duna usab og usa ka batan-ong babaye, miyembro siya sa usa ka iglesia. Ingon siya...ingon ko...Nagbulag man gud sila. Miingon ko, "Unsa man diay problema?"

Miingon, "Managlahi man gud ang among pagtulon-an."

Ingon ko, "Oh, gikasubo ko kana. Katoliko ka ba?"

²⁸⁴ Ingon ang babaye, "Dili." Gisulti niya kanako ang iglesiang denominasyon nga iyang gipamiyembrohan, Pentecostal kono.

²⁸⁵ Ingon ko, "Unsa man diay *ka*?" Ang maong lalaki Pentecostal man, usab, pero lahi pud nga denominasyon. Oh!

²⁸⁶ Kabalo ba mo, nga ang iglesiang Romano Katoliko nagsugod kaniadto, ingon nga Pentecostal? Pila ba ang nasayod nga

tinuod kana? [Nagaingon ang kongregasyon, “Amen.”—Ed.] Pero miabot pa og duha ka libo ka tuig adisir kini midangat sa gidangatan niini karon, nga wala na’y unsa man nga ginadawat gikan sa Kasulatan. Wala na gayud. Aba, ang Pentecostal, sulod sa baynte ka tuig gikan karon, mahimong mas mosamot pa kaysa kung unsa sila karon, kon magpadayon kini sa kung unsa ang ginabuhat niini karon. Aba, tinuod. Kita n’yo? Unsa man kini? Unsa man kini? Tan-awa n’yo kung kinsa ang ilang papa ug mama. Ginatugotan ra ang ilang mga kababayan-an nga pamutlan ang buhok niini. Mahimo nilang buhaton ang halos unsa mang butang nga gustohon nila. “Basta miyembro lang sila sa niini nga iglesia, mao lang kana kono ang gikinahanglan.”

²⁸⁷ Oh, dili ikatingala, dili na ikatingala nga nagatapun-og na ang kasuko sa Dios! Gipahimutang sa Dios Kini sa inyong atubangan mismo pero gipiyong ra ninyo ang inyong mga mata ug wala mitan-aw Niini. Oo. Ginasirhan n’yo ang kinasuloran sa inyong kalumo, sa dihang nakita ninyo ang tinuod nga Pulong sa Dios ug kining Pito ka Selyo nga gipanghimatud-an na ug gipamatud-an nga mao gayud. Ug gipamatud-an sab diha sa kalangitan, sa mga kanasuran ug sa bisan asa pa man, pinaagi’g dagkung mga ilhanan ug mga katingalahan nga Iyang gisaad nga Iyang buhaton, apan nangyam-id ra kamo, og miingon, “Ako—wala ko kahibalo. Ako—dili ko makatoo niana. Ako...” Kita n’yo? Oh, my! Mga patay na, ug wala mahibalo niini. Tungod sa inyong mga sala ug mga kalapasan! Mga patay na kamo. Oh, my!

²⁸⁸ Nasayod kitang tanan nga ang iglesia sa ingon niana nga kahimtang dili gayud makatuman sa niining kaulahiing adlaw. Unsaon man niini pagpahayag ang Malaquias 4? Unsaon man niini paghimo niana? Nga dili man gani sila nagatoo sa ingon anang butang. Unsaon man niini sa pag-too, pagpahayag sa Lucas 17:30? Unsaon man niini sa pagpahayag ang tanan niining uban pa nga mga Kasulatan nga gikasaad para sa niining kaulahiing adlaw? Dili gayud niini mahimo, tungod kay gipanghimakak man niini Kini. “Maingon sa nahitabo kaniadto sa mga adlaw ni Lot, mao man usab ang mahitabo sa pag-abot sa Anak sa tawo.”

²⁸⁹ Tan-awa n’yo ang kahimtang sa Sodoma kaniadto, nga nahimutangan, ni Lot, niadto nga panahon. Tan-awa n’yo, ang kahimtang sa iglesia sa maong panahon. Tan-awa n’yo kung unsa ang nahitabo kang Abraham, ang maong Pinili.

²⁹⁰ Tan-awa sab kung unsa ang nahitabo kanila ni Lot didto sa Sodoma. Tan-awa n’yo ang mga Billy Graham ug mga Oral Roberts, silang tanan nga anaa didto niadtong mga denominasyon. Tan-awa n’yo ang pinili nga Iglesia ni Abraham, nga gipahigawas kaniadto.

²⁹¹ Tan-awa n’yo kung unsa kadto nga matang sa ilhanan, niadtong si Jesus Mismo, ang nagpakatawo nga Dios nga

nagtindog didto nga anaa sa tawhanong lawas. Moingon mo, “Usa man kadto ka Manulonda.” Pero miingon ang Biblia nga ang Dios Kadto.

²⁹² Ang Ginoong Dios, si Elohim, nga nagtindog didto nga anaa sa tawhanong lawas, og ginapakita nga pagadihogan gayud Niya ang Iyang Iglesia sa kaulahiang mga adlaw, ang Dios kana nga magapamuhat diha sa tawhanong lawas pag-usab. “Maingon sa nahitabo kaniadto sa mga adlaw sa Sodoma, mao man usab ang mahitabo sa pag-abot sa Anak sa tawo.” Mao ra gihapon nga matang. Makita man nila kini dinha mismo sa mga Kasulatan. Basaha n’yo ang . . . “Susiha ninyo ang mga Kasulatan, kay diha Kanila naghunahuna man kamo nga makabaton kamo og Kinabuhing Walay Katapusan.” Ug Kini Sila mao ang nagapanghimatuod Niini. Kita n’yo? Kita n’yo?

²⁹³ Busa hingsayran nato nga mga patay na sila. Gitugot sa Dios nga mamatay kini tungod sa kaugalingon niining mahakogon, og siyentipikanhong programang pang-edukasyon.

²⁹⁴ Ngani ang tanang mga Pentecostal kaniadto, pag hisgotan n’yo ang mahitungod—mahitungod sa pagpaeskwela sa ilang anak ngadto sa eskwelahan pang-Biblia, kaniadtong ania pa dinhi ang tigulang nga si Igsoong Loyate ug silang uban pa, siguradong papahawaon gyud nila kamo sa iglesia. “Apan, oh, karon mao na kini kono ang pinakahalangdon nga butang. Ang akong anak nag-eskwela baya sa eskwelahan pang-Biblia.” Nagakalot ra diay siya og iyang lubnganan. Busa, karon, sa tanaw n’yo madawat kaha nila Kini, sa karong panahon?

²⁹⁵ Sa hunahuna n’yo ba nga ginasuportahan ko ang kawalay-edukasyon? Dili gayud. Ginasulti ko ra kaninyo nga aduna gyu’y kalahian sa niining intelektuwal nga kapanahonan nga atong gikinabuhian, kon diin ang iglesia naburoos na sa siyensiya ug tanan na niining “mga pagpasabot” kono ug tanan na. Dili baya ninyo masabtan ang Dios.

²⁹⁶ Bueno, ang—ang mga sacerdote kaniadto bug-os gyud kono nilang nasabtan ang Dios, mao nga hingsayran nila kono kung sa unsang paagi moabot ang Mesias, apan miabot man Siya sa lahi gayud nga paagi nga ilang nahibaloan. Dili kadto siyentipiko. “Giunsa man niini nga Lalaki, nga usa ka ilehitimo nga Anak? Sa asa man nga tulonghaan Siya nag-eskwela? Asa ba naggikan ang Iyang kahibalo? Asa ba Niya nabatonan kini nga kahibalo?”

²⁹⁷ “Aba, naninguha Ka pang tudloan kami? Nga natawo Ka man lang nga bunga sa pagpanapaw.” Kita n’yo na? Oh, grabe!

²⁹⁸ Nakita n’yo ba ang mao rang butang nagakahitabo na usab? [Nagaingon ang kongregasyon, “Amen.”—Ed.] Nakita n’yo ba nga nagakahitabo kini pag-usab? Ang tanan na sa ilang pang-relihiyon nga siyensiya, pang-relihiyon nga siyensiya sumala sa gikasulti sa ilang eskwelahan pang-Biblia, sa ingon nianang

paagi nila Kini gusto. “Sa ingon nianang paagi kono Kana angay’ng mamahitabo, kay kung dili nan dili Kana mao.”

²⁹⁹ Pero ginalipat lang diay sila sa Dios, sa matag panahon. Tungod sa una pa nagaabot man Kini sa ubang paagi. Ingon na niana ang nahitabo sa panahon ni Noe; sa panahon ni Moises; sa panahon sab ni Cristo; sa panahon ni Juan; sa panahon pud sa mga tinun-an; sa panahon ni Wesley; sa panahon ni Luther; sa panahon sa Pentecostal; ug mao man usab sa karon. Wala Niini ginausab ang pamaagi Niini. Kini sa kanunay nagaabot gyud sa mao ra nga paagi. Aduna lamang og mga repormador sa kinatibuk-ang pito . . . unom ka kapanahonan, gawas sa ikapito. Ug giingon sa Pinadayag 10, nga sa niini nga panahon mausab na kini. Ug mao gayud.

³⁰⁰ Karon tapuson na nato, sa pagsulti niini. Ang pagtapos sa dakung sugo, unsaon man nila pagbuhat kana? Nasayod kita nga mga patay sila. Gitugot sa Dios nga mamatay kini sa niining siyentipikanhong kapanahonan, ang tanan na niini, aron—aron nga Iyang (mabuhat ang unsa man?) ablihan ang misteryo sa Pito-ka-Selyo ngadto sa dili-denominasyonhon nga Pangasaw-onon. Unsaon man pagdawat sa usa ka denominasyon ang maong Pito ka Selyo, sa dihang bug-os man Kini ka sukwahi, ang binhi sa serpente ug tanan na nianang uban pang mga butang? Ang tanan, og ang kinatibuk-ang pito ka misteryo sukwahi gyud sa kung unsay gikatudlo na kanila, tungod ang ilang gidawat mao man ang karaang pagtulon-an sa ilang eskwelahan pang-Biblia.

³⁰¹ Ug ang Pito ka Selyo sa Dios, sa dihang giablihan Kini didto sa bukid: itugot sa Dios, sige, itugot Niya nga mamatay ako karon mismo dinhi niining pulpito kung dili Kana mao ang Kamatuoran. Ug gisulti ko nang daan kaninyo, usa ka tuig ug unom ka bulan sa wala pa kini mahitabo, kung unsa ang gisulti Niya kanako, “Adto ka sa Arizona,” ug kung unsa ang mahitabo didto sa disyerto. Ug duna ma’y mga kalalaken-an nga ania mismo, karong gabhiona, nga atua sab nga nagatindog mismo didto sa diha nga mikanaug ang pito ka Manulonda. Ug gani ang mag- . . . Ang magazine, ang *Life* magazine, nagmantala man og usa ka artikulo mahitungod Niini. Anaa na kini didto mismo sa obserbatoryo, ug tanan na. Pero wala gani sila kahibalo kung unsa gayud Kini.

³⁰² Ug ang tanan giingon na, oh, bisan ang mahitungod sa paglaglag sa California, nga taliabot na, ug tanan na niining uban pang mga butang. Ug gisulti ko mismo kanila kung pila ka adlaw kini mahitabo, kung asa sa Alaska mamahitabo ang dakung linog, ug mao kana ang mamahimong sinugdanan sa ilhanan sa panahon, ug kung unsa pa ang mamahitabo. Ug pulong sa pulong gayud, kung unsa man ang gisulti Niini, wala gyud ni usa ka higayon nga napakyas Kini. Wala pa usab ninyo nakita nga napakyas Kini. Ug dili gayud Kini mapakyas, tungod

kay mga Pulong man Kini sa Dios. “Ug ang Langit ug yuta mangahanaw, apan Kini dili mapakyas.” Husto kana.

³⁰³ Gikinahanglan nga ablihan sa Dios ang Pito ka Selyo, pero dili diha sa usa ka denominasyon. Dugay nakong batok niini sa una pa. Apan, gikan sa denominasyon, mahimong mokuha sab Siya og usa ka Pangasaw-onon, apan dili usa ka denominasyonhong pangasaw-onon. Dili Niya kana mahimo. Tungod sukwahi na kana sa Kaugalingon Niyang Pulong. Giablihan Niya ang pito ka misteryo didto. Ginapakita niana, og ginapahayag ang mga butang nga dugay nang gililong sukad pa sa pagkatukod sa kalibutan, nga mahimong ipadayag sa kaulahiang mga adlaw, ngadto sa mga anak sa Dios. Gipahayag nila Kana karon sa atubangan sa mga tawo, aron nga makita nila Kana, mao, kana, para sa niining dili-denominasyonhong Pangasaw-onon. Oh, my!

³⁰⁴ Ania ang inyong duha ka basahon. Ang usa niini mao ang Basahon sa Kinabuhi nga iya sa Cordero. Ang inyong ngalan nga anaa Dinha gitagana-nang-daan nga maanaa Dinha. Dili na kana mapapas, tungod kay dili man sab ninyo kana mahimong taktakon, kita n’yo, tungod kay gitagana na kanang daan nga maanaa Dinha. Apan sa regular nga basahon sa kinabuhi, mahimo pa kanang taktakon sa unsa mang higayon. Kita n’yo? Kon dili kamo maghinulsol, nan papason kana, bisan pa man, tungod moatubang man kamo sa Paghukom. Pero ang Pangasaw-onon dili na moatubang pa sa Paghukom; kondili mokayab na para sa Pagsagaw. Sama lang . . .

³⁰⁵ Isulti ko kini, sa pagtapos. Nagka-gabii na, busa . . .hapit na man diay mag-alas nuebe-traynta. Ug kita kinahanglan nga manggawas na dinhi pagka-alas nuebe-traynta, kon itugot sa Ginoo. Magmatinahuron lang karon, paminaw mo. Usa ka higayon . . .

³⁰⁶ Isulti ko kini karon, tungod ginapasibya man kini sa tibuok nasud. Diha sa New York, karon baynte-singko minutos na human nga milabay ang alas onse. Dinha sa Philadelphia ug sa palibot dinha, adunay minahal nga mga balaan nga nagapaminaw dinha, karon mismo, sa mga kasimbahanan sa tibuok lugar. Dinha, dinha usab sa Mexico, dinha pud sa Canada ug sa tibuok, nasud. Duha ka gatus ka milya, sa bisan asa man nga sakup sa kontinente dinhi sa North America, halos, adunay mga tawo, nga nagapaminaw karon mismo. Linibo ka pilo ang mga, nagapaminaw.

³⁰⁷ Ug kini mao ang akong Mensahe kaninyo, Iglesia, kamo ingon nga nahiusa na, sa espirituwal nga panaghiusa pinaagi sa Pulong, nga patay na kamo sa niini nga kanhing mga bana. Natawo na kamo pag-usab. Ayaw na ninyo sulayi nga kaloton pa siya. Patay na siya. Kung usa ka man ka natawo na pag-usab nga Cristohanon, nan kanang gamay’ng binhi nga gitagana-

nang-daan kanimo, ang Pulong kana nga ibabaw sa Pulong, nga ibabaw usab sa Pulong, nga ibabaw na usab sa Pulong, nga ibabaw na usab sa Pulong, ug hangtud nga modangat kana sa bug-os nga bantayog ni Cristo, husto, aron nga moanhi na Siya para kuhaon ang Iyang mga Pangasaw-onon. Karon nahilandam na kita sa usa ka butang, kana mao ang Pag-abot sa Ginoo.

³⁰⁸ Ang inyong ngalan anaa na diha sa Basahon sa Kinabuhi. Ang Basahon sa Kinabuhi mao ang Pulong sa Dios, tungod ang Pulong mao man ang Dios, ug ang Dios lang ang bugtong butang nga mao mismo ang Kinabuhi. Busa ang inyong ngalan girepresentar na diha sa Biblia sa wala pa man nahisulat ang Biblia ingon nga Pulong. Ug kung ania kamo aron tumanon kana, dili ba Niini panghimatud-an ang Pulong? Dili ba panghimatud-an sa Iglesia ang Kaugalingon Niini? Dili ba ang Malaquias 4, ug tanan na niining uban pang mga butang, hingpit, hingpit gayud nga ginapanghimatud-an ang Kaugalingon Niini ug ginapakita nga mao Kana mismo Kini?

³⁰⁹ Sa kaniadtong mianhi si Jesus, miingon Siya, “Kung wala Ko ginabuhat ang mga buhat nga gikasaad nga Akong pagabuhaton, nan ayaw Ko ninyo toohi.” Unsa man sa mga grupo kaniadto ang Iyang gipasakopan? Ingon Siya, “Silang tanan. . . Ang inyong amahan, mao ang yawa, ug ang iyang mga binuhatan inyong ginabuhat.” Kita n’yo? Kita n’yo?

³¹⁰ Ania na kita sa kaulahiing mga adlaw, Iglesia. Mao kini ang akong pang-pasalamat nga Mensahe kaninyo.

³¹¹ Karon, sa dili pa ang pagtapos. Usa niadto ka higayon atua ako sa Glacier National Park. Among nadungog, niadtong tibuok adlaw, nga aduna kono sila’y—aduna sila’y ipahulog nga. . . usa ka glacier nga kalayo nga ipahulog inig mogabii na. Busa okupado gyud ang mga tawo, niadtong tibuok adlaw, sa pagpangandam niadto nga butang, tungod kay duna man sila’y ibubo nga kalayo, niadtong gabhiona. Nagbubo sila og likido nga kalayo, nga sama na sa usa ka halapad nga glacier sa tubig. Apan kadto’y. . . Mora kadto og usa ka balangaw, halos, sa diha nga mibugwak kadtong, kalayo nga nagakahulog gikan niadtong glacier. Didto sa palibot sa maong parke, kami sa akong asawa, ug ang mga bata, nagsuroy-suroy mi didto tibuok adlaw. Gusto man gud namong magpabilin ùsa, aron nga makakita niadto nga talan-awon gamit ang kalayo. Hinoon kadto—kadto—gisaad man kadto kanamo nga makita kono namo kadto, ug nga amo pa konong masaksihan kadto pag-usab. Ingon man sila nga pirmi kono silang nagapahigayon niadto sa matag panahon sa ting-init ug uban pa. Pero miingon ko, “Bueno, mahimo pa kaha namo nga makita kana?”

³¹² Miingon, “Nagsaad na mi para niana karong gabhiona. Amo na kanang gisaad.” Ingon pa, “Anaa na gani sila karon didto sa itaas para sa pag-andam niana.”

313 Ang tanan nahiandam na gayud para niadto nga talan-panghitabo! Ingon niana usab ang nagakahitabo mismo karon. Ang tanan nahiandam na para sa maong panghitabo, usa ka Iglesia nga ginapahigawas na alang sa Iyang Ngalan, ginakuha na ang Iyang Pangasaw-onon gikan sa kalibutan, sa niining mga denominasyon ug sa tibuok kalibutan, ug gikan sa kahugawan ug sa mga butang nga iya sa kalibutan.

314 Ang tanan; ang maong panghitabo nahiandam na. Ang tanan nanagtindog na didto sa gawas. Ingon sila, “Karon padayon lang mo nga nakatan-aw, dinha sa ibabaw mismo sa bukid.”

315 Kanunay sa ingon niana nga paagi Kini nagaabot. Sa ingon niana usab nga paagi Kini moabot sa niini nga higayon. Sa ingon nianang paagi Kini nagaabot sa una pa. Dili nga pinaagi’g usa ka denominasyon! Tungod wala man sukad migamit ang Dios og usa ka denominasyon, wala gayud!

316 Pag nagaabot ang repormador, ginadawat niya ang Pulong sa Ginoo. Ug dayon sa diha nga mamatay na siya, magtukod sila og usa ka denominasyon gikan niini. Ingon niana usab ang gibuhay sa mga Pentecostal ug sa tanan na. Sa dihang dunay bag-ong mga hilisgotanan ug tanan na, ingon na gyud niana ang mahitabo, ingon na niana ang sangpotan sa maong butang. Sa dihang dunay usa ka pulong nga gidugang, nagtukod na dayon sila og usa ka iglesia gikan niana, naghimo og denominasyon, og gihimulag ang ilang kaugalingon. Siguradong mamaingon niana gyud kini.

317 Bueno, dili n’yo mahimong daugon—dili n’yo mahimong daugon ang kinaiyahan. Nagalihok ang kinaiyahan sa mao rang naandan na nga proseso, sa tanang panahon: lindog, dahon, uhay, tipaka, og uban pa, dayon ang trigo na.

318 Karon himatikdi. Ang tanan niadto nahiandam na. Ang tanan-tanan gipasiga na ug nahiandam na. Ug ang tanang tawo usab nanagtindog na didto. Nagahangad ako, samtang nagaagbay sa akong asawa. Nagatutok kami. Ug ang mga bata nanindog sab didto, kaming tanan nanahangad, nga nakaingon *niana*. Oh! Usa gyud ka butang kadto, tungod kay naghulat gyud kami niadto. Gikasaad gyud kadto kanamo.

319 Amen! Gisaad usab Kini sa Pulong. “Mahitabo, nga sa dili pa moabot ang daku ug makalilisang nga adlaw sa Ginoo, ania, Akong ipadala kaninyo si Elias nga propeta. Iyang ipasig-uli ang mga kasingkasing sa mga anak balik ngadto sa mga amahan, ug ang mga kasingkasing sa . . .” “Mahitabo sa kaulahiang mga adlaw, igabubo Ko ang Akong Espiritu gikan sa Kahitas-an.” “Ang una ug ulahing ulan dungan nga moabot sa kaulahiang adlaw.” Kining tanan nga mga saad, sa tibuok Kasulatan, gikahatag na. Nagahangad na kita. Matikdi ang tinuod nga mga Pangasaw-onon sa tibuok nasud niining taknaa, nga nagahangad na. Iglesia, moabot na Siya, usa sa niining mga

adlaw. Sa ingon ka sigurado nga mianhi Siya kaniadto sa unang higayon, moanhi gyud Siya pag-usab. Mao nga iandam na ang tanan. Ihimulag n'yo na ang inyong kaugalingon gikan sa tipaka. Magpabulad na sa atubangan sa Anak. Padayon lang nga nakahangad. Managpaabot kamo.

³²⁰ Sa kalit lang, may nadungog kami gikan sa ibabaw sa bungtod, usa ka tingog ang mibudyong pinaagi'g loudspeaker, nga miingon, "Andam na ang tanan."

³²¹ Dayon kadtong tawo, nga nagatindog didto mismo sa tupad nako, miingon, "Ihulog na ang kalayo." Atua mitungha na kadto, nga nagadagayday gikan sa bukid, usa ka glacier nga kalayo ug nagadilaab nga mga kalayo, pagkaanindot gayud nga tan-awon.

³²² Igsoon, iandam na nato ang tanan, kay usa sa niining mga adlaw mahulog na ang Kalayo. Pagalalinon na kita. Mao nga mangandam na kita karon alang sa takna sa pagkahulog sa Kalayo. Ania na kita sa kaulahiing mga adlaw, nasayod kitang tanan niana, ug andam na kita sa Pag-abot sa Ginoo. Ang butang na lang nga angay'ng pagabuhaton mao ang pagpahimulag sa inyong kaugalingon gikan sa tanang sala. Ihimulag n'yo ang inyong kaugalingon sa unsa mang butang nga may kahilambigitan sa kalibutan. "Ayaw n'yo higugmaa ang kalibutan o ang mga butang nga iya sa kalibutan."

³²³ "Ayaw tugoti ang si bisan kinsa, nga limbongan kamo, pinaagi sa iyang kredo." Magpabilin kamo diretso mismo sa saad sa Dios, sa Pulong sa Dios. Ug ang Pulong, kung Kini man mao ang Pulong alang niini nga panahon, nan panghimatud-an Kini sa Dios nga mao gayud. Kay kung dili Niya panghimatud-an, nan dili kini mao ang Pulong alang niini nga panahon.

³²⁴ Ang Pulong nga miabot sa kaniadtong Adlaw sa Pentecostes dili na magpulos para niini nga panahon. Dili, sir. Kadto'y para lang sa Pentecostes. Kini usab ang para sa Pangasaw-onon, ang Pagpauli na sa Pangasaw-onon. Aduna na kita'y bag-ong nabatonan. Girepresentar kana sa mga Pentecostal, usab. Ania na kita sa kapanahonan sa Pangasaw-onon. Sama ra nga ang—ang Pulong ni Noe dili na magpulos sa mga adlaw ni Moises; ang kasugoan ni Moises dili na usab magpulos sa panahon ni Pablo kaniadto. Ngani giingnan niya sila, "Patay na kamo niadto, ug dili na ninyo kadto puedeng batonan."

³²⁵ Iglesia, kaninyo ako nagapakigsulti, karong gabhiona, sa tibuok nasud, kung—kung gihimulag na ninyo ang inyong kaugalingon gikan sa denominasyon ug sa tanang kahugawan ug sa mga butang nga iya niining kalibutana, ug sa tanang mga butang nga nagapapabilin kaninyo sa mga kredong hinimo-sa-tawo ug sa mga kalagdaan ug mga ingon nianang butang, kon inyo nang gihimulag ang inyong kaugalingon nan: Paghangad kamo. Pangandam kamo. Tungod ang Kalayo mahulog na, usa sa niining mga adlaw. Paanhion na Siya sa

Dios, ug pagkaanindot gayud kana nga talan-awon. Andam na ba gyud kamo pagmoabot na Siya? Andam na ba kamo nga mokayab uban Kaniya pagmoabot na Siya? Ang sekreto nga Pagsakgaw sa supernatural nga Pangasaw-onon, “Siya’y mamahimong mor- . . . gikan sa pagkaadunay-kamatayon ngadto sa pagkawala-na’y-kamatayon; mausab, sa kalit, sa usa lang ka pagpamilok. Kita nga mga buhi ug nanghibilin dili magauna kanila nga nangatulog.”

³²⁶ Niadtong miaging adlaw, sa Adlaw sa Armistice, atua ako didto sa Tucson. Gusto sa anak kong lalaki nga makita ang maong parada. Pero nagtuon man ko, ug mao nga wala unta ko’y panahon para moadto niadto. Ug daghan sab ko’y duawon nga mga masakiton ug mga ingon-anang butang. Busa ingon siya, “Papa, dili man ko nila dalhon.” Ingon siya, “Dalha na lang ko.”

³²⁷ Ingon ko, “Sige.” Si Igsoong Simpson, sa tan-aw ko mora’g ania siya karon; ug ang anak niyang lalaki gusto man sab nga moadto. Busa gipasakay ko sila sa sakyanan ug milarga mi.

³²⁸ Nagtindog ko didto sa may kanto ug nagtan-aw. Ug pagkataudtaud, didto dapit sa luyo nga halayo na, akong nadungog, ang nagadahunog nga hinay nga tingog, “womp, womp,” mga tambol, nga ginapatingog. Sa nagtindog ko didto. Nahunahuna ko, “Bueno, kini nga mga bata, nagabasa gyud ni sila sa tanan niining mga basahon mahitungod sa kasundalohan. Naawat-awat gyud nila kana.” Akong namatikdan, ang nagauna sa parada mao ang karaang tangke sa Nahaunang Gubat Pang-kalibutan. Nagasunod pud kadtong, gagmay’ng mga tangke nga ingon niadto. Ang misunod, human niadto; ang misunod human niadto mao ang bag-ong daku nga tangke sa Ikaduhang Gubat Pang-kalibutan, ang dakung Sherman nga tangke nga dunay nakataklob sa buthanan niini. Dayon dunay misunod, ug dunay misunod pa, ug pagkataudtaud ang mga Inahang Gold Star na.

³²⁹ Ug dayon, pagkataudtaud na pud, misunod ang dose ka beterano nga mga buhi pa, sa tibuok estado sa Arizona, gikan sa Nahaunang Gubat Pang-kalibutan; dose ka beterano. Sunod niana, dunay misunod nga usa ka karosa, sa wala-mailhi nga mga sundalo, nga may gamay’ng puti nga krus. Nagtindog didto ang usa ka marinero, nga sundalo, ug usa pa ka sundalo, nga nagtindog nga tigbantay; didto sa may gamay’ng bahin sa karosa. Sa pikas pud nga bahin atua ang usa ka tigulang og ubanon na nga inahan, nga nagalingkod nga may nakataud nga gold star kaniya, usa ka luoy’ng mahiligugmaong asawa nga nagahilak, patay na ang iyang bana; og usa ka gamay’ng nagkagidlay nga batang lalaki, nga nakatakilid ang iyang ulo. Patay na pud ang iyang amahan. Ug dayon sa luyo niadto daghan pa kaayo ang mga nagsunod, ug dayon ang mga bag-ong kasundalohan na. Nagtindog ra ko didto. Pagkaanindot unta nga talan-awon, apan pagkasubo gayud!

³³⁰ Nakahunahuna ko, “Oh Dios, usa sa niining mga adlaw makita ko ang usa na usab ka talan-awon.”

³³¹ Moabot ang usa ka adlaw sa pagkabanhaw, diin, “Ang mga nahiuna maulahi; sila nga mga naulahi mahiuna.” Ang kanhing mga propeta ang manungha, una, ug ilang makita kanang prosesyon nga magalabay, magamartsa paitaas diha sa kawanangan. “Ug kita nga mga buhi ug nanghibilin dili magapugong kanila nga nangamatay. Kay ang trumpeta sa Dios patingogon, ang mga nangamatay diha kang Cristo mouna sa pagpamangon.” Magasunod usab kita mismo uban kanila sa pagsulod, alleluyah, sa tanan niadtong mga nangangit kapanahonan nila ni Luther, ni Wesley, sa Methodist, Presbyterian, og hangtud na sa ulahing kapanahonan, nga midawat usab sa Pulong sa ilang panahon.

Ang Dios magapanalangin kaninyo. Iandam n’yo na ang tanan, ug mahulog na ang Kalayo.

³³² Iduko nato ang atong mga ulo sa makadiyut. Tingali, aduna pa sa mga tigpaminaw nga ania dinhi karong gabhiona, samtang ginapapabilin ko pa kamo para sa . . . hangtud alas nuebe-traynta. Aduna ba’y usa dinhi, aduna ba’y usa ka dosena dinhi, pila man ang ania dinhi, nga moingon, “Igsoong Branham, gikaulaw ko ang akong kaugalingon, tungod sa akong pagkinabuhi. Nangalagad ako pag-ayo sa usa ka denominasyon ug sa mga tawo. Nasayod ko nga wala pa gyud ako nahitakdo sa Pulong sa Dios. Mao nga hangyoon ko ikaw nga iampo mo ako, Igsoong Branham?” Ipataas ang inyong kamot. Panalanginan ka sa Dios. Panalanginan ka sa Dios. Tan-awa n’yo, dinha sa mga balkonahe, sa palibot. Panalanginan kamo sa Dios. “Nasayod ako . . .” Karon ayaw na kamo og kaulaw. Bueno, ayaw mo’g kaulaw.

³³³ Ug dinha, sa tibuok nasud, gikan sa New York hangtud sa California, gikan sa Canada hangtud sa Mexico: kamong mga tawo nga nagkatigum diha nianang mga iglesia (kon diin silang maunogon nga gagmay’ng mga pundok nga nanagtoo niini nga Mensahe sa tibuok nilang kasingkasing; nanggawas na sila, nanggawas gikan sa dakung kasakitan, nanggawas gikan niana nga mga denominasyon; tungod sila’y mga binhi man sa Kinabuhi) nabati ba ninyo ang pag-awhag, karong gabhiona, sama sa gamay’ng agila, nga Aduna kamo’y nagakadunggan nga medyo lahi gyud sa inyo nang nadungog, apan, bisan pa man, sa kinasuloran sa inyong kasingkasing nasayod kamo nga Kamatuoran kini? Kamo, nga anaa dinha, dunay usa ka pastor nga nagatindog dinha sa kon asa man. Gipataas mo usab ang imong kamot. Magaampo usab ako para kanimo.

³³⁴ Kining mga butanga wala nahitabo nga diha ra sa usa ka kanto, higala. Hinumdumi n’yo, “Masigpit ang pultahan ug hiktin ang dalan, ug mamahimong diyutay ra ang makatultol

niini.” Ayaw kamo pagpakig-uban nianang panon nga nagapaingon dinha, higala, nianang Kapanahonan sa Iglesiang Laodicea. Mahimo man niini nga maglukso-lukso, mosayaw uyon sa musika, pero mga dagaang. Wala giingon nga sama kini ka bugnaw sa niyebe, ha, kondili ang gikaingon nga dagaang kini, mao kana ang Pentecostal, ug wala mahibalo nga kini’y makaluluoy, alaut, og buta. Buta sa unsa? Sa Pulong, sa kapadayagan sa Pulong; tungod kay wala man kono Kini miagi sa ilang mga organisasyon, mao nga dili nila Kini madawat.

³³⁵ Ug kamong mga ministro dinha sa Tucson, karong gabhiona, dili man ako ang magpapanubag kaninyo tungod niana. Kondili ang Dios mismo. Anaa ako dinha sulod sa tulo ka tuig. Gisulti ko kaninyo nga dili ako magtukod og usa ka simbahan. Wala gyud ko’y gisugdan ni usa. Kondili si Igsoong Perry Green ang nagsugod niini. Anaa ako dinha sulod sa tulo ka tuig, ug wala gyud ni usa ka higayon nga inyo akong gidapit nganha sa inyong pulpito. Nagpabilin man unta ako dinha sa Tucson sa halos tulo ka tuig. Ngani kuhaon na lang ko sa Dios gikan sa disyerto usa sa niining mga adlaw. Pero magpabilin gyud gihapon kini nga Mensahe. Gipaningkamotan ko kutob sa akong mahimo nga makaanha unta kaninyo. Ako—nasayod man ko sa hinungdan kon nganong nabuhat n’yo kana. Madungog ba ninyo? Ang bugtong hinungdan kon nganong nabuhat n’yo kana, tungod palagpoton man gud kamo sa inyong denominasyon. Ug nasayod sab kamo, daghan kaninyo nga akong nakaistorya, didto sa Furr’s Restaurant, ug nasayod gyud kamo nga tinuod kana. Makauulaw kamo.

³³⁶ Panggawas na mo dinha. Panggawas na intawon mo gikan dinha, igsoon. Kung aduna ma’y Kinabuhi diha kaninyo, nan mahisama gyud kamo niadtong gamay’ng agila nga bag-ohay ko lang gihisgotan, madungog sab ninyo ang Pulong sa Dios. Hinumdumi, madungog n’yo Kini sa kaulahiang higayon, usa sa niining mga adlaw. Haduol na kaayo kita karon. Mahimo n’yo bang moduol, karong gabhiona?

³³⁷ Minahal nga Dios, ania kami nga maalampon karon, usa gayud kini ka adlaw sa pagpasalamat, Ginoo. Mapasalamaton ako, Ginoo, nga nagakinabuhi ko niini nga adlaw. Mao kini ang pinakahalangdon nga adlaw. Ngani nangandoy si Pablo ang apostoles nga makasaksi niini nga adlaw. Ang halangdong mga tawo kaniadto nangandoy gyud nga makasaksi niini. Ang mga propeta nangandoy nga makasaksi niini. Nanagpaabot sila alang niini nga adlaw. Nagpaabot sab si Abraham alang niini nga adlaw, tungod kay nangita man siya og usa ka Lungsod kinsang Magtutukod ug Magbubuhay mao ang Dios; anaa kini nagapaibabaw mismo kanamo, karong gabhiona. Nakita ni Juan ang Espiritu sa Dios nga nagakunsad gikan sa Langit, siya’y nagpamatuod, og hingsayran nga mao kadto ang Anak sa Dios.

Ug, karon among mapamalandong, nga ginapili na Niya ang Iyang Pangasaw-onon.

³³⁸ Minahal nga Dios, dinha sa tibuok nasud sa kon asa man, magpakigsulti Ka sa ilang kasingkasing. Ingon nga Ikaw lang ang Bugtong makapausab sa ilang kasingkasing. Kung dili ang maong Binhi ang nahitisok dinha sa sinugdan pa lang, nan dili gyud nila Kini makita, Ginoo. Igo lang sila. . . “Kon buta ang magaagak sa buta. Sila mangahulog gyud sa gahong,” sa ingon ka sigurado sama sa unsa mang butang, tungod kay nagaingon man ang Imong Pulong nga mangahulog gyud sila.

³³⁹ Karon, Amahan, ingon nga nakita namo sa tibuok nasud, sa tibuok kalibutan, sa Africa, dinosena, dinosena sa South Africa, Mozambique, og sa tibuok nasud, ang gagmay'ng mga panagtigum nga nagadawat niining mga teyp. Ug kini nga teyp mahidangat usab ngadto sa sobra baynte ka, nagkalainlaing mga nasud. Hinay-hinay na nila Kini nga nakita ug nagapahimulag na, gatasan ug gatasan kanila. Dili man daghan, Ginoo. Dayon sa diha nga makasulod na ang kaulahiing miyembro niining Lawas, moabot na si Cristo.

³⁴⁰ Ginoong Dios, ginahangyo ko ang Pangasaw-onon, karong gabhiona, silang mga nabati ko nga nakapahimulag na ug nagahulat na lang, hinaut nga ihimulag gyud unta nila ang ilang mga kaugalingon gikan sa tanang butang sa kalibutan. Kinahanglan nilang mabulad diha sa Presensiya sa init nga Kahayag sa Anak nga mao ang Anak sa Dios, og mahumod sa Iyang Pulong, sa Iyang gugma. Itugot kini, minahal nga Dios.

³⁴¹ Hinaut nga kining mga tawo, nga ania dinhi, nga nanagpataas sa ilang kamot, karong gabhiona, dunay dinosena kanila sa kinatibuk-an niining daku nga tabernakulo, ginaampo ko, Dios, nga ang bag-ong Kinabuhi mosulod kanila; ginaampo ko kini, alang sa tibuok nasud ug sa tibuok kalibutan usab, kon diin mapaminawan ang teyp, aron nga madawat usab nila kining Pang-pasalamat nga Mensahe ug mahibaloan, pinaagi sa mga pagpasabot ug sa mga butang nga gikapahayag, bahin sa kung unsay angay nilang buhaton. Ginaampo ko kini, Amahan. Itugot kini. Panalangini sila. Imoha man sila.

³⁴² Nasayod ko nga naandan na kini karon, Amahan, nga awhagon namo ang mga tawo nga moduol sa altar. Ug ginaampo ko, minahal nga Dios, nga sa matag pagpangmisyon, sa tanang dapit ug sa tibuok kalibutan, nga moduol gyud unta sila sa altar: ang mga itum, ang mga puti, mga dalag, og mga tabonon, sa kon asa man sila; mga dato, mga kabus, mga walay-pagtagad, mga makililimos, o kung unsa man sila.

³⁴³ Ang mga denominasyonhon, kadtong mga nagpakaingon ug mga makikaugalingon, Oh Dios, “Mga hubo, makaluluoy, alaut, buta, ug wala gani mahibalo niini.” Pero giingon Mo man nga mamaingon niana gayud, ug mao nga ingon niana kini.

344 Busa ginaampo ko, Amahan, nga Imong tawgon ang matag Binhi, karong gabhiona. Ug sa bisan asa man sa tibuok kalibutan nga mahimong katugdonan Niini, hinaut nga makaplagan Niini kanang gamay'ng agila nga nakaila sa Tingog sa iyang Ginoo. Itugot kini, Amahan. Ginatugyan ko sila nganha Kanimo, sa Ngalan ni Jesus. Amen.

345 Karon samtang nakaduko ang inyong mga ulo, kamong mga tigpaminaw nga ania dinhi. Aduna ba'y pipila dinhi, nga dili pa luwas, og nga wala pa gayud gikatugyan ang inyong kasingkasing ngadto sa Dios, dili ba angay kamong magpasalamat tungod sa gibuhad ni Jesus para kaninyo? Ngani ang hunahunaon, nga usa kamo ka makasasala, tungod nga nahimulag kamo gikan sa Dios, ug bisan pa niana Aduna gyud gihapon og unsa man sa inyong kasingkasing, may nagapanuktok. [Ginatuktok ni Igsoong Branham ang pulpito—Ed.] Unsaon man ninyo pagpakahibalo gawas lang kung usa kamo sa nianang gagmay'ng mga agila! Makaluluoy kamo, ug mahimong makaluluoy gayud, gawas kon mosurender kamo ngadto Niini. Nganong dili man ninyo kini himoon nga usa sa pinakamahimayaon nga pagpasalamat nga inyong nabuhad sukad-sukad, sa higayon nga inyong gidawat si Jesus Cristo ingon nga inyong Manluluwas.

346 Mahimo ba nga moduol kamo dinhi ug motindog sa altar? Magaampo ako uban kaninyo kung moduol kamo, ang si kinsa man nga makasasala, lalaki o babaye, batang lalaki o batang babaye, miyembro man sa iglesia o dili miyembro sa iglesia. Ang pagkahimong miyembro sa iglesia dili makapahimo kanimo nga usa ka Cristohanon. Bukas ang altar. Mahimo ba nga moduol ka, ang si kinsa man nga makasasala nga gustong moduol, og dawaton si Ginoong Jesus Cristo. Gusto mo ba nga moundang na gayud . . .

347 Ang pipila kaninyo nga mga denominasyonhon nga gusto nang moundang og kaon nianang pagkaon nga iya sa manok, nga nagaingon, “Miyembro diay ka *niini* ug okey lang kana,” gusto mo ba nga masayran gayud kung unsa ang tinuod nga bautismo sa Espiritu Santo? Nan duol ngari, og hibaloa.

348 Bukas ang altar. Andam na kami. Tindog lang mismo, gikan—gikan sa imong gilingkoran. Dumuol ka sa gilayon ug magluhod dinhi sa altar, kining igsoong lalaki nga bag-ohay pa lang nga miduol.

349 “Ingon nga pagpasalamat, Oh Dios, mapasalamaton kaayo ko Kanimo. Nga, sa tibuok kong kinabuhi, nasayod ko nga aduna gyu'y usa ka butang, Ginoo. Wala pa ko ingon nga nakumbinsi sukad-sukad. Akong gisulayan kaniadto. Ako—sa hunahuna ko, ‘Sunod tuig, buhaton ko na. Sa sunod semana, buhaton ko na gyud, sa sunod higayon nga makadungog ako og usa ka pagtawag sa altar. Himoon ko na lang kana, sa umaabot nga

adlaw.' Nagsige ra ko og, langay-langay para niini. Apan, Ginoo, nasayod ko nga aduna gyu'y sayup kanako. Dugay na akong nagatoo nga aduna gyu'y butang nga lahi. Ug karon, Ginoo, niining gabhiona, mapasalamaton ako tungod sa giandam sa Anak sa Dios, aron ang akong mga sala, sa tinuod lang ang akong dili gyud pagtoo, nga mawagtang na kanako. Nagaduol ako, karong gabhiona, ug moluhod aron dawaton ang dakung pang-pasalamat nga panalangin nga gibuhay ni Jesus Cristo para kanako kaniadtong namatay Siya didto sa Kalbaryo alang kanako."

³⁵⁰ Mahimo ba nga moduol kamo? Karon aduna na'y mga tawo nga nagaluhod dinhi sa altar. Nganong dili man mo manindog ug moduol usab? Dugay na ninyo gustong buhaton kini. Nagsulay na mo kaniadto.

³⁵¹ Hunahunaa lang ninyo si Igsoong Lyle Palmer, ang buutan, og bililhon natong igsoon. Atua siya sa nataran, sa nasayran ko, samtang nagatan-aw sa anak niyang babaye nga nagadula og croquet didto sa gawas, o mora'g ingon-ana, ug nabalintong siya sa lingkoranan ug namatay og wala na siya milihok pa. Wala kamo mahibalo kung unsang orasa na kamo mobiya dinhi. Wala gyud kamo mahibalo kung unsang orasa na kamo motaliwan. Tingali'g karong gabhiona, na, busa nganong dili man kamo moduol ug itul-id na kini karon?

³⁵² Umari na kamo, mga higala. Dili ba ninyo mabati nga Adunay nagabira kaninyo? Ako—kahibalo ko nga daghan pa unta kaninyo ang angay'ng maania dinhi mismo sa altar, ug kining unom o pito ka tawo nga miduol na dinhi dili baya unta nga sila lang ang mga ania karon dinhi. Karon, kung nagatoo kamo kanako ug nakita n'yo mismo dinhi sa entablado, ang mga butang nga nagakahitabo, angay lang nga motoo gyud mo kanako. Moabot ang adlaw nga ang akong tingog mohilum na. Dili na ninyo kini madungog pa. Moingon ka nga miduol ka na lang unta.

³⁵³ Moingon mo, "Apan, Igsoong Branham, usa man ako ka miyembro sa iglesia." Walay unsa man nga kalahian kung unsa kamo. Si Nicodemo usab—usab usa man siya kaniadto ka miyembro sa iglesia. Mao usab sila ni Juan, Pedro, Santiago, Pablo, og ang tanang uban pa kanila nga mga miyembro sa iglesia.

³⁵⁴ Si Pablo usa man ka miyembro sa iglesia hangtud nga adunay nahitabo usa ka gabii niadto, o usa niadto ka adlaw diay, ug miduol siya. Usa siya ka miyembro sa iglesia nga gibag-o niadtong tungora, sa pagkahimong usa ka anak sa Dios. Mahimo n'yo bang moduol usab? Oh, binansay siya kaniadto. Intelektuwal siya. Nasayod siya nga binansay siya, sa usa sa pinakabantugang-mobansay nga mga tulonghaan kaniadto, kang Gamaliel, nga usa sa pinakabatid nga mga magtutudlo sa

yuta kaniadto. Apan nasayod siya nga nagkinahanglan gyud siya og usa ka butang.

³⁵⁵ Mahimo n'yo bang moduol? Sa makausa pa hangyoon ko kamo. Kon diin . . . Dinhi o sa tibuok nasud, ginahangyo ko kamo, kon asa man kamo, kon unsa man nga panagtigum ang inyong nahimutangan, sa niining takna sa pagpasalamat. Timan-i n'yo, nga naka-teyp ako dinhi; dili lamang dinhi, kondili sa Langit usab.

³⁵⁶ Kabalo mo, napamatud-an na kini sa siyentipikanhong pamaagi nga ang matag lihok ninyo nakarekord. Gipamatud-an nila kana. Hinumdumi, napamatud-an kana sa telebisyon. Ang telebisyon dili—dili man makahimo og hulagway. Kamo mao ang hulagway. Ginadala lang niini, kung unsa ang inyong ginabuhay, ngadto sa usa ka agianan. Pero anaa ra kamo dinha, bisan pa man. Kita n'yo? Sa diha nga ilihok mo ang imong tudlo, kana nga paglihok nagalibot-libot na sa tibuok kalibutan. Sa matag higayon nga magsul-ob ka og sinina, ang imong hitsura nagalibot-libot na kana sa tibuok kalibutan. Naka-rekord na kana. Ang matag hunahuna nga nga imong ginahunahuna naka-rekord usab. Ug sa umaabot nga adlaw ang maong pagrekord pagahunongon na, og ibutang na kana sa tipiganan sa mga rekord.

³⁵⁷ Ug unya didto sa Paghukom ipatukar na kana pag-usab. Didto mobarug kamo nga pinutlan ang buhok, nagapamahayag nga usa ka Cristohanon kono. Didto mobarug kamo nga dunay mga hunahuna sa inyong panghunahuna nga batok sa Pulong, ug anaa kana mismo sa inyong panghunahuna. Dili n'yo kana maililong. Hinumdumi, ang telebisyon, bisan siyensiya nasayod usab nga tinuod kana. Kamong mga ania dinhi mismo karon, nga nanghibalo nga angay gyud unta kamong moduol dinhi, timan-i n'yo, ingon nga nakarekord kini, didto sa Adlaw sa Paghukom, kanang mao ra nga hunahuna nga aduna kamo karon ipahinumdum ra kana kaninyo pag-usab. Tungod nakarekord kana mismo. Makakita niana ang tibuok kalibutan pag ipatukar na kana. Aba dili ba ang kalibutan . . . Magatan-aw man kaninyo, sa Adlaw sa Paghukom, og ang tanang mga Anghel atua usab didto.

³⁵⁸ “Kung ginakaulaw n'yo Ako dinhi, ingon nga ginahimo na ang inyong hulagway karon, sa Adlaw sa Paghukom igakaulaw Ko kamo. Tungod, gidihogan Ko man ang Akong Pulong, og gipadala Kini para kaninyo. Pero ayaw man ninyo nga toohan Kini. Nagatago kamo luyo sa usa ka butang.”

³⁵⁹ “Oh,” moingon mo, “Maayong tawo man ko. Nabuhat ko na ang *ingon-niini*. Nakasayaw na ako diha sa Espiritu. Nakasulti na ako og laing mga pinulongan.” Mao man usab ang mga pagano. “Nakasinggit ako.” Mao man usab ang mga pagano. Kung ingon niana nganong gitalikdan man ninyo ang Pulong?

. . . why not,
 Why not come to Him now?
 Why not, why not,
 Why not come to Him now?
 Why do you wait, dear brother,
 Oh, why do you tarry so long?
 Jesus is waiting to save you
 A place in His sanctified Home.

Himoon kamong usa sa mga bahin sa Iyang Lawas!

Why . . . ?

Oh, gamay'ng agila, umari ka na.

Oh, why not come . . . ?

³⁶⁰ Ginoo, mapasalamaton ako. Mapasalamaton gayud ako. Ang pagpasalamat ko Kanimo, Ginoo; dili para sa natural nga pagkaon, hinoon nagapasalamat sab ko niana. Apan, Ginoo, ania na ang katapusang panahon. Mao nga mapasalamaton gyud ako alang niining espirituhanong Pagkaon, Ginoo, ang espirituhanong Pagkaon mahitungod sa Pito ka Selyo nga gisaad kaniadto nga pagaablihan.

Moingon mo, "Mamahimong lahi na kana." Dili, dili.

³⁶¹ Dili kamo puedeng magdugang og usa ka pulong. Ug magtaktak. . . Kini anaa na Dinha, pero gililong lang. Selyado Kini. Pila man ang nakasabot niana? Moingon, "Amen." [Nagaingon ang kongregasyon, "Amen."—Ed.] Kita n'yo?

Moingon mo, "Bueno, usa ra kana ka misteryo nga motungha." Oh, dili.

³⁶² Nahisulat na Kini. Dili sab kamo puedeng magdugang og usa ka pulong ngadto Niini, ni magtaktak og usa gikan Niini. Kita n'yo? Kini'y anaa na man Dinha. Kinahanglan lang nga mahipadayag Kini sa kaulahiing adlaw.

³⁶³ Mahimo n'yo bang moduol? Duol na mo karon, higala. Kung dili ninyo masabtan, duol ngari. Pagluhod mo, og makigsulti Kaniya mahitungod Niini. Kung dili man nako maiklaro Kini nganha kaninyo, nan Siya ang mopaklaro, kay Siya man mao ang—ang Tigsulbad sa tanang mga pagduhaduha.

. . . in His sanctified throng.

Oh, why . . .

Mahimo bang moduol na kamo?

. . . why not,
 Why not come to Him now?

³⁶⁴ Hinumdumi n'yo, aduna baya og usa ka pag-rekord niini, dili lamang sa niini nga teyp, kondili sa dakung pag-rekord sa Dios usab. Ang matag usa kaninyo, ang matag lihok n'yo, sa diha nga iyukbo n'yo ang inyong ulo, iyukbo ang inyong

kasingkasing, og kung unsa man nga hunahuna ang mosantop kaninyo, hinumdumi, nga nakarekord kini mismo karon didto sa Himaya, ug ang maong rekord igapatukar didto na sa Adlaw sa Paghukom. Unsa ma'y inyong desisyon? Oh, daw sa unsa nga tinguhaon gyud ninyo nga mausab pa unta ang maong desisyon, sa niana nga Adlaw.

³⁶⁵ Maghulat lang usa ko, tungod kay daghan, daghan na man, ang anaa dinha sa altar. Kita n'yo? Tingali'g may usa pa kanila, kung maghulat pa ako sa makadiyut, basin aduna pa'y usa dinha, tingali'g sa kon asa man sa New York, tingali'g sa kon asa man sa Philadelphia, dinha sa California, sa Arizona. Sa kon asa man, basin aduna pa'y usa nga moduol. Pastor, kon asa ka man, ayaw'g ihunong ang pagtawag sa altar karon.

³⁶⁶ Tingali'g dili na kita makasaksi pa og usa ka adlaw sa Pagpasalamat. Basin mao na kini ang pinakaulahi, ug ang mga rekord pagahipon na, karong gabhiona, sa kaulahi ang higayon. Ang pag-teyp pagatapon na, usa sa niining mga adlaw. Ang rekord pagahunong na ug ibutang na diha sa tipiganan sa mga rekord sa Dios. Dayon igapatukar kini, kung unsa ang inyong mga ginahunahuna sa karon. Ayaw mo pag-ingon nga wala kamo nahibalo. Nasayod gyud kamo. "Apan walay tawong makahimo sa pag-ari Kanako, gawas kon pagadanihon siya sa Akong Amahan. Ug ang tanan nga gikahatag Kanako sa Amahan, magaari sila."

. . . come to Him . . . ?

³⁶⁷ Igsoon, nagatoo ko, nga kung ako ang anaa dinha, dili na ko magduhaduha pa, ug siguradong moduol gayud ko dinhi kutob sa akong mahimo. Hmm.

Oh, why not,
Why . . . ?

³⁶⁸ Human na ba mo? Sigurado ba mo nga wala ninyo ginapasubo ang Iyang Espiritu karon? Padayon ra natong iduko ang atong mga ulo kung ingon niana. Sigurado ba gyud mo nga wala ninyo gipasubo ang Iyang Espiritu? Sigurado ba mo nga gibuhat n'yo sa ingon ka eksakto ang Iyang gisulti nga angay n'yong buhaton? Sigurado na ba mo karon? Timan-i n'yo, kamo—mahimong dili na kamo magkaaduna pa og usa pa ka kahigayonan. Tingali'g matapos na ang pag-rekord, karong gabhiona. Basin mao na lang kini. Basin mao na kini ang kaulahi ang teyp para kaninyo. Sigurado ba kamo nga andam na mo karon? Kung ingon-niana, anaa na kini sa inyong kamot, sa Ngalan ni Ginoong Jesus.

³⁶⁹ Karon samtang nagaawit ang choir sa malumo nga paagi, mag-ampo ako para sa niining mga nanagluhod dinhi. Usa ako ka medyo talagsaon kaayo nga matang sa Cristohanon. Nagatoo ko nga ang Dios mao gayud ang magaluwas. Nagatoo ko nga ang Dios mao ang magatanum sa Pulong. "Ako mao ang Ginoo," ang

ingon sa Biblia, sa Isaias, “Ako mao ang Ginoo nga nagtanum Niini. Pagabisbisan ko Kini, adlaw ug gabii, kay tingali’g adunay pipila nga moilog Niini gikan sa Akong kamot.” Sa dili pa nako hangyoon ang si kinsa man nga moduol nganhi sa may altar uban niini nga mga tawo, buut ko nga mag-ampo para kanila, ako mismo.

Iduko nato ang atong mga ulo karon.

³⁷⁰ Minahal nga Jesus, bag-ohay ko lang gikutlo ang Imong Pulong, nga gisulti sa Imong propeta, ug nasayod ko nga ang mga pulong sa mga propeta tinuod. Ug miingon Ka, “Ako mao ang Ginoo nga nagtanum Niini.” Bueno, sa walay-pagduhaduha, gisulat Mo na Kini diha sa Basahon sa Kinabuhi nga iya sa Cordero, sa wala pa ang pagkatukod sa kalibutan. “Ako mao ang Ginoo nga nagtanum Niini, ug pagabisbisan Ko Kini, adlaw ug gabii, kay tingali’g adunay moilog Niini gikan sa Akong kamot.” Kini sila, Ginoo, tingali’g, nakadungog na og daghang mga pagtawag sa altar. Apan ginabisbisan Mo gihapon Kini, Ginoo.

³⁷¹ Ania sila, niining gabhiona. Hinaut nga pangbuhian na gayud nila, karong gabhiona, Amahan, ang tanang mga butang nga iya sa kalibutan, ang tanang mga sala ug mga pagkalibog nga anaa sa ilang kasingkasing, ug ingon nga nakasabot gayud, nga may pagtahud, sa ilang kasingkasing, mosurender unta sila ngadto sa Imong Pulong, karon mismo, ug moingon, “Ginoong Jesus, sa kinasuloran sa akong kasingkasing, nagatoo ako sa una pa nga aduna gyu’y butang para kanako, nga wala ko pa sukad nadawat. Bisan pa nga misulay ako, sama sa giwali na karong gabhiona, nga kaniadto nagsunod-sunod ako sa himongaan, apan aduna gyu’y butang nga para kanako lahi gayud. Dili gayud kadto husto nga tingog. Dayon, karong gabhiona, nabati ko nga mas napahiduol ako karon sa mga bukton sa buhi nga Pulong. Nagaduol ako dinhi nga may pagtahud gayud, ug anaa sa husto kong panghunahuna. Nagaluhod ako karon niining altar. Bug-os gyud akong, nagtinguha og kaluwasan, Ginoo. Nagahinam-hinam gyud ako! Ginatinguha ko Ikaw, Ginoo, nga Imo akong sapnayon, karong gabhiona. Dili pinaagi sa unsa mang emosyon, kondili pinaagi gayud sa Espiritu sa gugma, agaka ako diha sa Imong mga bukton, minahal nga Dios.”

³⁷² “Imo akong anak. Nabati ko nga ako kadtong agila nga ilang ginahisgotan. Abota ako, Ginoo. Nagalukso ako. Mitindog ako gikan sa akong gilingkoran, ug miluhod dinhi. Abota ko, Ginoo. Nagalukso ako. Agaka ako diha sa Imong mga pako, Ginoo, pahilayo niining mga butang nga iya sa kalibutan. Tugoti ako nga makalupad pahilayo sa kahugawan niining kalibutan, sa akong di-maayo nga kinaiya, og sa tanan kong pang-denominasyon nga tradisyon. Tugoti ako nga moduol Kanimong lamang, minahal nga Dios, aron nga maibubo kanako sa Imong Balaang Espiritu ang kapasayloan sa tanan kong mga pagduhaduha. Hinaut nga ako, karong gabhiona, mamahimo na

nga Imong anak, nga bag-ong, nahimugso, ug usa na ka bag-ong linalang, karong gabhiona. Abota ako. Dalha ako pahilayo, nga halayo sa mga pagkurokutok sa himongaan. Dalha ako pahilayo, ngadto sa pugaran sa Agila, kon diin didto ako maatiman sa Pulong sa Dios, hangtud nga may kasarang na ko nga molupad.”

³⁷³ Itugot kini, minahal nga Dios. Agaka sila. Imoha na sila. Kini mao ang akong pag-ampo nga dunay pagkasinsero, nga nagaampo alang sa mga tawong naghimalasyon na. Itugot kini, Amahan. Ginahalad ko kini nga pag-ampo alang kanila. Alang sa kahimayaan sa Dios, ako kining ginapangamuyo.

Karon samtang nakaduko ang atong mga ulo.

³⁷⁴ Buut kong masayran, ninyong mga nagaluhod dinhi, sa may altar karon. Daghan kaninyo ang nagapamahayag nga mga Cristohanon, apan nabati ninyo nga aduna gyu’y butang sa una pa, sa kon asa man, nga wala pa ninyo nabatonan. Mahimong nabuhat n’yo na ang tanang pang-relihiyon nga buluhaton. Mahimong nakasinggit na kamo. Mahimong nabuhat n’yo na ang tanang butang. Mahimong nakasayaw na mo diha sa Espiritu. Mahimong nakasulti na mo og laing mga pinulongan. Ngani walay si kinsa man ang makasulti og bisan unsa nga dili-maayo bahin niana. Tinuod kana. Tungod maayo man kanang tanan. Apan, nakita n’yo, kana’y *mga gasa* ra sa Espiritu, nga wala ang Espiritu. Kay kung anaa man gani ang Espiritu, nan kanang maing pagbati dili unta makabati og ingon niana nga pagkondena.

³⁷⁵ Nagatoo ba gyud kamo, nga matinuuron gayud, kamong mga ania sa altar, karon mismo, samtang ania kamo, kana nga pag-akto nga ginasurender n’yo ang inyong kaugalingon, dili ingon nga emosyon ra, kondili tungod gyud sa tinuod, og walay-sambog nga pagtoo, nga dawaton kamo sa Dios ug pakanon kamo pinaagi sa Iyang Pulong hangtud nga mamahimo na kamong mga agila, mismo, ug makalupad na? Kung nagatoo kamo, ug ginatinguha ninyo nga buhaton kana sa Dios, nan ipataas n’yo ang inyong kamot, kamong mga ania dinhi sa altar. Panalanganan kamo sa Dios. Gipataas na sa matag usa ang ilang mga kamot.

³⁷⁶ Karon, sa mahilumon lang nga paagi, hangyoon ko ang napahinungod na nga mga lalaki ug mga babaye nga nakaila gayud sa Dios.

³⁷⁷ Kadaghanan kanila, pagkatalagsaon niini, mora’g ingon niana gyud, sa akong ginahimo dinhi nga mga pagtawag sa altar halos mga lalaki tanan ang nagaduol. Abi ninyo, kasagaran man gud, mga kababayen-an ang nagaduol. Apan karon mga lalaki tanan ang ania dinhi. Sa tan-aw ko mora’g adunay usa ra ka babaye dinhi sa altar, karong gabhiona, o mora’g duha diay. Kasagaran mga kababayen-an man gyud. Apan, sa kung unsa mang hinungdan, sa hunahuna ko daw sa ginahunahuna man

gud sa mga kababayan-an nga nagasulti ako batok kanila. Dili intawon, igsoong babaye. May tulo diay, sa hunahuna ko, adunay miingon nga tulo kono ang ilang nakita. Dili man gud nako makita dinhi mismo ibabaw sa altar. Bueno.

³⁷⁸ Duol ngari ang pipila kaninyo nga napahinungod na nga mga Cristohanon ug tindog mo dinhi uban kanako sa pag-ampo sa makadiyut lang. Diha sa altar, kon asa man kamo, sa entablado, ang si kinsa man nga nakaila gayud sa Dios, nga nahibalo sa pagtindog dinhi sulod sa pipila lang ka minuto alang sa pag-ampo uban kanila, pagkahuman ipapauli na nato ang mga mananambong. Ang tanan magmatinahuron gayud karon. Ayaw ùsa mo paghawa. Duol lang mo dinhi ug motindog.

³⁷⁹ Ang pipila kaninyo nga mga nagatoo gayud Niini ingon nga mao ang Kamatuoran, nagatoo nga nagasulod na kita sa laing kapanahonan, nagasulod na kita sa Kapanahonan sa Pagsakgaw, nasayod kamo nga ang iglesia dili na makapadayon pa sa kahintang niini, ug dili na kini moarang-arang pa. Siguradong magakasamot pa gayud kini. Pila man ang nasayod niana? Moingon og, “Amen.” [Nagaingon ang kongregasyon, “Amen.”—Ed.] Siguradong mosamot pa gyud kini. Ug dili na kini makapadayon nga ingon niini gihapon. Kita n’yo? Tungod kini sa kung unsang Butang, ug nagapamuhat na Kini mismo karon, higala. Kini’y—kini’y—padayon na Kining nagapamuhat, alang sa Pangasaw-onon. Mao kana ang Kamatuoran. Kana’y MAO KINI ANG GINAINGON SA GINOO.

³⁸⁰ Duol na mo karon, mga napahinungod na nga Cristohanon nga nagatinguha nga makita ang inyong—inyong rekord nga mamaingon niini, nga gusto ninyong moduol ug maghalad og pag-ampo uban kanila, nga mga nangduol nga sinsero gayud, ingon nga inyong mga igsoong lalaki ug mga igsoong babaye, duol na mo dinhi sa altar. Tindog mo dinhi sa makadiyut, alang sa pag-ampo. Aduna pa ba’y gustong moduol? Tindog mo dinhi. Pagluhod mo tupad nila. Duol lang mo, kamong mga kalalaken-an nga haduol niana nga mga kalalaken-an; kamong mga kababayan-an usab. Nga may pagkamalulot, og mapainubsanon nga mag-ampo alang kanila.

Minahal nga Dios, tabangi . . . ? . . .

³⁸¹ “Ginasurender ko na ang tanan. Ginasurender ko na ang akong denominasyon. Ginasurender ko na ang akong unang pagkaminyo. Ginasurender ko na ang akong unang bana. Ginasurender ko na ang tanan-tanan, Ginoo.”

. . .surrender all.

All to Thee, my blessed Saviour,

I surrender all.

I surrender all,

I surrender . . .

382 Ginasurender na ba ninyo ang kaugalingon n'yong ideya? Mahimo n'yo bang isurender ang kaugalingon n'yong mga ideya, alang sa Pulong sa Dios?

All to Thee, my blessed Saviour,
I surrender all.

I surrender all,
I surrender all,
All to Thee, my blessed Saviour,
I surrender . . .

383 Ang tanan nga nanagtoo karon, diha sa mga tigpaminaw, panindog mo. Awiton nato kini, nga magkadungan, karon.

I surrender . . .

Isurender na ba ninyo ang tanan, og andam na nga moawit niini karon?

I . . .
. . . to Thee, my blessed Saviour,
I surrender . . .

384 Karon, kamong mga anaa dinha sa altar, kung tinuod kamong nagasurender, ipataas n'yo ang inyong kamot nganha Kaniya, og moawit, "Ginasurender ko na ang tanan. Ginasurender ko na ang denominasyon. Ginasurender ko na ang denominasyon. Ginasurender ko na ang iglesia. Ginasurender ko na ang akong kaugalingon. Ginasurender ko na ang akong ideya. Ang tanan-tanan na nganha Kanimo, akong mapanalanginong Manluluwas, ginasurender ko ang tanan."

. . . to Thee, my . . .
I surrender all,
I surrender all,
All to Thee, my blessed Saviour,
I surrender all.

Sinsero ba gayud mo niini?

I surrender all,

385 [Blangko nga bahin sa teyp—Ed.] Kamong mga ania sa altar karon. Kamong mga ania sa palibot sa altar, nga nanag-ampo. Nag-ampo na ang iglesia para kaninyo. Nag-ampo na usab kamo, mismo. Karon aduna lamang og bugtong paagi nga kamo mamaluwas, kana'y, "Pinaagi og pagtoo kamo nangaluwas, ug pinaagi kana sa grasya." Ang grasya sa Dios ang nanulti kaninyo, ang nagdala kaninyo nganha sa altar. Ginatinguha n'yo ang mga panalangin sa Dios. Ginatinguha n'yo ang Iyang Pulong. Ginatinguha n'yo ang Espiritu Santo. Ginatinguha n'yo ang mga tabang sa Dios. Ug kung mao man, ug kon mahimo n'yo, gayud, sa tibuok ninyong kasingkasing, nga isurender kana, karon, ayaw n'yo tinguhaa ang unsa man nga emosyon, tinguhaa n'yo ang Kamatuoran, ang Kamatuoran nga gikan sa kinasuloran

sa inyong kasingkasing, pinaagi'g pagtoo. “Ginoo, andam ako nga buhaton ang bisan unsa man nga ginamando sa Imong Pulong nga akong pagabuhaton. Ginasurender ko ang akong kaugalingon, uban sa tanan-tanan nga anaa kanako.”

³⁸⁶ Kung nagatoo kamo niana sa tibuok n’yong kasingkasing, gusto ko nga manindog kamo, moatubang sa niini nga iglesia, sa mga mananambong, ug ipataas ang inyong mga kamot, ug awiton nato kini nga magkadungan uban kanila, “Ginasurender ko ang tanan-tanan nga anaa kanako, Dios. Kutob sa akong nahibaloan, ang tanan-tanan kung unsa ako, ginasurender ko na.”

³⁸⁷ Saka mo dinhi sa entablado, kamong mga anaa dinha sa altar. Saka mo dinhi mismo sa entablado, mga igsoon, dinhi mismo sa itaas, kamong tanan, nga mga igsoong lalaki ug mga igsoong babaye.

Tan-aw mo dinhi, iglesia.

³⁸⁸ [Nagaingon ang usa ka igsoong babaye, “Igsoong Branham, miyembro ako sa usa ka iglesia, apan bag-o lang ko nga wala—wala na nagatambong niini.”—Ed.] Imo na bang isurender? [“Nasayod ang Ginoo kon asa ko gitinguhang pangunahan Niya. Ginatinguha ko...?. . .ngadto sa iglesia. Ug ginatinguha ko gayud ang Balaang Espiritu, nga mapuno sa Espiritu. Ug andam ako nga mamatay, kung mao kana ang gikinahanglan.”] Oo. Husto kana. Isurender mo na ba ang tanan-tanan nganha Kaniya ug sa Iyang Pulong?

³⁸⁹ Ang usa ka igsoong babaye dinhi, nga gikan sa usa ka denominasyon. Ingon siya, “Miyembro ako sa usa ka denominasyon.” Dili na nato kini kinahanglang hinganlan. Usa siya ka magbubuhat didto. Apan ingon siya, “Igsoong Branham, ginatinguha ko gayud nga mapaingon sa Kamatuoran. Gusto ko og mas halawom pa niadto.” Kita n’yo?

³⁹⁰ Isulti ko ang Iyang Pulong. “Bulahan ang mga gigutom ug giuhaw sa pagkamatarung, kay sila pagabusgon.”

³⁹¹ Karon, kamong mga ania sa entablado, nga bag-ohay pa lang nga miduol, kung andam na kamo nga isurender ang tanan-tanan kung unsa kamo, ang tanan-tanan, aron tumanon ang Pulong sa Dios. . .Walay si kinsa man ang nagsulti kaninyo, niining semanaha, kung unsay pagabuhaton. Karon, kung andam na kamo nga mosurender karon mismo nganha Kaniya, ipataas lang ang inyong mga kamot, nga nakaingon *niini*, diha sa mga mananambong. Karon, kamong mga ania sa entablado, awiton nato kini nga magkadungan karon, *I Surrender All*. Ang tanan, nga magkadungan. Sige.

I surrender all,

Karon, kinahanglan sinsero gyud mo!...?...siya usa niadto ka adlaw, ug mapasalamaton gayud ako. Ipasurender siya...?...

. . . Saviour,

³⁹² Sinsero ba gayud mo niini? Moingon og, “Amen.” [Nagaingon ang kongregasyon, “Amen.”—Ed.] Moingon og, “Amen,” sa makausa pa. [“Amen.”]

Moingon, “Ginoo, susiha ako, sulayi ako, ug hatagi ako og kahigayonan. Mao lang kini ang mahimo kong buhaton, karong gabhiona, nga itugyan ang akong kaugalingon nganha Kanimo. Nasayod Ka sa pagkauhaw sa akong kasingkasing, nasayod Ka sa akong tinguha. Ang Imong saad mao man ang pagpuno niana nga tinguha, karon ginadawat ko kini, ug nagasurender ako nganha Kanimo.”

Dungan ang tanan:

I surrender all,
I surrender all,
All to Thee, my blessed Saviour,
I surrender all.



*ANG DILI-MAKITA NGA PANAGHIUSA SA
PANGASAW-ONON Ni CRISTO CEB65-1125*
(The Invisible Union Of The Bride Of Christ)

Kining Mensahe ni Igsoong William Marrion Branham, una giwali sa Ingles niadtong Adlaw sa Pagpasalamat, Huwebes sa gabii, Nobyembre 25, 1965, sa Life Tabernacle, sa Shreveport, Louisiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org